

3.5 325





MECHANICAE
RATIONALIS ET PRACTICAE
ELEMENTA
A V C T O R E
D. OCTAVIANO CAMETTI
ABBATE VALLUMBROSANO
REGIAE LVGDVNENSIS ACADEMIAE SOCIO
ET IN PISANO LYCEO
MATHESEOS PVBLICO PROFESSORE.



FLORENTIAE ANNO MDCCLXI.
EX TYPOGRAPHIA IMPERIALI

SVPERIORVM ADPROBATIONE.



P R A E F A T I O.



*Univerſam mechanicam quam nunc
trado, in Rationalem, & Practi-
cam dividendam eſſe cenſui cum
Nevotono. In mechanica rationa-
li de ſolidorum corporum motu ago, at
vero in practica ad potentias mechanicas me
converto: illa oeconomiam exhibet univerſi,
haec ad vitae commoda ordinatur. Quan-
tum vero conferat ſcientia motus ad natu-
ram intime pervadendam, utique ii norunt,
qui principia Phyſicae deliberunt. Quip-
pe ad Phyſicam ſpectat nedum materiam,
ſtructuramque partium contemplari, ſed &
expendere eius motum; materia ſiquidem*

sine motu, informis plane ac rudis est, soloque mediante motu sese natura prodit, rerum varietas enitescit, eoque vegetant plantae, nutriuntur arbores, vivunt animalia, totaque universi machina conservatur. Contra autem sublato motu omnis periret mundi ornatus, summusque torpor, atque horrendae tenebrae omnia occuparent; hinc scientia motus ad rite philosophandum adeo necessaria est, ut absque illa nullus omnino aditus patefiat ad naturae abdita pervadenda.

Non itaque est mirandum si tanto temporum intervallo accessionibus pene nullis Antiquorum physica aucta sit. Cum enim philosophandi methodus quam servabant, tota abstractis ideis niteretur, non ita physicae indulgebant, ut phenomena observarent, effectuum causas quaererent, nexusque ipsarum mutuos adnotarent, atque hac ratione quasi per gradus quosdam ad veritates illas accederent, quae initio solent remotissimae

▼

*simae apparere, unde scientiam motus cen
inutilem neglexerunt. Ac re quidem vera,
non ultra aequilibrium gravium de quo lo-
quitur Archimedes, progressi antiqui erant,
quando incomparabilis Galileus eorum in-
ventis quidquam addere ausus est, legesque
invenit, quas solent gravia observare seu
verticaliter ipsa cadant, seu supra inclina-
to descendant plano, aut per arcus circuli
deferantur. Secta hac glacie, non aegre po-
stea fuit Galilei semitis inhaerendo ulte-
rius progredi, motusque scientiam univer-
sam inventis plurimis illustrare. Et sane
non defuerunt postea viri celebres, qui mi-
rifice explicarent conflictum corporum quo-
rumcumque, qui proprietates gravium re-
censerent in curva quavis linea inceden-
tium, qui mediam tendentiam virium indi-
carent, exponerentque centrales vires, &
symptomata pendulorum, quae in cycloidis
arcubus oscillantur. Haec quidem omnia,
aliaque plurima viri celebres invenerunt, quae
sum-*

summatim inde collecta, Scientiam motus postea nuncuparunt. Sed cum saepe adhibeant demonstrationes, quae plus aequo proluxae sunt quando Syntbesi uti volunt, vel Tyronum captui parum accommodatae dum analysi uti malunt, futurum itaque e re duxi, si scientiam motus geometrico more ostenderem, eamque a longioribus, obscurisque demonstrationibus vindicarem.

Cum vero nonnulli adsint, qui ut mechanicas vires tollant, nullum non movent lapidem ut ostendant, compositi motus leges hactenus stabilitas quibus innixa est praecipua pars mechanicae, obnoxias esse errori, neque usque adeo esse rigide demonstratas, idcirco operae pretium fuit acuratius rem expendere, atque attento animo examinare, an quae mechanici de suo composito motu aiunt, simplicis motus legibus responderent; factumque est autem, ut compositi eiusdem motus proprietates, & symptomata demonstrarem, tamque claro evincerem ratione-

tiocinio, quantum scilicet opus erat ad omne deinceps scrupulum auferendum. Syntbesi quoque utens, quaedam hinc inde lemmata demonstravi ad quantitates indefinite parvas unice pertinentia, ut scilicet hac ratione Tyrones veluti manu ducerem ad propositiones aliquas percipiendas, quae non aliter patefunt, quam differentialem calculum adbibendo.

In altera autem huius tractatus parte de potentiis mechanicis verba facio. Nemo autem est qui non videat, mechanicarum virium cognitionem in causa esse, cur nationes barbarae a cultioribus secernantur; illa enim non solum artium origo fuit, sed & nos docuit, vires, & potentias quae in rerum natura sunt, nobis reddere utiliores, motusque aquae, aeris, atque ignis humanae vitae commodis applicare quoties presto sit industria, & materies ad construendas machinas necessaria. Denique ex hac mechanicae parte liquet, qua via, & me-

metodo vires humanae augeri queunt; etsi enim vis hominis absoluta exigua plane sit, potest tamen crescere in immensum, si ipsa machinis applicetur.

In hac parte mechanicae pertractanda principium aequilibræ e composito motu hausi, ne in dubium amplius verteretur, cumque universaliter in vecte inflexo primum, deinde in recto etiam demonstravi. Quod vero ad machinas alias spectat, accurate exposui ipsarum vires, usum pariter indicavi ad quem singulae ordinantur, aperui methodum qua illae sunt adhibendae, frictionis denique resistantiam, quam singulae pati solent, ad exactam trutinam revocavi. Quotquot igitur huic mechanicae dabunt operam, percipient plurimum voluptatis, sibi-que ad rite philosophandum aptum animum praeparabunt.



PARS PRIMA

S E P

MECHANICA RATIONALIS

C A P V T I.

De loco, & motu generatim spectato.

D E F I N I T I O I.

1.



Locus absolutus est ea spatii immobilis, permanentis, & undique expansi pars, quae a corpore occupatur.

D E F I N I T I O II.

2. *Locus relativus* est apparens ille, & sensibilis, qui a nostris sensibus ex situ ad alia corpora definitur.

S C H O L I O N.

3. Cum spatium ipsum sic ens simile, ac uniforme, cuius singulae partes nec vi-

A

de-

deri, nec tangi possunt; convenere idcirco homines inter se, ut loca corporum definirent per distantiam, respectum, & positionem quam habent relate ad corpora circumiecta. Exemplo lux affulgebit. Ponamus hominem sedere in angulo dato domus; determinabitur eius locus per distantiam, respectum, & positionem ad alios domus angulos, parietes, atque alia corpora circumiecta, quae veluti immobilia considerantur. Et quamdiu ille homo eundem situm, atque distantiam ab his corporibus retinebit, tamdiu in illo loco existere iudicabitur.

D E F I N I T I O III.

4. Successiva loci mutatio dicitur *Motus*, qui dividi etiam solet in *absolutum*, & *relativum*. *Motus absolutus* est successiva mutatio absoluti loci, *relativus* est successiva mutatio loci relativi.

C O R O L L A R I U M I.

5. Ex tradita idea absoluti motus, & relativi quid sit absolute, & relative quiescere, innotescit. Absolute quiescit corpus, quod in eodem absoluto permanet loco, quiescit autem relative, cum eundem relativum occupat locum.

C O R O L L A R I U M II.

6. Hinc potest corpus relative moveri,
& quic-

& quiescere absolute. Quiescente tellure, feratur navis ab occasu in ortum, & nauta opposita directione aequè promoveatur occasum versus, ac in ortum eodem tempore fertur navis; evidens est nautam sic motum quiescere absolute. Cum enim ille abreptus a motu navis tantum praecise promoveatur in ortum, quantum motu proprio retrahitur in occasum, utique absolute loquendo, locum proprium non mutabit, sed ipsi navis quasi sub pedibus subducetur. Attamen nauta revera a prora recedit, atque accedit ad puppim, ideoque (4) movebitur relative.

COROLLARIUM III.

7. Contra etiam potest absolute moveri corpus, & quiescere relative. Quiescente tellure, sedeat nauta in navi ab occasu in ortum promota; utique ipse abreptus a motu navis movebitur (4) absolute. Quoniam vero eadem semper manet distantia, & positio loci nautae ad singulas partes navis, quae veluti quiescentes spectantur, debet is quiescere relative. Itaque in hoc casu omnes navis partes eundem inter se situm servantes, apparebunt nautae veluti quiescentes, & vicissim littora, atque urbes ipsi fugere videbuntur. Ratio autem huius phenomeni ex principiis optices derivatur; nam illa obiecta nos quiescere iudicamus, quae eandem respectu oculi positionem constanter

servant, seu quorum imagines, quae in fundo oculi pingi solent, eandem semper retinae partem occupant; ea vero obiecta progredi arbitramur, quorum imagines successive diversis punctis retinae applicantur. His positis, cum partes navis eandem positionem, atque distantiam ab oculo nautae servant, earum motus minime percipietur, at vicissim littora atque urbes, quae situm suum respectu oculi semper mutant, videbuntur nautae moveri. Si pariter nostra tellus diurno motu vertitur circa axem, eius motus minime percipietur; aedificia quippe, arbores, atque alia corpora terrae partibus insidentia, eandem semper servabunt tum inter se, tum etiam respectu oculi positionem. Contra vero videbuntur nobis sol, & sidera promoveri, siquidem eorum distantia, & positio continue relate ad oculum variabitur.

COROLLARIUM IV.

8. Nil ergo certi statui potest circa quietem corporis absolutam. Vt enim eadem evincatur, prius ostendi debet, illud manere in eodem loco absoluto, quod impossibile prorsus est; locus siquidem absolutus cum sensus nostros non feriat, a nobis attingi nequit. Consequens ergo est, ut quies corporis absoluta a relativa unice deducatur, quae sola sensibus capi potest. At simul corpus potest quiescere relative, & absolute

lute (7) moveri; nil ergo certi statui potest circa quietem corporis absolutam.

DEFINITIO IV.

9. Si corpus quodcumque motum spectetur velut unicum punctum, ea linea quam describit, *percursum spatium* adpellatur; ideoque spatia quae a corpore describuntur, possunt rectis lineis exhiberi.

COROLLARIUM.

10. Hinc nequit mobile spatium describere in instanti. Finge enim corpus ex loco A in instanti transire ad alium B. Igitur eodem instanti quo est in A, reperietur quoque in B; fieri autem nequit, ut idem corpus eodem tempore occupet duo loca. Ergo dum corpus ex uno loco in alium transit, atque percurrit spatium, id non perficit in instanti, atque adeo in motu ratio etiam temporis est habenda.

CAPUT II.

De vi Inertiae, & motus quantitate inde orta.

DEFINITIO V.

11. **Q**uantitas materiae corporis cuiuscunque, quae dicitur etiam *Massa*, est aggregatum omnium particularum materiae,

A 3

ex

ex quibus constat idem corpus. Ipsae vero particulae massam corporis componentes, eius *Elementa* brevius appellantur.

SCHOLIUM.

12. Nulla ratio hic habetur materiae fluidae, quae in poris corporum latet; ea enim extranea velut est, neque ad compositionem corporis pertinet ullo modo, perinde ac aqua delitescens in poris spongiae, ad substantiam spongiae non refertur.

DEFINITIO VI.

13. *Volumen* corporis est illud spatium, quod materia corporis cum interspersis porulis comprehendit.

DEFINITIO VII.

14. *Vis Inertiae* est principium resistendi, seu renixus, quo corpus unumquodque siue quiescat, siue moveatur resistit mutationi proprii status.

SCHOLIUM.

15. Non semper corpus exerit vim inertiae, sed tunc solum, cum alterius vis actione mutare cogitur proprium statum. Haec autem vis inertiae confundi nequit cum gravitate, per quam conantur corpora accedere ad tellurem; constat enim corpora ob vim inertiae illis etiam viribus reluctari, quae contra actionem gravitatis minime agunt.

gunt. Sic si globum plano horizontali bene levigato incumbentem, vel etiam filo suspensum horizontaliter percutiamus, sentimus aliquam resistentiam ex vi inertiae globi ortam, & quidem eo maiorem, quo maior est massa globi. & quo maiori vi illud percutimus. Idem quoque accidit quando corpus vi gravitatis suae cadens, ictu celeri superne manu percutimus, eiusque motum celeriores reddimus versus terram. Atqui ille motus horizontalis impressus globo, & motus acceleratio secundum ipsam gravitatis actionem non opponitur gravitati; ergo resistentia quam sentimus, non ex vi gravitatis, sed ex materiae inertia ortum ducit.

COROLLARIUM I.

16. Vis inertiae eadem est in corporibus quiescentibus atque in iisdem motis; tam enim resistunt corpora actioni, qua a motu ad quietem reducuntur, quam actioni qua a quiete ad motum concitantur. Nam eadem vis requiritur ad datum motum dato in corpore producendum, atque ad eum penitus extinguendum.

COROLLARIUM II.

17. Quoniam resistentia eo maior est, quo maior (15) est massa corporis quod percutitur; liquet, caeteris paribus, vim inertiae proportionalem esse materiae quantitati.

COROLLARIUM III.

18. Similiter cum resistantia corporum crescat, quo validius (15) percutiuntur; patet, ea maioribus status sui mutationibus magis resistere, quam minoribus, atque adeo vim inertiae, caeteris paribus, proportionalem esse magnitudini mutationis, quae inducitur.

DEFINITIO VIII.

19. Resistentia quam faciunt corpora, alia est *propria*, alia *impropria*. Resistentia *propria* est, quae vim motricem, eiusque effectum minuit, aut elidit; talis est resistentia, quam exerunt duo homines, qui in contrarias partes mutuis conatibus se se urgent. Resistentia *impropria* illa est, quae licet destruat vim motricem, non impedit tamen, quo minus illa effectum suum integrum sortiatur; talis est resistentia, qua percussum corpus obstat alteri percutienti, nam vis seu motus corporis percutientis qui destruitur in impactu, sibi aequalem generat in percusso.

COROLLARIUM I.

20. Itaque vis inertiae est principium resistendi improprie, atque adeo non *activa* est, sed *passiva*, eaque materiae a Deo impressa fuit, ut motus ex uno corpore in aliud transferatur,

Co-

COROLLARIUM II.

21. Quare si corpus A agat in aliud B, eumque ad motum sollicitet, corpus vero B liberum sit, ut in vacuo, & sola vis inertiae in eo sit superanda; necessario movebitur a corpore agente A. Nam corpus A percutere nequit quiescens alterum B, quin (19) deperdat aliquid sui motus; sed motus a percutiente deperditus in impactu, totus transferri assolet (19) in percussum. Igitur necessario movebitur corpus B.

DEFINITIO IX.

22. Quoties corpus unum ab alio sollicitatur, quamdam in se recipit efficaciam, qua aptum redditur dato tempore determinatum spatium percurrendi. Haec efficacia *celeritas*, aut *velocitas* corporis appellatur.

DEFINITIO X.

23. Dum corpus hanc efficaciam in se recipit, eamque (16) ob vim inertiae detinet, ac conservat in suae massae singulis elementis, potentiam novam acquirit, quae dicitur *motus quantitas*, aut simpliciter etiam *motus*. Verbo dicam, *celeritas* est efficacia, quam corpus in se recipit, *quantitas* autem *motus* est eadem efficacia per omnia elementa corporis distributa, atque ab illis contenta.

Co-

COROLLARIUM

24. Quoniam celeritas per omnia elementa corporis distributa nil aliud est, quam celeritas toties repetita, quot sunt in corpore aequalia elementa, hoc est celeritas ducta in massam; patet, quantitatem motus corporis cuiuscumque esse, ut factum ex celeritate in eius massam. Vnde si fuerit massa ut 3, celeritas vero ut 4; motus quantitas erit ut 12.

PROPOSITIO I.

Tab. I.
Fig. 1.

25. *SI fiant rectangula duo CD, VE quorum bases C & V exponant celeritates corporum A & B, altitudines autem D & E referant massas corporum eorundem; quantitas motus corporis A erit ad quantitatem motus corporis B, ut rectangulum CD ad rectangulum VE.*

Quantitas motus corporis A est, ut factum ex massa A ducta in eius (24) celeritatem. Similiter quantitas motus corporis alterius B est, ut factum ex massa B in eius celeritatem. Ergo quantitas motus corporis A est ad illam corporis B, ut factum ex D in C ad factum ex E in V. Sed etiam rectangulum CD est ad rectangulum aliud VE, ut factum ex D in C ad factum ex E in V; ergo quantitas motus corporis

poris A erit ad quantitatem motus corporis B, ut rectangulum CD ad rectangulum VE. Q. E. D.

COROLLARIUM I.

26. Quoniam rectangulum CD est ad aliud VE in ratione composita D ad E, & C ad V; etiam quantitas motus corporis A erit ad quantitatem motus corporis B in ratione composita massae A ad massam B, & celeritatis corporis A ad celeritatem corporis B.

COROLLARIUM II.

27. Similiter si massa A tanto maior fuerit massa B, quanto vicissim mobilis B velocitas maior est velocitate mobilis A, utique erit D ad E, ut reciproce V ad C, ideoque rectangulum CD erit alteri VE aequale. Igitur etiam quantitas motus corporis A aequabitur quantitati motus corporis B.

COROLLARIUM III.

28. Liqueat inde, cur veteres ad muros hostium diruendos arietibus uterentur, recentiores vero id ferreis globis praestent. Quamvis enim arietes velocitato exigua adigerentur, incredibilis tamen erat illorum motus quantitas, & potentia ob materiae maximam quantitatem, qua praediti ipsi erant. Contra autem hodie ad muros hostium diruendos exigui quidem globuli, sed velocitate.

citare maxima a tormento bellico proiiciuntur, ut ita exigua materiae copia a velocitate maxima compensetur.

COROLLARIUM IV.

29. Si aequales sint massae corporum A & B, aequales quoque erunt D & E, ideoque rectangulum CD erit ad VE, ut C ad V. Erunt ergo motuum quantitates, ut celeritates corporum eorundem.

COROLLARIUM V.

30. At si inaequales sint massae corporum A & B, velocitates autem aequantur, aequabuntur quoque C & V, ideoque rectangulum CD ad VE erit, ut D ad E. Erunt ergo motuum quantitates, ut massae corporum A & B.

COROLLARIUM VI.

31. Hinc in machinis illis, quae revolutione rotarum solent pondera elevare, additur plumbum rotae, ut ipsa ob auctam massam, maiorem quoque quantitatem motus acquirat, ob quam melius superentur resistentiae aeris, & frictionis, motusque idcirco diutissime conservetur. Ab eodem principio pendet, quod Lanifices in nendo imponant graves turbines versoriiis fufis, ut inde scilicet rotationes longiori tempore perseverent.

CA-

CAPUT III.

*De variis motus speciebus, ac
praecipue de aequabili.*

DEFINITIO XI.

32. SI velocitas mobilis nec minuitur, nec augetur, sed semper eadem perseverat, eius motus *aequabilis* dici solet; at si velocitas continuo variatur, ipsius motus *inaequabilis* appellatur.

COROLLARIUM.

33. Igitur mobile aequabili motu latum, aequalibus temporibus per aequalia spatia promovetur; at si inaequabili fertur motu, aequalibus temporibus per inaequalia spatia promovebitur.

DEFINITIO XII.

34. Motus inaequabilis est *acceleratus*, cuius velocitas continuo augetur; *retardatus* vero, cuius velocitas continuo diminuitur.

COROLLARIUM.

35. Mobile ergo accelerato motu latum, temporibus aequalibus per maiora spatia continuo promovetur; at si motus fuerit retardatus, eadem spatia continuo fiunt minora.

DE-

DEFINITIO XIII,

36. *Motus uniformiter acceleratus est, si mobile aequalibus temporibus aequalia adquirat incrementa velocitatis; uniformiter autem retardatus est, si aequalibus temporibus patiatur mobile decrements aequalia celeritatis.*

SCHOLION.

37. *Motus aequabilis vix, aut ne vix quidem in corporibus reperitur; nam caelestium corporum motus modo celerior, modo tardior esse solet. Similiter motus gravium descendentium acceleratus est, & contra, ascendentium retardatus. Eiusdem quoque generis motus est, qui aliis corporibus communicatur, ille enim ob resistenciam aeris superandam, ob gravitatis nisum deorsum, atque ob scabritiem plani super quo incedit corpus, sensim imminui, languescere, ac destrui tandem solet.*

PROPOSITIO II.

38. *Motus inaequabilis utcumque acceleratus, aut retardatus, si finitus sit, seu si mobile tempore finito percurrat finitum spatium; tempore infinitesimo, perque spatium infinite parvum pro aequabili sumi potest.*

Cum

Cum motus inaequabilis (*ex hyp.*) sit finitus, eius acceleratio aut retardatio tempore infinitesimo, perque spatium infinite parvum infinite parva erit respectu finiti motus quem corpus habet; hoc siquidem nisi esset, acceleratio aut retardatio tempore infinitesimo finita esset, ac proinde finito tempore infinita, atque ita motus corporis foret, contra hypothesim, infinitus. Sed quantitas infinitesima sine errore assignabili negligi tuto potest respectu quantitatis finitae; ergo tempore infinitesimo, perque spatium infinite parvum motus finitus utcumque acceleratus aut retardatus haberi potest pro motu, cuius celeritas neque augetur, neque minuitur, hoc est pro motu (32) aequabili sumi potest. Q. E. D.

COROLLARIUM I.

39. Quoniam finitus motus utcumque acceleratus aut retardatus tempore infinitesimo pro aequabili sumi potest; consequens est, ut omnis mutatio motus in motu inaequabili, & finito in singulis temporum infinitesimorum initiis fieri concipienda sit.

COROLLARIUM II.

40. Colligi ex his potest, quod licet motus aequabilis vix, aut nullo modo in rerum natura (37) sit, nihilo tamen minus cum motus quilibet inaequabilis, & finitus tempore infinitesimo pro aequabili sumi (38) queat,

queat, cognitio proprietatum, & symptoma-
tum motus aequabilis conferre plurimum de-
bet ad alias motus species explicandas.

P R O P O S I T I O III.

41. **D***Vorum mobilium motu aequabili pro-
gredientium velocitates sunt, ut spa-
tia aequalibus temporibus absoluta.*

Tab. I. Corpora A & B aequabiliter moveantur,
Fig. 2. dumque corpus A percurrit aliquod spatium
S, reliquum corpus B conficiat aliud L: di-
co, velocitatem corporis A esse ad velocita-
tem corporis B, ut spatium S ad spatium
L. Si enim spatium S aequale esset spatio
L, etiam corporis A velocitas aequalis (22)
foret velocitati alterius B. Si vero spatium S
duplo maius foret spatio L, etiam corporis A
velocitas dupla (22) esset velocitatis alterius
B. Rursus si spatium S triplum foret spatii
alterius L, etiam corporis A velocitas tripla
(22) esset velocitatis alterius B, & sic por-
ro. Velocitates ergo augeri solent ut spatia,
quae equali tempore a mobilibus sunt percur-
sa, atque adeo, ut eadem spatia erunt. Q.E.D.

C O R O L L A R I U M I.

42. Notis spatiis duorum mobilium A &
B motu aequabili progredientium, etiam ce-
leritatum ratio palam fiet. Ita si corpus A
tempore unius minuti describat spatium S
pe-

pedum 100, & corpus B pari tempore absolvat spatium L pedum 50, velocitas mobilis A erit ad velocitatem mobilis B, ut 100 ad 50, five ut 2 ad 1.

COROLLARIUM II.

43. Si celeritates corporum A & B motu æquabili progredientium proportionales sint ^{Tab. I.} ^{Fig. 2.} spatiis S & L; hæc pari tempore absolventur. Nam si spatium S maiori tempore abolveretur quam reliquum spatium L, utique pars aliqua spatii S percursa esset eodem tempore, quo describitur integrum spatium L. Vnde mobilis A velocitas esset ad velocitatem mobilis B, ut pars illa spatii S ad spatium (41) totum L; sed velocitas mobilis A est (*ex hyp.*) ad velocitatem mobilis B, ut totum spatium S ad integrum spatium L. Ergo etiam pars spatii S esset ad spatium L, ut integrum spatium S ad spatium idem L, quod est absurdum. Spatia itaque S & L æquali prorsus tempore percurrentur.

PROPOSITIO IV.

44. **D***Vorum mobilium eadem velocitate motu æquabili progredientium spatia sunt, ut tempora quibus absolvi solent.*

Corpora A & B æquabiliter moveantur, ^{Tab. I.}
& corpus A percurrat spatium S tempore ^{Fig. 3.}
B T, ac

T, ac corpus **B** describat spatium **L** tempore alio **H**: dico, spatium **S** fore ad spatium **L**, ut tempus **T** ad tempus **H**. Cum enim (*ex hyp.*) aequae velocitiae sint corpora **A** & **B**, utique temporibus aequalibus debent (22) per spatia aequalia promoveri. Ergo si tempus **T** a corpore **A** insumptum aequale esset tempori **H**, etiam spatium **S** aequale esset alteri spatio **L**. Si vero tempus **T** duplo maius foret tempore alio **H**, etiam spatium **S** duplo maius esset spatio alio **L**. Similiter si tempus **T** triplum foret temporis **H**, etiam spatium **S** triplum esset spatii **L**, & sic porro. Itaque crescunt spatia ut tempora in iis percurrendis insumpta, atque adeo erunt in directa temporum ratione. Q. E. D.

C O R O L L A R I U M.

45. Hinc navis super mare aequabili vento incedens, si hora una percurrit milliaria duo, quatuor milliaria absolvet duabus horis, & octo milliaria percurreret quatuor horis.

P R O P O S I T I O V.

46. **D***Vorum mobilium motu aequabili progredientium spatia sunt in ratione composita celeritatum, ac temporum.*

Tab. I. Corpora **A** & **B** aequabiliter moveantur,
Fig. 4. & corpus **A** velocitate **C** latum percurrat spatium **S** tempore **T**, ac corpus **B** veloci-

ci-

citare V motum absolvat spatium L tempore alio H : dico, spatium S fore ad spatium L in ratione composita celeritatis C ad celeritatem V , & temporis T ad tempus H . Finge enim tertium corpus F , quod celeritate V latum percurrat tempore T spatium D . Cum tempore eodem T moveantur corpora A & F , spatium S erit (41) ad spatium D , ut velocitas C ad velocitatem V . Similiter cum aequae velocitae sint corpora F & B , spatium D erit (44) ad spatium L , ut tempus T ad tempus H . Cum igitur sit S ad D , ut C ad V , & D ad L , ut T ad H , ratio composita ex ratione S ad D , & ex ratione D ad L , eadem erit ac ratio quae componitur ex ratione C ad V , atque ex ratione T ad H . Sed ratio S ad L componitur ex ratione S ad D , atque ex ratione D ad L ; ergo componetur etiam ex ratione C ad V , atque ex ratione T ad H . Q. E. D.

COROLLARIUM I.

47. Si rectis velocitates, atque tempora Tab. 1.
exponentibus fiant rectangula duo CT , VH ; Fig. 5.
haec erunt ut spatia S & L descripta a mobilibus A & B . Nam etiam ratio rectanguli CT ad rectangulum VH composita est ex ratione celeritatum C & V , atque temporum T & H .

COROLLARIUM II.

Tab. I. 48. Hinc ratio temporum T & H , qui-
 Fig. 5. bus moventur corpora A & B , composita
 est ex ratione directa spatiorum S & L ,
 atque ex ratione inversa celeritatum C & V .
 Quippe si rectis C & H , quarum altera
 exponit celeritatem mobilis A , altera tempus
 quo movetur mobile B , fiat rectangulum tertium
 CH , ratio CT ad CH , sive ratio T ad H ,
 composita erit ex ratione CT ad VH , &
 ex ratione VH ad CH . Sed prima ratio
 eadem est (47) ac ratio S ad L , secunda
 vero eadem ac ratio V ad C ; ergo ratio
 T ad H composita est ex ratione directa
 spatii S ad spatium L , atque ex ratione in-
 versa celeritatis C ad celeritatem V .

COROLLARIUM III.

Tab. I. 49. Similiter ratio celeritatum C & V
 Fig. 6. composita est ex ratione directa spatiorum
 S & L , atque inversa temporum T & H .
 Si enim rectis T & V , quarum altera exponit
 tempus mobilis A , altera velocitatem mobilis
 B , fiat rectangulum tertium VT , ratio CT
 ad VT , seu ratio C ad V composita erit
 ex ratione CT ad VH , atque ex ratione
 VH ad VT . Sed prima ratio eadem (47)
 est ac ratio S ad L , secunda vero eadem
 ac ratio H ad T ; ergo ratio C ad V com-
 posita erit ex directa ratione spatii S ad spa-
 tium L , atque ex inversa temporis T ad
 tempus H . Co-

COROLLARIUM. IV.

50. Dividendum itaque erit spatium per tempus ad determinandam velocitatem corporis uniformem. Siquidem si ratio velocitatum componeretur ex directa ratione temporum, & spatiorum, utique velocitas haberetur multiplicando spatium per tempus. At cum velocitatis ratio componatur (49) ex directa spatiorum, atque inversa temporum ratione, velocitas corporis inversâ methodo invenietur, dividendo nempe spatium per tempus. Ita si fuerint binæ naves æquabili vento impulsæ, & prima conficiat milliaria 45 tribus horis, altera 10. milliaria horis duabus; velocitas primæ erit ad secundæ velocitatem, ut 15 ad 5, scilicet prima navis triplo velocior erit altera. Nam 45 divisum per 3 dat pro quoto 15; & 10 divisum per 2 dat pro quoto 5.

S C H O L I O N.

51. Et sane, quoniam prima navis tribus horis absolvit milliaria 45, utique (44) una hora percurrat milliaria 15. Similiter quia navis altera absolvit duabus horis milliaria 10, consequens est, ut hora una (44) percurrat milliaria 5. Cum itaque prima navis absolvat una hora milliaria 15, altera vero eodem tempore percurrat milliaria 5; utique (41) velocitas primæ ad velocitatem secundæ erit, ut 15 ad 5, sive ut 3 ad 1.

B 3

Ita.

Itaque prima navis triplo velocior erit altera.

C A P V T IV.

De variis virium speciebus.

D E F I N I T I O XIV.

52. *V*is impressa est actio in corpus exercita ad mutandum statum quiescendi, vel movendi uniformiter in directum.

S C H O L I O N.

53. Consistit haec vis in actione sola, neque post actionem amplius inest corpori. Cessante autem actione qua status corporis mutatus est, corpus in novo statu per illam actionem recepto perseverat ob solam vim inertiae, qua fit, ut sine nova actione in ipsum exercita mutare nequeat proprium statum.

D E F I N I T I O XV.

54. *V*is activa quae etiam vis motrix dicitur, est principium, unde motus, vel tendentia ad motum nascitur.

S C H O L I O N.

55. Corpus absolute quiescens, omnique
co-

conatu se movendi destitutum, activam vim nullam habet, sed tantum vi passiva seu vi inertiae praeditum est, per quam vi motrici in ipsum agenti resistit.

DEFINITIO XVI.

56. Corporum vis activa dividi solet in *mortuam*, atque *vivam*. Vis *mortua* est nisus, vel conatus, aut sollicitatio ad motum, ex qua motus actualis seu finitus non producit, nisi illius vis actio per tempus finitum fuerit continuata. Vis *viva* est illa, quae motum actualem generat, seu quae cum motu actuali vel finito coniuncta est, qualis reperitur in corpore gravi, quod cum velocitate finita ex altitudine data cadit.

COROLLARIUM.

57. Vis igitur gravitatis in corpore, quod ex filo pendet, vel horizontali incumbit plano, *mortua* erit; illa enim corpus actu non movetur, sed sollicitatur ad motum, filumque tendit, aut planum premit. Quod si filum abrumpatur, vel planum sustinens auferatur, tunc continua gravitatis actione corpus accelerato motu descendit, & vim *vivam* acquirit. Vis ergo mortua gravitatis ad motum corpus sollicitat, singulisque temporibus infinitesimis in ipso generat elementum celeritatis, sive celeritatem infinite parvam, ac proinde finito tempore finitam velocitatem

DEFINITIO XVII.

58. Si vis mortua corpus ad motum sollicitans, corpori illi insit, aut ipsum ita comitetur, ut in illud iam motum eodem modo agat ac si quiesceret; tunc aut vis illa eadem continue manet, diciturque *vis constans*, aut continue variatur crescendo vel decrecendo, & *variabilis* appellatur.

DEFINITIO XVIII.

Tab. I.
Fig. 7.
S. 9. &
Tab. II.
Fig. 1.

59. Si recta AG exponat tempus quo aliquod corpus vi mortua continuo sollicitatum movetur, & tempus illud AG divisum intelligatur in partes aequales infinitesimas AB, BC, CD &c., atque ad divisionum puncta erigantur perpendiculares AH, BK, CL &c., quae singulae exponant vim mortuam, qua corpus in singulis punctis temporis sollicitatur; Linea HMP transiens per puncta H, K, L &c., *Linea virium* dici solet.

COROLLARIUM I.

60. Si vis ergo fuerit constans, linea virium recta erit. Nam cum rectae AH, BK, CL &c. sint aequales, & parallelae, utique terminabuntur recta HP, ipsi AG parallela.

COROLLARIUM II.

61. Linea quoque virium recta erit, si vis variabilis sit huiusmodi, ut tempusculis

lis singulis aequaliter crescat, aut minuat. Nam ductis HV , KI , ipsi AG parallelis, utique rectae VK , IL quae exponunt virium incrementa aut decrementa tempusculis AB , BC , aequales invicem erunt. Igitur cum aequentur quoque HV , KI , & recti anguli V & I , aequalia etiam erunt triangu-
 VHK , IKL , ideoque angulus VKH aequa-
bitur ILK . Itaque duo simul anguli VKH ,
 VKL aequantur duobus simul ILK , VKL ;
sed hi duo anguli aequantur duobus rectis
propter parallelas BK , CL . Ergo duobus
rectis aequabuntur quoque anguli VKH ,
 VKL , ideoque rectae HK , KL erunt posi-
tae in directum. Eodem modo constabit,
rectas KL , LM , MN &c. esse positas in
directum; ergo recta erit linea virium HMP .

COROLLARIUM III.

62. At si vis variabilis iuxta aliam legem
continue crescat, aut minuat, linea vi-
rium curva erit. Etenim cum rectae HK ,
 KL , LM &c. non sint positae in directum,
polygonum efformabunt ex infinitis, atque
infinite parvis lateribus rectis constans, quod
pro curva linea sumi potest.

Tab. II.
Fig. 1.

L E M M A I.

63. *SI in axe AO curvae cuilibet ASR ca-*
piatur FG infinite parva respectu ab-
scissae AG , ordinenturque GP , FS ; hae duae
rectae pro aequalibus sumi possunt.

Tab. II.
Fig. 2.

Du-

Ducatur ST recta, axi AO parallela. Quoniam curva ASP spectari potest velut polygonum ex infinitis, atque infinite parvis lateribus rectis constans, utique arcus infinite parvus SP ex his lateribus unum erit; igitur hoc producto usque dum conveniat cum axe AO in H , prodibunt similia triangula SPT , HPG . Igitur TP ad GP erit, ut ST ad HG , sive ut FG ad HG . Sed cum FG (*ex hyp.*) infinite parva sit respectu AG , multo magis infinite parva erit respectu HG ; ergo etiam TP infinitesima esse debet relate ad GP . Sed quantitas infinite parva sine errore negligi tuto potest respectu quantitatis finitae, cuiusmodi est GP ; ergo rectae GP , GT , sive GP , FS pro aequalibus sumi possunt. Q. E. D.

C O R O L L A R I U M.

Tab. II.
Fig. 1.

64. Hinc vis variabilis agens tempore infinitesimo haberi poterit pro constanti. Cum enim in virium linea HMP recta finita AE divisa (59) sit in infinitas aequales partes, utique illarum una DE infinite parva erit respectu AE . Igitur ordinatae DM , EN , seu vires sollicitantes in punctis D & E tempusculi DE possunt pro aequalibus (63) usurpari, ideoque tempusculo infinitesimo DE vis variabilis DM spectari poterit velut constans.

D E F I N I T I O XIX.

Tab. II.
Fig. 3-4

65. Si recta AG exponat tempus in partes aequales infinitesimas divisum, atque perpendiculari

pendiculares BH, CK, DL &c. referant velocitates temporibus correspondentibus AB, AC, AD &c. acquisitas a mobili vi quadam sollicitato; linea AHP transiens per puncta A, H, K &c., vocatur *linea velocitatum*.

C A P V T V.

De motus Legibus Newtonianis.

DEFINITIO XX.

66. **L**eges motus sunt illae, quas Deus voluit, ut servarent corpora dum moventur. Vocantur etiam *Naturae Leges*; nam saepe *Naturae* nomine non ipse naturae Auctor intelligitur, sed vasta haec machina universi, quae condita a Deo est.

L E X I.

67. **C**orpus omne perseverat in statu quietis, vel se movendi uniformiter in directum, nisi quatenus a viribus impressis cogitur statum illum mutare.

Ob vim inertiae qua praeditum corpus est, fit ut dum quiescit, obstat vi motrici conanti sibi inducere statum motus, & dum movetur, resistat vi impressae, statum quietis ipsi inducere satagenti. Inest ergo corpori haec proprietas, ut statum suum quietis,

tis, vel motus perpetuo tueatur. Igitur si quiescit, a quiete numquam cessabit, & si movetur, a motu numquam desistet, si nulla circumstantium corporum fuerit resistentia. Propter eandem pariter vim inertiae corpus semel motum debet semper progredi uniformiter. Vt enim eius motus acceleretur, aut retardetur, nova vis adveniat opus est, quae proficiat illi motui, aut officiat, quam tamen ponimus non adesse. Idem corpus denique semel motum, semper promovebitur in directum. Cum enim corpori semel moto vis nova alia non accedat, nullumque obstaculum actu in illud agat, utique nulla ratio esse potest, quare in hanc potius quam in aliam regionem a recta linea declinaret. Ergo debebit progredi in directum.

S C H O L I O N.

68. Quod si motus corporum proiectorum, aut super plana horizontalia incedentium sensim languescere, & tandem destrui videatur, id sane tum ipsorum ponderi tribuendum, tum etiam aeris resistentiae, asperitati planorum, aliisque causis, quae paulatim motum minuunt, & extinguunt. Hinc corpora ponderosiora super glaciem, aliasque superficies levigatas, seu minus scabras, & ideo minus motui obistentes, ad quietem segnius reducuntur, & Planetæ omnes in spatiis caelestibus ubi in nullam ferme inci-

cidunt resistantiam, motus suos progressivos circulares diutissime retineant, & conservant.

COROLLARIUM I.

69. Si ergo corpus in curva linea moveatur, duplici vi urgebitur, altera nempe qua progredieretur iuxta lineam rectam, altera vero qua in singulis punctis curvae a motu rectilineo detorquetur. Simili modo si motus corporis acceleratur, aut retardatur, necesse est, ut ultra eam vim quae in illo produxit motum, aliqua alia vis aut obstaculum actu in illud agat.

COROLLARIUM II.

70. Cum linea quaevis curva spectari queat Tab. II.
Fig. 5. velut polygonum ex infinitis atque infinite parvis lateribus rectis constans, utique si corpus incedat in curva aliqua MACL, in quolibet curvae puncto A ferri debet iuxta directionem lateris infinitesimi AB, ideoque si sibi relinqueretur, neque altera vis in extremitate B huius rectae AB illud retraheret, inflecteretque in curvam BC, ferretur perpetuo, atque aequabiliter per rectam AB productam, & proinde cum recta AB producta, sit ipsa curvae tangens AD, uniformiter progredieretur per tangentem in puncto A. Omne ergo corpus quod in linea curva incedit, in quolibet curvae puncto tendit ad motum continuandum per rectam, quae curvam tangit in illo puncto.

Co-

COROLLARIUM III.

71. Ratio reddi potest ex hac lege, cur si vas aquam continens, in plano horizontali æquabiliter moveatur, sub initio motus aqua in vase versus partes motui vasis contrarias tendere videatur. Etenim aqua in eodem statu quietis perseverare conatur, ideoque non statim vasis motui obsecundat, videturque idcirco vasis parietes quasi deserere, & locum proprium immutare. At motu vasis tandem impresso aquae, haec uniformiter, & eadem velocitate cum vase progredi comperitur. Si autem sistatur subito motus vasis, nihilominus aqua in eodem statu motus, conabitur permanere, ideoque ad vasis latera assurgere apparebit. Ex eodem principio etiam pendet, quod homines in navi turbulento mari iactata, doloribus, aegritudine, atque etiam vomitu afficiantur. Etenim cum liquores in ventriculo, intestinis, vasisque sanguiferis, caeterisque canalibus contenti, navis iactationi illico non obediunt, turbatur sane fluidorum motus humano in corpore, gravissimaque incommoda oriuntur.

L E X II.

72. *M*otus proportionalis est vi motrici impressae, & fit secundum lineam rectam, qua vis illa imprimitur.

Omnis

Omnis mutatio, quam corpus in motu subit, vel pendere debet ab ipso corpore, vel a vi impressa; sed derivare nequit ab ipso corpore, quod quantum in se est constanter (67) retinet proprium statum. Consequens ergo est, ut unice pendeat a vi impressa. Si itaque vis impressa sit constans, sive eodem modo semper in corpus agens, praetereaque datum sit tempus quo ipsa agit, tunc eadem vis impressa pro causa haberi potest, atque mutatio motus pro eiusdem effectu pleno, & adaequato; sed effectus plenus, & adaequatus proportionalis est suae causae. Ergo & mutatio motus proportionalis est vi motrici impressae. Quod si tempus non sit datum, tunc mutatio motus proportionalis est vi motrici constanti ductae in tempus quo agit; nam eadem vis eodem modo agens, tempore duplo duplum effectum generat, tempore triplo triplum. Demum si vis motrix fuerit variabilis, tunc mutatio motus proportionalis est vi motrici impressae ductae in tempus infinitesimum, quo nempe veluti constans (64) haberi potest. Caeterum sicuti vis motrix impressa gignit, aut mutat motum in corpore, ita directio vis impressae directionem motus, vel mutationis motus constituit, estque directio motus, vel mutationis motus eadem prorsus cum directione vis motricis; nulla enim ratio esse potest, cur mutatio illa fiat secundum directionem a directione vis impressae diversam.

Co-

COROLLARIUM I.

73. Igitur si vis motrix fuerit constans, eius mensura erit quantitas motus, quam dato tempore uniformiter agens generat; nam quantitas illa motus est (72) illius effectus plenus, & adaequatus.

COROLLARIUM II.

74. Mensura itaque vis motricis constantis est factum ex massa mobilis in celeritatem, quae ipsi (24) imprimitur dato tempore.

COROLLARIUM III.

75. Manente itaque massa corporis, vis motricis constantis mensura est celeritas genita dato tempore, aut etiam (41) spatium, quod cum ea celeritate absolveret aequabiliter dato tempore.

COROLLARIUM IV.

76. Quoniam si tempus non sit datum, mutatio motus est, ut vis motrix constans ducta (72) in tempus quo agit; eadem vis motrix exponi potest per quotum, qui prodit ex divisione quantitatis genitae motus per tempus quo generatur.

COROLLARIUM V.

77. Quia si vis motrix fuerit variabilis, mutatio motus proportionalis est vi motrici in infinitesimum tempus (72) ductae; vis
etiam

etiam variabilis exponi potest per quatum, qui prodit ex divisione motus geniti per tempus infinitesimum, quo producitur.

COROLLARIUM VI.

78. Hinc vires constantes, quæ duo cor- Tab. I.
Fig. 1.
pora ita impellunt, ut aequalibus temporibus æquales celeritates illis communicent, sunt ut massæ corporum eorundem. Fiant rectangula duo DC, EV, quorum bases C & V exponant celeritates corporum A & B, altitudines autem D & E referant eorum massas. Cum vires constantes proportionales sint (73) motuum quantitatis eodem tempore generatis, vis sollicitans corpus A erit ad vim sollicitantem corpus B, ut motus quantitas corporis A ad motus quantitatem corporis B, sive (25) ut rectangulum DC ad rectangulum EV. Sed cum velocitates C & V eodem tempore genitæ (ex hyp.) sint æquales, rectangulum DC est ad rectangulum EV, ut D ad E; ergo etiam vis sollicitans corpus A erit ad vim sollicitantem corpus B, ut D ad E, sive ut massa corporis A ad massam corporis B.

L E X III.

79. **A**ctioni æqualis, & contraria est reactio, hoc est per actionem & reactionem æquales motus mutationes in corporibus in se invicem agentibus producuntur, quæ mutationes versus contrarias partes diriguntur.

C

Dum

Dum corpus unum in aliud quiescens agit, eius vis eo tendit, ut illius superet resistentiam. Non igitur vim omnem infumit corpus agens, sed solummodo eam partem, quae necessaria est ad superandam patientis corporis resistentiam. Ea pars vis quam infumit, vocatur *actio*, & resistentia quam corpus patiens exerit, *reactio* dici solet. Sed vi amissae ab agente corpore aequalis est, & contraria patientis corporis resistentia. Ergo actioni aequalis, & contraria semper est reactio.

S C H O L I O N.

80. Perperam aliqui ex aequalitate actionis, & reactionis nullum motum oriri posse contendunt; ut enim quiescant corpora quae in se agunt, non solum operae pretium est, ut actiones aequentur, sed ut etiam vires ab illis adhibitae sint aequales. Tunc nempe quiescunt, cum vires aequales habent, adhibentque vim omnem quam possident; siquidem in hoc casu cum nihil eis supersit virium, nullus motus exoriretur. At si vis corporis agentis maior sit patientis corporis resistentia, necessario movebitur corpus patiens. Ita si equus lapidem funi alligatum trahit, etiam equus vicissim a lapide retrahetur, & actio equi in lapidem aequabitur reactioni lapidis in equum. Verum quia vis tota equi maior est tota lapidis resistentia, equus vi aliqua post se-

peratam lapidis resistentiam lapidem ipsum trahet.

COROLLARIUM.

81. Hinc novimus qua ratione navigia remis aguntur, animalia natant, avesque in aere promoventur. Dum navigium agitur remis, aqua per remorum palmulas retro pulsa, in remos aequaliter reagit, eosque promovet cum navigio, cui adfixi sunt; nisi enim aqua in navigii remos reageret, nullus navigio motus imprimeretur. Similiter cum nihil aliud sit natatio, quam brachiorum, pedumque remigium, facile intelligimus cur intra aquam animalia omnia promoventur. Idem de volatu avium est dicendum; hae siquidem alis suis aerem deorsum feriunt, & aer reagens, eas sursum elevat. Si versus ortum aerem pellant aves, reactio contraria aeris ipsas in occasum abire cogit.

CAPUT VI.

De motu composito.

DEFINITIO XXI.

82. **M**otus simplex ille est, qui ex vi unica, aut pluribus viribus in eandem directionem agentibus, vel etiam inter se oppositis ortum habet.

D E F I N I T I O XXII.

83. *Motus compositus* ille est, qui ex pluribus viribus iuxta varias directiones in idem corpus agentibus derivatur.

A X I O M A I.

84. Vires aequales, & contrariae in idem corpus agentes, mutuum effectum tollunt.

S C H O L I O N.

Tab. II.
Fig. 6.

85. Ita si vis quaequam expressa recta BA, urgeat corpus M versus L, & contra vis altera primae aequalis, atque exposita per LA, illud sollicitet versus B; quiescet utrique corpus M. Nulla siquidem ratio est, cur mobile uni potius, quam alteri virium obsecundet.

A X I O M A II.

86. Motus a viribus conspirantibus, hoc est secundum eandem directionem agentibus generatus, aequipollet ipsarum summae.

S C H O L I O N.

Tab. II.
Fig. 6.

87. Ita si duae vires LO, OA agant simul in corpus M secundum eandem directionem LA, illudque urgeant versus B; movebitur quidem corpus vi quae exponitur recta LA, quae est summa virium LO, OA.

Axiom-

Axioma III.

88. Motus a viribus inaequalibus, & contrariis in idem corpus agentibus generatus, aequipollens est earundem virium differentiae.

S C H O L I O N.

89. Ita si vis BA urgeat corpus M versus L, & contra, altera vis OA minor priore ipsum sollicitet versus B; utique sumpta AS aequali AO, corpus movebitur virium differentia BS. Nam vis BA valet (85) summam virium BS SA; sed vis SA destruitur (84) ab aequali, atque opposita vi OA. Ergo corpus M movebitur versus L superflite vi BS.

Tab. II.
Fig. 6,

P R O P O S I T I O VI

90. *SI quodlibet corpus A urgeatur viribus N & M, quarum altera agat iuxta AC, alia iuxta AB, vires autem subito agant, statimque deferant corpus; promovebitur mobile per AF, mediam scilicet inter AC, AB.*

Tab. II.
Fig. 7.

Si actio sola vis N concitaret ad motum mobile A, hoc sane (67) pergeret per AC; tenderet autem in recta AB, si in ipsum ageret vis sola M. Cum vero eodem tempore urgeatur corpus binis viribus N & M, utique ferri debet nec per AC, nec per AB, sed directionem mediam AF acquireret, ut ita utrique virium obsecundet. Q. E. D.

C 3

Co-

COROLLARIUM I.

91. Directio media AE linea recta erit. Cum enim vires subito agant, statimque deferant corpus; hoc absque dubio (67) directionem quam initio habuit, retinebit, ideoque in recta linea promovebitur.

COROLLARIUM II.

92. Aequabilis quoque erit motus corporis iuxta AE . Nam propter vires N & M , quae subito agunt, statimque deferunt corpus, nulla alia mobili vis accedit, quae profit illi motui, vel officiat. Ergo (67) promovebitur aequabiliter iuxta AE .

PROPOSITIO VII.

Tab II. 93. **C**orpus A impulsus vi quappiam M iuxta AB , parallelam scilicet ad CF , vis illius actione neque accedet ad CF , neque removebitur ab eadem.

Per secundam Newtoni legem omne corpus semper moveri pergit in illa recta, iuxta quam impellitur a vi motrice; sed corpus A vi M impellitur (*ex hyp.*) iuxta AB . Igitur semper debet tendere iuxta AB , quae cum sit parallela ipsi CF , utique vis M actione neque accedet mobile ad CF rectam, neque removebitur ab eadem. Q. E. D.

Co-

COROLLARIUM I.

94. Si vires itaque N & M secundum rectas AC , AB subito agant, statimque deferant corpus A ; hoc aequè velocius accedet ad CF rectam ac si vis altera M abesset. Cum enim mobile ob vim M (93) neque ad CF accedat, neque ab illa removeatur, utrique accessus mobilis ad CF proveniens ex vi N , nec augeri debet, nec minui a vi M . Ergo aequè velocius accedet mobile ad CF ac si vis altera M abesset.

Tab. II.
Fig. 8.

COROLLARIUM II.

95. Ducta pariter BF recta, parallela scilicet ad AC , liquet (94) mobile A iunctis viribus N & M aequè velocius accedere ad BF rectam ac si vis altera N abesset. Igitur mobile idem A aequè velocius accedet ad rectas CF , BF sive iunctae sint vires N & M , sive ipsae sint mutuo separatae.

Tab. II.
Fig. 8.

PROPOSITIO VIII.

96. **S**I binae vires N & M secundum rectas AC , AB subito agant, statimque deferant corpus, tales autem sunt illae vires, ut vi sola N absolvat mobile aequabiliter AC rectam eodem tempore, quo vi altera sola M absolveret rectam AB ; facto parallelogrammo $ACFB$, mobile idem A motu composito describet aequabiliter diagonalem AF eodem tempore illo,

Tab. II.
Fig. 8.

illo, quo viribus separatis absolvetur scorsim latera AC, AB.

Vocetur T tempus illud, quod insumeret corpus A dum viribus separatis absolvetur rectas AC , AB . Hoc posito, si sola vis N impelleret corpus A , hoc sane post tempus T attingeret (*ex hyp.*) CF rectam. Si pariter vis M sola ageret in corpus A , hoc utique post tempus T perveniret (*ex hyp.*) ad BF rectam; sed mobile A aequè velocius (95) accedit ad rectas CF , BF siue iunctae sint vires N & M , siue sint ipsae invicem separatae. Ergo dum hae vires coniunctim agunt, corpus A post tempus T attinget simul rectas CF , BF , hoc est reperietur in puncto F , quod commune est utrique rectae, ideoque (91) tempore T diagonalem AF describet, & quidem motu (92) aequabili, ac uniformi. Q. E. D.

COROLLARIUM I.

97. Cum mobile A iunctis viribus N & M absolvat aequabiliter diagonalem AF eodem tempore illo, quo viribus separatis percurrit uniformiter latera AC , AB ; vis composita erit (75) ad summam virium componentium, ut diagonalis AF ad summam laterum AC , AB .

COROLLARIUM II.

98. Quoniam vires sunt ut motus (73) ab iisdem geniti dato tempore; etiam motus

tus

tus compositus erit ad summam motuum componentium, ut diagonalis AF est (97) ad summam laterum AC, AB, sive BF, AB.

COROLLARIUM III.

99. In triangulo autem ABF latus unum AF minus est summa reliquorum BF, AB. Ergo & motus compositus minor erit summa motuum componentium; unde in motu composito absoluti motus quantitas diminitur.

COROLLARIUM IV.

100. Quia mobile A eodem modo moveri solet, sive urgeatur duobus motibus AC, AB, sive unico (96) motu AF; motus duo laterales AC, AB aequipollebunt motui uni AF.

COROLLARIUM V.

101. Quemadmodum bini motus AC, AB componunt (96) tertium motum AF, ita vicissim quilibet motus AF resolvetur in duos AC, AB, si supra AF rectam velut diagonalem fiat parallelogrammum CABF.

PROPOSITIO IX.

102. **S**i in parallelogrammo ABFC componentes motus AB, AC, nec non compositus per AF reducantur ad communem directionem quampiam AD; summa motuum componentium composito motui est aequalis. Tab. II.
Fig. 9.

Su-

Supra rectas AB , AF , AC velut diagonales fiant rectangula $AOBE$, $AKFD$, $ALCI$. Quia in parallelogrammo $ABFC$ sunt parallelæ BF , AC , angulus BFA aequabitur FAC ; sed propter parallelas KF , AD , angulus KFA aequatur alteri FAD . Ergo & reliquus BFH aequalis erit reliquo DAC , aut sibi alterno ACL . Verum in triangulis HBF , LAC sunt quoque æquales tum recti anguli H & L , tum etiam rectæ BF , AC ; ergo æquales quoque erunt BH , AL , sive OK , AL . Porro in parallelogrammis $AOBE$, $ALCI$ quatuor motus AO , AE , AL , AI , sive tres tantum AK , AE , AI (ob destructionem æqualium, atque oppositorum motuum AL , KO) æquivalent binis AB , AC , sive (100) uni AF ; sed etiam in parallelogrammo $AKFD$ bini motus AK , AD æquipollent ipsi AF . Ergo tres motus AK , AE , AI æquivalent binis AK , AD , atque adeo duo AE , AI æquipollentes erunt, imo æquales potius uni AD . Q. E. D.

S C H O L I O N.

103. Caeterum AD rectam valere summam binarum AE , AI , ex Geometria etiam liquet. Ex puncto enim C agatur CP , ipsi AD parallela, quæ occurrat rectæ ED in P . Constet BH rectam (102) æquari AL , aut DP ; unde additis utrinque æqualibus HE , FD , erit BE ipsi FP æqualis. Iam vero in parallelogrammo $ABFC$ æqualia sunt latera AB , CF ,

Tab. II.
Fig. 9.

CF, ideoque æquabuntur quoque eorum quadrata. Sed quadratum AB valet quadrata simul BE, EA, atque CF quadratum valet simul quadrata FP, PC; ergo duo quadrata BE, EA æqualia erunt quadratis FP, PC. Verum BE quadratum æquale est quadrato FP; ergo & EA quadratum æquabitur PC quadrato, atque ita æquales erunt EA, PC sive EA, DI, & addita utrinque AI, summa rectarum AE, AI æquabitur rectæ AD.

COROLLARIUM.

104. Ergo in motu composito quantitas motus relate ad datam aliquam directionem (102) constanter eadem perseverat.

CAPUT VII.

De motu accelerato, & retardato.

PROPOSITIO X.

105. **S**I corpus vi aliqua constante continue urgeatur; eiusdem motus erit uniformiter acceleratus. Si vero in corpus iam motum continue agat secundum directionem contrariam directioni motus illius; motus erit uniformiter retardatus.

I. Tempus quo vis constans ad motum corpus impellit, divisum intelligatur in æquales particulas valde exiguas, atque vis actio pri-

prima temporis particula in corpus agat. Si iam elapso primo tempore vis actio cessaret, nihilominus corpus servaret motum ex primo impulsu acceptum, atque aequabiliter (67) deferretur. Ac quoniam vis indefinenter in corpus agit, secunda quoque particula eadem vis alium impulsu priori aequalem corpori communicaret, ac proinde eius velocitas post duos impulsus prioris velocitatis (74) dupla erit. Rursus si vis omnino tolli fingatur, corpus tamen in eadem recta cum eadem velocitate moveri (67) perget. Cum vero & tertia temporis particula corpus eadem vis actione sollicitetur, alium quoque motum utrivis priorum aequalem, elapso tertio tempore obtinebit, atque ita eius velocitas post tres impulsus prioris velocitatis tripla erit, & sic deinceps. Itaque corpus aequalibus temporibus aequalia accipiet velocitatis incrementa, atque adeo eius motus erit uniformiter (36) acceleratus.

II. Similiter demonstrabitur motus uniformiter retardari, si vis agentis directio directioni corporis adversetur. Cum enim vis actio contra inceptum motum continue atque aequaliter agat, utique aequalibus temporibus aequales gradus velocitatis ab illo detrahet, atque adeo eius motus erit uniformiter (36) retardatus. Q. E. D.

COROLLARIUM I.

106. Igitur celeritates a corpore acquiritae

tae, erunt ut particulae temporis ab initio elapsæ, ac proinde crescent ut tempora, seu erunt temporibus proportionales.

COROLLARIUM II.

107. Cum vis utcumque variabilis agens tempore infinite parvo, haberi queat veluti constans (64); patet, quod omnis motus vi qualibet genitus, & utcumque acceleratus, aut retardatus, ipso initio per tempus infinitesimum spectari potest tamquam uniformiter acceleratus, aut (36) retardatus.

COROLLARIUM III.

108. Si corpus quiescens vi qualibet variabili, vel constanti continue urgeatur, & deinde eadem velocitate, quam vis illius actione continua acquisivit contra directionem vis illius agentis proiciatur, ut vestigia sua relegat; corpus illud in itu & reditu suo eandem habebit velocitatem, ubi ad eadem viae suae puncta eundo & redeundo pervenerit, adeoque motum redeundo non amittet, nisi cum pervenerit ad punctum, ex quo cepit eundo moveri. Nam vis in itu & reditu corporis aequalibus temporibus aequales celeritatis gradus generat, & extinguit.

PROPOSITIO XI.

109. *Si vis continue in corpus agens fueris* Tab. II.
constans, velocitatis linea recta erit; Fig. 3. 4.
si au-

ſi autem fuerit variabilis, velocitatis linea erit curva.

Tab. II. I. Recta AG exponat tempus in partes
Fig. 3. aequales infiniteſimas diſiſum, & perpendicularares BH, CK; DL &c. exponant celeritates a mobili acquiſitas temporibus correfpondentibus AB, AC, AD &c. His poſitis, ſi conſtans fuerit vis perpetuo agens, celeritates ab initio motus a corpore acquiſitae, erunt ut tempora, quibus (106) productae ſunt. Igitur celeritas DL tempore AD acquiſita, erit ad celeritatem GP genitam tempore AG, ut tempus AD ad tempus AG. At ſi recta non eſſet velocitatis linea ALP, neque etiam DL ad GP foret ut recta AD ad AG; ergo recta erit velocitatis linea ALP.

Tab. II. II. At ſi vis fuerit variabilis, nec motus
Fig. 4. erit uniformiter acceleratus, neque celeritates proportionales erunt temporibus, quibus a mobili acquiruntur, ideoque non erit DL ad GP, ut AD ad AG. Puncta igitur A, L, P ad rectam lineam non ſpectabunt, ſed in curva aliqua locabuntur, cuius natura determinanda erit ex lege, iuxta quam celeritas augetur. Q. E. D.

L E M M A II.

Tab. II. 110. **S**I in axe AO curvae cuiuslibet ASR
Fig. 2. capiatur FG infiniteſimae parva reſpectu
abſciſ-

abscissae AG, quam secat GP ad angulos rectos, & ducta ipsi GP parallela FS, compleantur rectangula GS, GL, quorum alterum curvae inscriptum sit, alterum circumscriptum; haec duo rectangula pro aequalibus sumi queunt.

Quoniam ordinatae FS, GP infinite propinquae sunt, utique ipsae possunt pro aequalibus usurpari (63); sed GT est ipsi FS aequalis. Ergo & rectae GP, GT pro aequalibus sumi queunt. Sed rectangulum GL est ad rectangulum GS, ut GP ad GT; ergo haec quoque rectangula pro aequalibus sumi possunt. Q. E. D.

COROLLARIUM. I.

111. Quia rectangula GS, GL plus differunt inter se, quam a Trapezio FGPS; liquet, quod si illa pro aequalibus sumi queunt (110), multo magis alterutrum eorumdem accipi poterit veluti aequale eidem trapezio FGPS.

SCHOLION.

112. Quod fuit haecenus demonstratum in curva linea ASR, liquet etiam habere locum in triangulo rectangulo HGP, cui proinde inscripta & circumscripta rectangula GS, GL sumi poterunt pro trapezio FGPS.

PRO.

PROPOSITIO XII.

Tab. I.
Fig. 3.
4.

113. **S***I corpus vi qualibet continue ad motum sollicitetur; spatium descriptum tempore AF erit ad spatium absolutum tempore AG, ut area AFN ad aream AGP.*

Quoniam motus finitus utcumque acceleratus, tempore infinitesimo pro acquabili (38) sumi potest, etiam celeritas EM tempore finito AE acquisita, per tempus infinitesimum EF spectari potest veluti invariata. Ergo spatium percursum tempore infinite parvo EF; erit (47) ut rectangulum EMIF, sive ut trapezium EMNF, quod pro illo rectangulo sumi (112 111) potest. Similiter spatium infinitesimo tempore DE absolutum, erit ut correspondens trapezium DLME, spatium vero percursum tempore infinitesimo CD, erit ut trapezium CKLD, & sic porro. Ergo spatium absolutum tempore finito AF, erit ut summa omnium trapeziorum correspondentium singulis infinitesimis partibus rectae AF, sive ut area AFN. Simili modo ostendam, spatium percursum tempore toto AG, esse ut area AGP. Erit igitur spatium descriptum tempore AF ad illud quod percurritur AG tempore, ut area AFN ad aream AGP. Q. E. D.

Co-

COROLLARIUM.

114. Completo rectangulo AGPQ, area AGP erit ad rectangulum AGPQ, ut spatium quod corpus vi qualibet sollicitatum motu accelerato describit tempore AG, ad spatium quod eodem tempore motu aequabili describeret cum velocitate acquisita GP. Nam spatium motu aequabili percursum tempore AG cum velocitate GP, est (47) ut rectangulum AGPQ; spatium vero accelerato motu eodem tempore AG percursum, est (113) ut area AGP. Igitur hoc spatium ad illud erit, ut area AGP ad rectangulum AGPQ.

PROPOSITIO XIII.

115. *SI corpus cum velocitate acquisita GP* Tab. II.
contra directionem vis sollicitantis fe- Fig. 3.
ratur, & vestigia sua relegat; spatium tem-
pore GD retardato motu descriptum, erit ad
spatium eodem tempore describendum unifor-
miter cum velocitate GP, ut area GDLP ad
rectangulum GDRP.

Dum corpus cum velocitate acquisita GP contra actionem vis sollicitantis movetur, contraria actione vis sollicitantis celeritas ipsius decrefcit, uti antea crescebat secundum vis illius directionem, ideoque in fine temporis infinite parvi GF superstes veloci-
D
tas

tas est FN, in fine tempusculi FE est EM, & sic porro. Cum vero tempore infinite parvo GF perinde corpus se habeat ac si moveretur (38) cum eadem velocitate, spatium interea descriptum, erit ut rectangulum (47) GFTP, sive ut trapezium GFNP, quod pro illo rectangulo sumi (112 111) potest. Simili modo constabit, spatium tempusculo FE descriptum, esse ut correspondens trapezium FEMN, & sic deinceps. Igitur spatium tempore GD retardato motu percursum, erit ut area GDLP; sed spatium eodem tempore cum velocitate GP aequabiliter describendum, est (47), ut rectangulum GDRP. Igitur spatium tempore GD retardato motu descriptum, erit ad spatium eodem tempore uniformiter percurrendum cum velocitate GP, ut area GDLP ad rectangulum GDRP. Q. E. D.

P R O P O S I T I O X I V.

116. *SI vis sollicitans constans sit, seu si motus fuerit uniformiter acceleratus; spatia ab initio motus descripta, erunt ut quadrata temporum quibus percursum sunt.*

Quoniam vis sollicitans constans est, recta (109) erit velocitatis linea ALP, ideoque triangularis erit area AGP. Igitur spatium ab initio motus descriptum tempore quolibet AD, est (113) ad spatium descriptum tempore alio AG, ut area trianguli ADL ad aream

Tab. II.
Fig. 3.

ream trianguli AGP. Sed propter parallelas DL, GP, triangula ADL, AGP sunt similia, adeoque sunt inter se, ut quadrata laterum homologorum AD, AG. Ergo spatia ab initio motus descripta temporibus AD, AG, sunt etiam ut quadrata illorum temporum. Q. E. D.

COROLLARIUM I.

117. Cum velocitates sint (106) ut tempora quibus acquiri solent, spatia ab initio motus descripta temporibus AD, AG, erunt quoque (116) ut quadrata celeritatum acquisite DL, GP.

COROLLARIUM II.

118. Quoniam omnis motus vi qualibet genitus, & utcumque acceleratus ipso initio per tempus infinitesimum considerari potest tamquam motus uniformiter (107) acceleratus; utique spatiola descripta erunt (116) ut quadrata tempusculorum, quibus describuntur, atque etiam (117) ut velocitatum quadrata, quae illis tempusculis acquiruntur.

COROLLARIUM III.

119. Hinc in motu uniformiter accelerato si tempora ab initio computata sumantur in progressionem numerorum naturalium 1. 2. 3. 4. 5. &c.; spatia his temporibus absoluta, erunt (116) ut termini progressionis numerorum quadratorum 1. 4. 9. 16. &c.

COROLLARIUM IV.

120. Spatia vero singulis temporibus aequalibus seorsim sumptis percurſa, erunt ut termini progressionis numerorum imparium 1. 3. 5. 7. 9. &c. Nam cum spatium primo tempore percurſum, ſit ut 1, & duplo percurſum tempore (119) ſit ut 4; ſpatium ſecundo tempore ſeorsim ſumpto deſcriptum, erit ut 4 dempto 1, ſive ut 3. Similiter cum ſpatium percurſum tempore triplo ſit ut 9, tempore vero duplo percurſum ſit ut 4; ſpatium tempore tertio ſeorsim ſumpto deſcriptum, erit ut 9 dempto 4, ſive ut 5, & ſic porro.

COROLLARIUM V.

121. Igitur ſpatia motu iniformiter retardo deſcripta temporibus aequalibus ſeorsim ſumptis, ſecundum numeros impares retrogrado ordine (108) minuuntur.

PROPOSITIO XV.

122. *S*patium quod corpus motu uniformiter accelerato deſcribit a principio motus computatum, eſt ſubduplum ſpatii, quod eodem tempore motu aequabili deſcriberet cum ea velocitate, quam in fine illius temporis in motu uniformiter accelerato acquiſiſſit.

Spatium quod corpus motu uniformiter
ac-

accelerato describit tempore AG est ad spatium quod motu aequabili eodem tempore ^{Tab. II.} describeret cum velocitate acquisita GP, ut ^{Fig. 3.} (114) triangulum AGP ad rectangulum AGPQ. Sed triangulum AGP subduplum est rectanguli AGPQ; ergo & spatium motu uniformiter accelerato descriptum tempore AG quo acquiritur velocitas GP, est subduplum spatii, quod cum illa velocitate GP eodem tempore AG describeretur. Q. E. D.

COROLLARIUM I.

123. Hinc celeritas motu uniformiter accelerato acquisita, exponitur per quatum dupli spatii percurssi, divisi per tempus quo percurritur; in aequabili enim motu celeritas exponi solet per quatum, qui prodit ex divisione spatii per tempus (50) quo percurritur.

COROLLARIUM II.

124. Quia omnis motus vi qualibet genitus, & utcumque acceleratus ipso initio per tempus infinitesimum potest (107) pro uniformiter accelerato spectari; liquet, celeritatem hoc motu genitam exponi posse per quatum, qui emergit dividendo duplum spatii ab initio motus descripti per tempus infinitesimum, quo percurritur.

PROPOSITIO XVI.

Tab. II. 125. **S***I massae aequales corporum M & N*
 Fig. 10. *viribus constantibus continue impel-*
lantur; spatia dato tempore ab eisdem per-
cursa, erunt ut vires ipsae.

Tempus quo vires agunt exponat recta AB, rectae vero BC, BL, ipsi AB normales, referant velocitates in fine illius temporis ab utroque mobili acquisitas. Iungantur AC, AL. Cum massae corporum M & N constantibus viribus continue urgeantur, utique motu uniformiter accelerato (105) promoveri debebunt. Cum itaque massa M tempore AB acquirat velocitatem BC, utique spatium ab eadem percursum, erit (113) ut triangulum ABC. Similiter spatium tempore AB percursum ab altera massa N, erit (113) ut triangulum ABL. Spatium ergo percursum a massa M erit ad spatium absolutum a massa N, ut triangulum ABC ad aliud ABL, sive ut basis BC ad basin BL, sive ut velocitas acquisita a mobili M, ad eam quam obtinuit massa N. Sed etiam vires constantes sunt ut celeritates, quae eodem tempore in massis aequalibus (75) generantur. Ergo etiam spatia quae eodem tempore absoluntur, erunt ut vires ipsae. Q. E. D.

CA-

CAPUT VIII.

De naturali Gravium motu.

DEFINITIO XXIII.

126. **V**Is qua singula aequalia elementa corporis tellurem petunt, *acceleratrix gravitas* appellatur.

DEFINITIO XXIV.

127. Gravitas acceleratrix per omnia elementa corporis distributa, constituit eius *pondus*, quod etiam *gravitas motrix*, aut *absoluta gravitas* dici solet.

SCHOLION.

128. Sicuti enim ex determinato elementorum aequalium numero massa corporis coalescit, ita ex determinato numero aequalium virium gravitantium oritur pondus, seu totus conatus corporis terram versus.

COROLLARIUM.

129. Gravitas ergo acceleratrix toties repetita, quot sunt in corpore aequalia elementa, hoc est acceleratrix gravitas ducta in massam, erit (127) ut pondus, seu motrix gravitas corporis cuiuscumque.

PHENOMENON.

130. Gravitas motrix, seu pondus corpo-

ris cuiuscumque in illis locis, in quibus experimenta capere licet, seu per intervalla non nimis magna deprehenditur constans, hoc est dum grave cadit ex altitudine, quae a superficie terrae non multum distat, in singulis punctis spatii quod describit, eundem conatum exerit ad descendendum. Nam si descensus corporis obstaculo aliquo impediatur, obstaculum illud eodem corporis pondere aequaliter premi solet in montis vertice, atque in eius radice.

COROLLARIUM.

131. Quia pondus est ut acceleratrix gravitas ducta (129) in massam, haec vero eadem est in vertice atque in montis radice; utique si pondus per totam montis altitudinem constans (130) sit, etiam acceleratrix gravitas constans erit.

SCHOLIUM.

132. Esto ex Newtoni calculo plane constet, gravitatem acceleratricem in ea minui ratione, qua augentur quadrata distantiarum a centro terrae, nihilo tamen minus per intervalla non nimis magna ipsa haberi poterit velut constans. Cum enim globi terraquei superficies distet ab eius centro milliariibus circiter 3440, utique si grave ex montis radice transferatur in eius verticem milliari unico altum, eius distantia a centro terrae milliari unico aucta erit. Sed huiusmodi incrementum insensibile prorsus est, si
com-

comparetur cum enormi terrestris radii magnitudine; ergo dum cadit grave ex montis vertice in radicem, eius acceleratrix gravitas haberi poterit pro constanti.

PROPOSITIO XVII.

133. **P**ondera, seu gravitates motrices corporum quorumcumque sunt, ut massae corporum eorundem.

Si in machina Pneumatica aptetur longior tubus, in cuius parte superiori pendeat plumbum, & levissima pluma, facto vacuo, eodemque instanti temporis plumbo & pluma demissis, ambo perveniunt simul ad machinae eiusdem tabulam, ideoque eadem velocitate omnino cadunt. Hoc in omnibus gravibus suspicatus iam olim Lucretius fuit, Galileus postea aliquatenus demonstravit, Newtonus demum facto experimento, extra dubitationis aleam collocavit. Itaque pondera, seu gravitates motrices corporum quorumcumque, quae constantes (130) sunt per longitudinem totam tubi, respectiva corpora ita urgent, ut aequalibus temporibus aequales celeritatis gradus illis communicent. Sed vires motrices constantes hoc modo corpora impellentes, sunt (78) ut massae corporum eorundem; ergo in eadem ratione etiam pondera ipsa erunt, Q. E. D.

SCHO-

SCHOLIUM.

134. Quod si contingat, ut ubi vacuum nullum est, corpus gravius cadat citius leviori, id unice est repetendum ab aeris resistantia, quae, caeteris paribus, minus officit graviori. Res clarior exemplo fiet. Sumto duo globi A & B eadem praediti densitate, sed diameter primi A dupla sit diametri alterius B; liquet, superficiem globi A quadruplam fore superficiei globi B, octuplam vero massam. Vnde si globus B duobus gravitatis gradibus continue sollicitetur, sexdecim gravitatis gradibus indefinenter urgebitur (133) globus A. Finge modo, hos duos globos intra aerem promoveri, cuius tanta sit resistantia, ut ex globo B auferat gravitatis unicum gradum; quis non videt, gradus quatuor gravitatis auferendos esse a globo A, cuius superficies quadrupla est, atque ita subit quadruplam resistantiam? Igitur globus B post superatam aeris resistantiam unum gravitatis gradum habebit, duodecim vero gradus adhuc supererunt globo A, quibus distributis in octo aequales partes, in quas dividitur globus A, quaelibet harum partium uno gravitatis gradu cum dimidio impelletur. Sed alius globus B, qui singulis illis partibus est aequalis, uno tantum gravitatis gradu sollicitatur. Globus igitur gravior A descendet citius leviori B.

PRO-

PROPOSITIO XVIII.

135. **M**otus gravium libere decidentium per intervalla non nimis magna in medio non resistente, est uniformiter acceleratus. Et contra, motus gravium in medio non resistente verticaliter ascendentium, est uniformiter retardatus.

Si corpus vi motrice constanti secundum eandem directionem continue urgeatur, motus illius vi illa genitus continue atque uniformiter (105) acceleratur, & contra si vis motrix constans in corpus iam motum continue agat secundum directionem contrariam directioni illius, corpus motu uniformiter retardato (105) progreditur. Sed corpora gravia descendentia per intervalla non nimis magna, vi gravitatis constanti secundum eandem directionem continue (130) sollicitantur, sicuti & dum ascendant; ergo motus gravium descendentium uniformiter acceleratus est, atque ascendentium retardatus. Q. E. D.

COROLLARIUM I.

136. Igitur 1.^o velocitates acquisitae in gravium lapsu erunt, ut tempora (106) quibus acquiri solent. 2.^o Spatia a quiete cadendo descripta, erunt ut quadrata temporum quibus (116) descripta sunt, vel etiam
ut

ut quadrata velocitatum his temporibus (117) acquisitarum. 3°. Spatia singulis aequalibus temporibus seorsim sumptis percurſa, erunt (120) ut numeri impares 1. 3. 5. 7. 9. &c. 4°. Spatium quod grave accelerato describit motu, est subduplum spatii, quod eodem tempore motu aquabili describeret cum ea velocitate, quam in fine illius temporis in motu uniformiter accelerato (122) acquisivit.

COROLLARIUM II.

137. Si grave sursum verticaliter proiciatur cum velocitate in descensu acquisita, idem spatium eodem tempore ascendendo describeret, quod emensum fuerat (108.) descendendo; sed partes spatii utroque motu, descensus nempe atque ascensus percurſae, ordine retrogrado sibi invicem (121) responderent.

PROPOSITIO XIX.

Tab. II. 138. *SI recta EB spatium referat a libere*
 Fig. 11. *cadente gravi descriptum, factoque*
 12. *semicirculo ENB, agatur quoque PM perpendiculariter ad EB, & iungatur chorda EM; velocitas acquisita lapsu EP erit ad velocitatem acquisitam lapsu EB, ut chorda EM ad diametrum EB.*

Iungatur recta MB. Quoniam EP est ad EM,

EM, ut eadem EM ad EB, spatium EP erit ad spatium EB, ut quadratum EM ad quadratum EB. Sed spatium EP est ad spatium EB, ut quadratum velocitatis acquisitae lapsu (136) EP ad quadratum velocitatis acquisitae lapsu EB. Ergo quadratum velocitatis lapsu EP acquisitae, est ad quadratum illius quae acquiritur lapsu EB, ut quadratum EM ad quadratum EB, ideoque velocitas lapsu EP acquisita, erit ad velocitatem quae acquiritur lapsu EB, ut chorda EM ad diametrum EB. Q. E. D.

COROLLARIUM I.

139. Igitur velocitates acquisitae a mobili post lapsus EP, EQ, erunt ut chordae correspondentes EM, EN. Nam velocitas acquisita lapsu EP est (138) ad velocitatem acquisitam lapsu EB, ut chorda EM ad EB. Pariter velocitas acquisita lapsu EB est (138) ad velocitatem acquisitam lapsu EQ, ut EB ad EN. Ergo ex aequo, velocitas acquisita lapsu EP erit ad velocitatem quae acquiritur lapsu EQ, ut chorda EM ad chordam EN.

COROLLARIUM II.

140. Quia velocitates acquisitae post lapsus EP, EQ, sunt ut tempora, quae mobile insumit cadendo (136) per illas rectas; liquet, etiam (139) tempus per EP esse ad tempus per EQ, ut chorda EM ad EN.

CA-

CAPUT IX.

De quiete & lapsu corporum gravium.

DEFINITIO XXV.

141. **P**ARS una corporis dicitur alteri *aequiponderare*, si neutra alteram moveat.

DEFINITIO XXVI.

142. *Centrum gravitatis* est punctum illud, per quod corpus dividitur in partes aequaliter ponderantes.

COROLLARIUM I.

143. Quod si ergo descensus centri gravitatis obstaculo aliquo impeditur, quiescit grave.

COROLLARIUM II.

144. Quare si corpus ex centro gravitatis suspenditur, non movetur.

COROLLARIUM III.

145. Totam ergo corporis gravitatem in centro gravitatis coactam supponere licet, atque ita pro gravi corpore in demonstrationibus substitui potest centrum gravitatis.

Co-

COROLLARIUM IV.

146. Sicuti ergo grave descendit semper, si descensui nihil obstat, ita centrum gravitatis descendere semper debet, nisi obstaculo impediatur.

COROLLARIUM V.

147. Quemadmodum grave ascendere per se nequit, nisi a vi extranea impellatur, ita gravitatis centrum non ascendit, nisi a vi externa aliqua urgeatur.

DEFINITIO XXVII.

148. *Planum gravitatis* est illud, quod dividit corpus in duas partes aequaliter ponderantes, hoc est per centrum gravitatis corporis (142) transit.

COROLLARIUM.

149. Hinc centrum gravitatis parallelepipedi HS hoc modo practice invenitur. Super latere prismatis trigoni FG huc illuc promoveatur corpus HS, donec utrinque aequilibrantur eiusdem partes. Hoc posito, planum verticale transies per KL, dividet idem corpus in duas partes aequaliter ponderantes, ideoque erit planum (148) gravitatis, transibitque proinde per gravitatis centrum corporis dati. Rursus mutato corporis eiusdem situ, super eodem prismatis latere aequilibratur, eritque MN denuo latus plani

Tab. II.
Fig. 13.

ni per gravitatis centrum traiectionis. Horum ergo planorum mutua intersectio transibit per idem centrum, atque adeo si haec bifariam dividatur, centrum gravitatis corporis designabit.

D E F I N I T I O XXVIII.

150. Gravia *homogenea* illa sunt, quorum pondera sunt voluminibus proportionalia. Secundus veto *eterogenea* dici solent.

C O R O L L A R I U M.

151. Igitur si duorum corporum gravium aequalia volumina sint aequaliter ponderantia, *homogenea* gravia erunt. Si vero ponderent inaequaliter, indicium erit esse corpora *eterogenea*.

D E F I N I T I O XXIX.

152. *Centrum magnitudinis* est illud punctum, per quod divisa magnitudo relinquit duas partes utrinque aequales.

C O R O L L A R I U M I.

153. Quia in gravibus *homogeneis* aequalia volumina sunt aequaliter (151) ponderantia, in illis centrum magnitudinis idem erit cum centro (142) gravitatis.

C O R O L L A R I U M II.

154. Igitur omnium circulorum, ellipsium, sphaerarum, & quarumcumque regularium figurarum

gurarum centrum gravitatis idem est cum magnitudinis centro. In circulo siquidem, ellipsi, & figuris regularibus, quae semper circulo inscribi queunt, ductis utcumque per centrum lineis rectis, lineae illae, totaque area in aequales partes dividi semper solent. Igitur centrum circuli, ellipsis & regularium figurarum idem est cum centro magnitudinis (152), ideoque etiam (153) gravitatis.

COROLLARIUM III.

155. In figuris etiam irregularibus communi duarum rectarum intersectione determinari potest centrum gravitatis. Siquidem in triangulo reperitur in intersectione duarum rectarum, quae a duobus angulis ductae, latera angulis opposita, totumque triangulum bifariam dividunt, ideoque in partes aequiponderantes secant. In prismatibus autem, & cylindris centrum gravitatis est punctum medium illius rectae, quae oppositarum basium centra iungit.

DEFINITIO XXX.

156. *Directio* gravium est linea recta, quam describit centrum gravitatis corporis dum descendit.

DEFINITIO XXXI.

157. *Superficies horizontalis* est illa, cuius singula puncta aequaliter distant a centro terrae.

E

Co-

COROLLARIUM.

158. Hinc superficies stagnantis aquae erit horizontalis. Si enim aliquae guttae aquae magis distarent a centro terrae, quam reliquae, disfluere illae possent. Cum itaque nihil adsit, quod hunc fluxum valeat impedire, fluerent illae actu, atque adeo aqua non amplius stagnans esset, contra hypothesein.

PROPOSITIO XX.

159. **D**irectio gravium perpendicularis est ad superficiem horizontalem.

Superficieci aquae in vase ampliori stagnantis ita norma aliqua imponatur, ut eius crus longius sit erectum, alterum radat aquam. Deinde ex normae apice grave aliquod demittatur, eumque videbimus cum descendit, erecti cruris prorsus viam sequi. Ergo directio gravium perpendicularis est ad superficiem stagnantis aquae; sed haec superficies (158) est horizontalis. Ergo directio gravium perpendicularis est ad superficiem horizontalem. Q. E. D.

COROLLARIUM.

160. Quia superficies terrae est (157) horizontalis, si ea sphaerica supponatur; sequitur, in hac hypotesi gravium directionem perpendicularem (159) esse ad superficiem terrae.

PRO-

PROPOSITIO XXI.

161. **T***ellus sphaerica est quamproxime, hoc est pro sphaerica sumi potest.*

Ex accuratis observationibus Maupertuisii, & sociorum in Laponia institutis, axis terrae est ad diametrum aequatoris, ut 177. ad 178.; unde si axi terrae tribuantur, ut solet, milliaria germanica 1720., diameter aequatoris 1729. milliaria germanica continebit. Terrestris ergo diametri per aequatorem & polos ducti, differunt inter se germanicis milliariis 9., hoc est italicis 36. Idem etiam confirmarunt Bouguerius, & socii in Peruvio; ibi siquidem invenerunt, telluris axem esse ad diametrum aequatoris, ut 178. ad 179.; unde superiori calculo instituto, eadem quamproxime invenitur diametrorum terrestrium differentia, 36. scilicet milliarium italicorum. Atqui haec differentia in corpore tam enormi, quale est nostra tellus, insensibilis prorsus est; non ergo impedit quin pro sphaerica sumi queat. Q. E. D.

PROPOSITIO XXII.

162. **L***inea directionis secundum quam grave cadit, si produceretur, proxime transiret per centrum terrae.*

Constat ex Geometria, quod linea perpendicularis ad superficiem globi, si produceretur, transiret per eius centrum. Sed quia tellus (161) sphaerica est quamproxime, linea directionis secundum quam grave cadit, perpendicularis est (160) quamproxime ad superficiem terraquei globi. Ergo linea directionis producta, proxime transiret per centrum terrae. Q. E. D.

P R O P O S I T I O XXIII.

163. *G*ravium directiones quae non nimis invicem distant, pro parallelis haberi possunt, hoc est sunt sensibilibiter parallelae.

Quemadmodum circulus terrae maximus spectari potest velut polygonum ex infinitis, atque infinite parvis lateribus rectis constans, sic terraqueus etiam globus concipi potest veluti polyedrum ex infinitis, atque infinite parvis planis lateribus terminatum, ideoque superficiei terrestris exigua illa portio quam comprehendunt gravium directiones non nimis distitae inter se, pro una ex infinitis illis superficiebus planis haberi potest. Sed quia tellus pro sphaerica sumi (161) potest, gravium directiones sunt normales terrestri (160) superficiei, atque adeo etiam ad superficiem illam planam. Pro parallelis igitur sunt habendae, hoc est sunt sensibilibiter parallelae. Q. E. D.

SCHO-

SCHOLIUM.

164. Id quoque aliter sic ostendo. Duorum gravium directiones inter se distant milliari uno. Quoniam unus gradus circuli terrae maximi est circiter 60. milliarium italicorum, utique arcus unius minuti circiter erit unius milliariis; sed arcus unius minuti pro recta linea sumi potest. Ergo & pro superficie plana haberi poterit terrae portio intercepta a duabus gravium directionibus, quae distant milliari unico inter se, ideoque cum huiusmodi directiones ad illam superficiem sint (160) normales, erunt etiam mutuo parallelæ. Igitur si grave ad milliariis distantiam proiciatur, in singulis punctis semitæ quam describit, vis gravitatis in illud agat iuxta directiones sensibilibiter parallelas.

PROPOSITIO XXIV.

165. **S**I quodvis corpus ita innixum sit plano horizontali, ut cadat directionis linea intra basim; corpus in situ suo quiescit. At si linea directionis ceciderit extra basim; corpus in illam labitur partem, versus quam cadit linea directionis.

I. Sit corpus DACB ita innixum plano Tab. III. horizontali MN, ut eius linea directionis Fig. 1. EF cadat intra basim BD: dico, illud quiescere in hoc situ. Iuncta siquidem BE recta,

E 3

sta,

cta, & ducta horizontali EH, centro B per E describatur circulus ELV, quem secet in puncto L recta BO, ipsi FE parallela. Quoniam parallelae sunt horizontales rectae EH, DB, rectusque est (159) angulus EFB, rectus quoque erit reliquus FEO, atque acutus angulus BEO, qui proinde erit minor recto angulo BOE. Vnde in triangulo EOB recta BE, seu ipsi aequalis BL maior erit recta BO, arcusque circuli ELH totus iacebit supra horizontalem rectam EH. Atqui si corpus DACB caderet versus N, centrum gravitatis E describeret arcum circuli ELH, seu sponte sua ascenderet supra horizontalem rectam EH, quod impossibile (147) prorsus est; ergo nequit corpus cadere versus N. Eodem modo constabit, non posse corpus cadere versus M; ergo immotum iaceat oportebit.

Tab III.
Fig. 1.

II. Si vero linea directionis EF cadat extra basim DB; tunc in eam partem cadere debet corpus, versus quam cadit linea directionis. Nam iuncta EB, & ducta horizontali EH, centro B per E describatur arcus circuli ELV. Quoniam parallelae sunt rectae horizontales EH, BN, rectusque est (159) angulus ENF, consequens est, ut rectus quoque sit reliquus FEO, atque obtusus alius BEO; unde in triangulo EOB recta BO maior erit recta BE, seu BL, arcusque circuli ELV iacebit infra horizontalem EH. Centrum itaque gravitatis E potest descendere per arcum circuli ELV; sed
nihil

nihil est quod obstat huic descensui. Corpus ergo (146) decidet versus N. Q. E. D.

S C H O L I O N I.

166. Contingere inde potest, ut aedificii murus non corruat, esto sit horizonti maxime inclinatus. Vel enim linea directionis eiusdem muri cadit intra eius basim, aut prorsus labitur extra illam. In primo casu utique stabit (165) murus, si nempe lapides quibus constat, calce firmiter sint connexi. In altero autem casu etiam subsistere potest murus, si ita haeret aliis partibus aedificii, ut propria inclinatione ab illis nequeat separari; tunc etenim est spectanda linea directionis non muri quidem, sed potius integri aedificii. En igitur rationem, cur murus aliquis inclinatus catenis ferreis regi soleat; sic namque in muro oritur maior nexus cum aliis partibus aedificii.

S C H O L I O N II.

167. Hinc ratio apparet, cur Turres Bononiensis, atque Pisana non corruant, esto in illa perpendicularum ex summitate in basim ductum, a basi muri distet pedibus 9., distet autem in Pisana cubitis $7\frac{1}{3}$. Haec antiqua siquidem aedificia nedum constant lapidibus connexis firmiter inter se, sed habent quoque lineam directionis, quae cadit intra illorum basim.

SCHOLION III.

168. Ratio quoque reddi potest, cur homo firmiter consistat, quando erecto corpore, utroque pede pavimento insistit; cadat vero, si pes alteruter elevetur. Cum enim spatium interceptum utroque pede, humani corporis basis sit, centrum vero gravitatis eiusdem iaceat inter pubim & nates, utique cadet directionis linea inter utrumque pedem, sive intra basim, quando erecto corpore, utroque pede pavimento insistit, ideoque nequit homo cadere in hoc situ. At si pes alteruter elevetur, basis in illud spatium coercetur, quod a pede unico occupatur. Cadit ergo directionis linea extra basim, nempe dextram versus, si pes dexter elevetur, atque ita homo super solo sinistro pede non potest stare, nisi in sinistram partem ita incurvet corpus, ut intra sinistram pedem directionis linea retrahatur.

CAPUT X.

*De Gravium descensu super plano
inclinato.*

DEFINITIO XXXII.

169. **P**lanum inclinatum est, quod cum horizontali obliquum angulum facit.

SCHIO.

SCHOLIUM.

170. In plano inclinato tria sunt maxime Tab. III.
distinguenda, nempe longitudo eiusdem AC, Fig. 3.
altitudo AB, atque basis CB, quae omnia
definiuntur tribus lateribus trianguli rectan-
guli CAB.

PROPOSITIO XXV.

171. *Si quodvis corpus centrum gravitatis ha-* Tab. III.
bens in C, incumbat plano MN opti- Fig. 4.
me levigato, inde vero sollicitetur a vi ali-
qua data P, agente iuxta directionem CP obli-
quam eidem plano; corpus movebitur supra
illud. Supponimus autem corpus non esse gra-
ve seu, quod idem est, nulla alia vi urge-
ri, quam data P.

Si directio vis motricis P parallela foret
plano MN, tota impenderetur in movendo
corpore supra planum. Similiter si directio
vis motricis perpendicularis ad planum fo-
ret, tota infunderetur in premendo plano
MN, neque enim gignere motum posset,
nisi huic pressioni cederet idem planum. At
cum directio vis motricis nec parallela sit
plano MN, nec perpendicularis ad idem
planum, liquet, partem aliquam vis eiusdem
infundi debere in premendo plano MN, re-
liquam vero movendo corpori applicari,
quod proinde movebitur (21) supra pla-
num. Q. E. D. Co.

COROLLARIUM I.

172. Igitur vis P obliqua plano MN, in duas resolvi debet, quarum altera unice planum premit, altera unice movet corpus.

COROLLARIUM II.

173. Vis itaque premens planum perpendicularis ad planum erit; si enim obliqua foret, non unice planum premeret, sed etiam corpus (171) moveret.

COROLLARIUM III.

174. Similiter vis altera movens corpus, parallela erit plano MN; si enim foret obliqua plano, non moveret unice corpus, sed (171) premeret etiam planum.

COROLLARIUM IV.

175. Vis ergo obliqua P in duas resolvi debet, quarum altera agit iuxta directionem perpendicularem plano MN, altera iuxta directionem parallelam (174) eidem plano.

PROPOSITIO XXVI.

Tab. III.
Fig. 5.

176. *Si grave ABDI incumbens plano inclinato MN, sibi ipsi relinqueretur, necessario descenderet supra illud.*

Finge corpus ABDI gravitatem nullam habere, quiescet utique supra planum. Pone dein-

deinde vim gravitatis agere supra illud, acque ex gravitatis centro C ductam esse CG rectam, horizontali HN normalem; utique vis gravitatis sollicitabit corpus ad descensum iuxta (159) directionem CG. Sed eadem CG directio cum perpendicularis sit ad HN, obliqua est plano MN; ergo descendet mobile (171) supra planum, Q. E. D.

S C H O L I O N.

177. Hic praescindimus a frictione, quae vincenda esset a gravitate, si MN planum scabritie aliqua donaretur.

C O R O L L A R I U M.

178. Vis itaque gravitatis, quae obliqua est plano MN, in duas alias (175) dividetur, quarum altera aget iuxta directionem CO perpendicularem plano MN, qua corpus scilicet premit planum, altera vero iuxta directionem CS, parallelam eidem plano, quae tota movendo corpori applicatur.

S C H O L I O N.

179. Vis qua corpus sollicitatur ad motum in plano inclinato iuxta directionem CS, vocatur *gravitas relativa*, sicuti & vis illa, qua grave urgetur in perpendiculari, appellatur *gravitas absoluta*. Gravitas absoluta, & relativa habent varias directiones; directio enim primae invariabilis prorsus est, cum semper normalis sit (159) horizonti; alterius

rius autem directio cum aequidistans debeat esse (178) plano, pro varia plani inclinatione diversa erit.

PROPOSITIO XXVII.

180. **G**ravitas absoluta est ad relativam, ut longitudo ad altitudinem plani.

Tab.III.
Fig. 5.

Gravitatem absolutam corporis ABDI exponat CF recta, ductaque FR perpendiculariter ad CS, compleatur rectangulum ECRF; liquet, vim gravitatis absolutae CF resolvi (178) in duas CE, CR, quarum prima CE unice premit planum, alia autem CR corpus sollicitat ad descensum, exponitque proinde (179) gravitatem corporis relativam. Iam vero ob parallelas CS, MN, angulus CLM aequalis est alterno RCL; sed propter parallelas CG, MH, idem angulus CLM aequatur quoque alterno alteri HML. Ergo angulus RCL aequatur alteri HML, ideoque angulus RCF aequabitur HMN; sed rectus angulus FRC aequalis quoque est recto alteri MHN. Ergo triangulum CRF simile erit alteri MHN, adeoque FC erit ad CR, ut MN ad MH, seu gravitas absoluta erit ad relativam, ut longitudo ad altitudinem plani. Q. E. D.

COROLLARIUM I.

181. Cum gravitas absoluta sit (180) ad relativam, ut longitudo ad altitudinem plani, longitu-

gitude autem, & altitudo plani constantem rationem habeant inter se; etiam gravitas absoluta ad relativam in constanti ratione erit. Sed gravitas absoluta constans est per longitudinem totam (130) plani; ergo etiam constans erit gravitas relativa per longitudinem totam plani.

COROLLARIUM II.

182. Igitur ea omnia, quae de motibus a gravitate absoluta genitis demonstravimus, transferre licet ad motus vi gravitatis relativae in plano inclinato productos. Itaque 1.^o grave per planum inclinatum descendit motu uniformiter accelerato, ascendit vero motu (135) uniformiter retardato. 2.^o Velocitates sunt (136), ut tempora quibus acquiri solent. 3.^o Spatia a quiete cadendo descripta, sunt (136) ut quadrata temporum quibus percurra sunt, & ut quadrata celeritatum iisdem temporibus acquisitarum. 4.^o Spatia aequalibus temporibus seorsim sumptis descripta, sunt (136) ut numeri in pares 1. 3. 5. 7. &c.

COROLLARIUM III.

183. Quia vires motrices constantes sunt inter se in ratione velocitatum, quas pari tempore in eodem corpore (75) generant; velocitas acquisita in perpendiculari, erit ad velocitatem in plano inclinato obtentam eodem tempore, ut absoluta gravitas ad relativam, sive ut longitudo (180) ad altitudinem plani. Co-

COROLLARIUM IV.

Tab. III. 184. Si itaque longitudo plani MN trigecupla sit altitudinis MH, pondus P, quod trigesima pars est ponderis ABDI, in aequilibrio cum hoc erit. Nam gravitas absoluta est (180) ad relativam, ut MN ad MH; ergo cum MN trigecupla sit MH, etiam gravitas absoluta corporis ABDI trigecupla erit gravitatis propriae relativae. Sed etiam gravitas absoluta corporis ABDI est (*ex hyp.*) ponderis P trigecupla; ergo gravitas relativa corporis ABDI erit ponderi P aequalis, ideoque (84) inter haec corpora dabitur aequilibrium. Vnde pondus P 100. librarum sustinebit pondus ABDI librarum 3000.

COROLLARIUM V.

Tab. II. 185. Gravitas relativa in plano AC est ad relativam in plano AL, ut reciproce recta AL ad AC. Nam gravitas relativa in plano AC est (180) ad absolutam in perpendicularo AB, ut recta AB ad AC. Similiter gravitas absoluta in perpendicularo AB est (180) ad relativam in plano AL, ut recta AL ad AB. Ergo ex aequo perturbate, gravitas relativa in plano AC erit ad relativam in plano AL, ut recta AL ad AC.

COROLLARIUM VI.

186. Cum longitudo plani AL maior sit lon-

longitudine plani AC, etiam gravitas relativa in hoc plano maior erit gravitate relativa in altero plano AL, atque adeo grave magis conabitur ad descensum per AC, quam per aliud AL planum.

PROPOSITIO XXVIII.

187. **L**ongitudo plani AC est ad altitudinem ^{Tab.} AB, ut spatium AB percursum in ^{Fig.} perpendicularo, ad spatium AD descriptum eodem tempore in plano AC.

Vires motrices constantes, quae agunt in idem corpus, sunt ut spatia, quae aequalibus temporibus ab ipso corpore (125) percurruntur; sed gravitas absoluta, & relativa constantes (181) vires sunt, eaeque movendo eidem corpori applicantur. Ergo gravitas absoluta erit ad relativam, ut spatium AB percursum in perpendicularo, ad spatium AD, quod pari tempore absolvit in plano AC. Sed gravitas absoluta est etiam ad relativam, ut longitudo plani AC ad altitudinem (180) plani AB; ergo etiam longitudo plani AC ad altitudinem AB erit, ut spatium AB percursum in perpendicularo, ad spatium AD descriptum pari tempore in plano AC. Q. E. D.

COROLLARIUM I.

188. Si ex angulo recto B demissa sit ad AC

AC perpendicularis BD, erit AC ad AB, ut eadem AB ad BD; quare eodem tempore, quo grave in perpendiculo cadit ex A in B, in plano inclinato AC perveniet (187) ad punctum D.

COROLLARIUM II.

189. Dato spatio descensus perpendicularis in altitudine plani AB, habebitur spatium AD percurrendum eodem tempore in plano AC, si ex B ad AC demittatur (188) perpendicularis BD.

COROLLARIUM III.

190. Vicissim dato spatio AD percurso supra planum AC, detegetur etiam AB spatium, per quod grave eodem tempore in perpendiculo descendisset, si ex puncto D erigatur perpendiculum, occurrens altitudini plani in puncto B.

COROLLARIUM IV.

Tab.III.
Fig. 7. 191. Cum in semicirculo recti sint anguli D, E, C; grave per singula plana AD, AE, AC eodem tempore (189) cadet, quo descenderet per diametrum AB, perpendiculari horizontali rectae HN.

PROPOSITIO XXIX.

Tab.III.
Fig. 8. 192. **C**eleritates gravium in quovis plano inclinato AD, & in perpendiculo AV sunt

sunt aequales, ubi gravia ex eadem altitudine perveniunt ad eandem rectam horizontalem DV.

Erecta ad planum DA perpendiculari DB, secante verticalem AV in B, agatur horizontalis BH occurrens ipsi AD in H, superque diametro AB describatur semicirculus ADB. Hoc posito, velocitas acquisita lapsu AB est ad velocitatem acquisitam lapsu AV, ut diameter AB ad (138) chordam AD, si-ve ut longitudo plani AH ad altitudinem AB, ob similia triangula ABH, ABD. Sed cum spatia AB, AD pari tempore (191) percurrantur, etiam velocitas acquisita lapsu AB, est (183) ad velocitatem acquisitam lapsu AD, ut longitudo plani AH ad altitudinem AB. Igitur velocitas acquisita lapsu AB est ad velocitatem acquisitam lapsu AV, ut eadem velocitas acquisita lapsu AB ad velocitatem acquisitam lapsu AD. Ergo velocitates acquisitae post lapsus AV, AD invicem sunt aequales. Q. E. D.

COROLLARIUM I.

193. Hinc grave cadens per varia plana Tab. III.
 inclinata aequae alta AB, EB, OL, aequales Fig. 5.
 velocitates acquirit cum pervenerit ad horizontalem rectam BG. Demissis siquidem perpendicularis AR, EV, OG, quae (*ex hyp.*) sunt aequalia; patet, velocitates a mobili acquisitas post verticales lapsus AR, EV, OG,
F in-

invicem esse aequales. Sed grave cadens per inclinata plana AB, EB, OL, acquirit in B & L eam velocitatem, quam obtineret (192) in R, V, & G post lapsus verticales AR, EV, OG. Ergo & velocitates a mobili acquisite post percursa plana AB, EB, OL invicem sunt aequales.

C O R O L L A R I U M II.

Tab. III. 194. Hinc velocitates acquisite a gravi in
Fig. 10. infimo puncto B post percursas chordas EB, HB, erunt ut chordae ipsae. Nam velocitas acquisita a mobili lapsu MB est (139) ad velocitatem acquisitam lapsu NB, ut chorda EB ad chordam HB; sed velocitates a mobili acquisite post percursas chordas EB, HB, eadem prorsus cum illis sunt, quas mobile acquirit post verticales (192) lapsus MB, NB. Ergo & velocitates a mobili acquisite post percursas chordas EB, HB, erunt ut chordae ipsae.

P R O P O S I T I O XXX.

195. *SI corpus quodlibet ABK ita incumbas
Tab. III. inclinato plano MN, ut perpendicu-
Fig. 11. laris CF ex gravitatis centro C ad planum ducta, cadat extra eiusdem basim AB; corpus ABK volutabitur supra planum.*

Ductis CH, CI, quarum altera parallela sit horizontali plano SN, altera longitudini pla-

plani MN, centro A per C describatur arcus circuli COR, quem tangat CG in C. Iungatur quoque CA, & demittatur verticalis recta CV, occurrens longitudini plani in P, quae (159) directionem refert et gravitatis. Quoniam rectus est angulus PCH, obtusus erit angulus ACH; rectus autem est angulus ACG. Ergo CG recta erit horizontali CH inferior. Similiter ob rectum angulum FCI, obtusus erit angulus ACI; rectus vero est angulus ACG. Ergo CG inferior erit CI recta. Gravitatis igitur centrum C magis (186) sollicitabitur iuxta directionem CG, quae tangit circulum COR, quam secundum aliam directionem CI, ideoque sibi relictum moveri incipiet per CG, hoc est per arcum circuli COR, quem eadem CG tangit. Id autem fieri nequit, quin corpus ABK revoluatur interea circa A; ergo idem corpus volutabitur supra planum. Q. E. D.

PROPOSITIO XXXI.

196. *Sⁱ corpus quodlibet ABK ita incumbat plano inclinato NM, ut perpendicularis CF ex centro gravitatis ad planum ducta, cadat infra basim AB; corpus ABK debet excurrere supra planum.* Tab III.
Fig. 12.

Superiori posita constructione, liquet, rectum fore angulum PCH, ideoque obtusum esse angulum ACH; rectus vero est angulus

E 2
ACG.

ACG. Ergo CG recta inferior est horizontali CH. Similiter ob rectum angulum ACG, obtusus erit angulus FCG; rectus vero est angulus FCI. Itaque CI recta infra CG iacebit. Gravitatis itaque centrum C magis (186) sollicitabitur iuxta directionem CI, quam secundum CG rectam, tangentem circuli COR, ideoque sibi relictum promovebitur per CI, ac proinde excurrat mobile supra planum. Q. E. D.

C O R O L L A R I U M I.

197. Si corpus ABK fuerit polyedrum regulare ex infinitis atque infinite parvis lateribus planis constans, quorum unum sit AB; tunc perpendicularis CF, ex centro gravitatis demissa ad MN planum, absque dubio cadet intra basim AB. Hoc itaque polyedrum dum descendit supra planum MN, non volutabitur, sed (196) excurrat.

C O R O L L A R I U M II.

198. Quoniam sphaera spectari solet veluti regulare polyedrum ex infinitis, atque infinite parvis lateribus planis constans; sphaera inclinato incumbens plano, si sibi ipsi relinquatur, non volutabitur supra illud, sed (197) excurrat.

S C H O L I O N.

199. Quod si reipsa sphaera inclinato plano incumbens, devolui potius soleat, quam
ex-

excurrere, id a scabritie plani est unice repetendum.

C A P V T XI.

De gravium descensu super plana contigua inclinata, & per lineas curvas.

PROPOSITIO XXXII.

200. **S***I grave ex quiete B percurso BC plano, alteri CD occurrat in puncto C; supra illud moveri incipiet vi minori, quam quae acquiritur per BC.* Tab. IV.
Fig. 1.

Demissa ex B in productum planum CD perpendiculari BK, compleatur rectangulum BKCF; liquet ex dictis, quod si vis acquisita lapsu BC, exponatur hac ipsa recta, eadem (101) resolveretur in binas BK, BF, sive BK, KC. Sed vis exposita per BK, tota quanta est consumitur in premendo, aut potius percutiendo CD plano, cum perpendiculariter illud feriat. Ergo consequens est, ut sola corpori vis super sit, quae exponitur per KC, qua quidem grave moveri incipiet per CD. Sed vis KC minor est alia vi BC; ergo corpus moveri incipiet per CD vi minori, quam quae acquiritur per BC. Q. E. D.

COROLLARIUM. I.

201. Si motui non obstaret angulus BCD, uti-
F 3

utique mobile percurreret CD planum vi BC , vel EC , si centro C per B fiat semicirculus EBL ; fertur autem (200) supra illud vi quae exponitur KC recta. Ergo ob resistantiam anguli BCD , amittit mobile vim EK .

COROLLARIUM II.

202. Si angulus BCK quantitatis finitae esset, recta BK finitam haberet ad rectas BC , KC rationem, quae decrescente angulo BCK , semper minuitur, evaditque infinitesima, dum infinitesimus est angulus BCK . Igitur in hoc casu etiam vis BK , qua corpus percutit planum CD in C , infinite parva erit, si compareretur cum vi BC vel KC , qua movetur corpus supra planum CD , ideoque harum respectu negligi tuto potest.

COROLLARIUM III.

203. Similiter vis EK evadit infinitesima relate ad vim BK , si infinite parvus evadat angulus BCK . Nam in semicirculo EBL , est KE ad KB , ut KB ad KL ; sed KB infinitesima est respectu (202) rectae KC , ideoque respectu etiam KL . Ergo & KE infinitesima esse debet relate ad KB rectam, atque idcirco KE infinites sumpta, non maior erit recta KB .

PRO-

PROPOSITIO XXXIII.

204. **V**is per finitum curvae arcum a corpore amissa, infinite parva est, si cum vi comparatur, qua movetur in illa, ideoque corpus progreditur in curva cum eadem velocitate finita ac si nihil virium amisisset.

Quaelibet curva spectari potest velut polygonum ABCD ex innumeris, atque infinite parvis lateribus rectis constans, quorum Tab. IV.
Fig. 1. duo quaevis contigua BC, CD angulum comprehendunt a duobus rectis nonnisi quantitate infinitesima deficientem, adeo ut producto latere DC in E, externus angulus BCE infinitesimus plane sit. Igitur si mobile perventum ad punctum C, habeat vim BC, utique vis EK, quam amittit corpus per singula curvae latera AB, BC, CD, infinite parva (203) erit relate ad vim BK, qua percutit singula eadem latera, atque adeo corpus per curvae latera infinita, hoc est per curvae finitum arcum amittere vim non potest, quae maior (203) sit BK. Sed vis BK sine errore negligi tuto potest (202) relate ad vim BC vel KC, qua nempe movetur corpus in curva; igitur negligenda erit summa virium amissarum per arcum curvae finitum, corpusque proinde in curva progredietur cum eadem velocitate ac si nihil virium amisisset. Q. E. D.

F 4

PRO-

PROPOSITIO XXXIV.

Tab. IV.
Fig. 2. 205. **S**i grave ex quiete *A* descendat per curvam *ABCD*, vel per plana inclinata infinitesima, & contigua *AB*, *BC*, *CD*; illius velocitas in singulis curvae punctis *B*, *C*, *D* acquisita, aequalis est velocitati, quam lapsu verticali per *OG*, *OH*, *OI* acquireret in punctis *G*, *H*, *I*, quae ab horizontali *DI*, vel *AO* aequè distant ac correspondentia puncta curvae.

Producantur plana *DC*, *CB* donec horizontali *AO* convenient in *O* & *E*. Liquet, velocitatem acquisitam lapsa *AB*, eandem esse cum illa, quam (193) obtinisset mobile lapsu *EB*, aut etiam (192) lapsu *EL* vel *OG*. Quare cum angulus *ABC* motui non (204) officiat, grave percurso plano *AB*, perinde motum suum continuabit per *BC*, ac si descendisset ex *E* per unicum *EC* planum. Velocitas ergo, quam mobile in *C* acquirit post percursum plana *AB*, *BC*, eadem est cum illa, quam obtinisset cadendo per *EC*, seu (193) per *OC*, aut etiam (192) per *OH*. Simili argumento constat, velocitatem acquisitam a gravi in *D*, esse aequalem illi, quam obtineret cadendo verticaliter per *OI*, *Q. E. D.*

Co-

COROLLARIUM I.

206. Si grave descendat per curvam aliquam verticalem ABCD, aut GFED, agaturque AG parallela ad horizontem, atque ex infimo puncto D verticalis recta DH; patet, gravis illius per arcum AD, vel GD descendens, eandem esse velocitatem in D. Nam cadendo grave ex A in D, eam velocitatem acquirit, quam obtineret verticali (205) lapsu HD. Similiter idem grave cadendo ex G in D, eam velocitatem acquirit, quam obtineret lapsu verticali HD. Ergo velocitas gravis descendens per arcus AD, GD, eadem est in D. Similiter ductis BF, CE aequidistantibus ipsi AG, constabit, eandem esse gravis velocitatem in D post lapsus ex punctis aequae altis B & F, C & E.

Tabl. IV.
Fig. 3.

COROLLARIUM II.

207. Cum grave ex A pervenit ad infimum punctum D, impetu post lapsum concepto, ascendit per arcum DG ad punctum G aequae altum, in quo omnis velocitas extingui debet. Nam cum ex A pervenit ad punctum D, eam velocitatem acquirit, quam (206) obtineret cadendo ex G in D. Sed velocitas quam obtineret cadendo ex G in D, tota perditur in ascensu ex D in G, quippe gravitas eadem semper vi, eodemque modo agit sive descendat grave ex G in D, sive ascendat ex D in G. Ergo etiam velocitas acqui-

acquisita a gravi post lapsum ex A in D tota dependitur in ascensu ex D in G. Eodem argumento constabit, gravis velocitatem acquisitam lapsu BD, totam deperdi in ascensu ex D in F.

COROLLARIUM III.

208. Si grave post lapsum ex A in D, impetu concepto ascendat per alium arcum DG, habebit in F eam velocitatem, quam acquisivit lapsu ex A in B. Nam grave incipit ascendere per arcum DG velocitate acquisita lapsu ex A in D; sed percurso arcu DF, deperdit velocitatem acquisitam (207) lapsu BD. Ergo velocitas ei superstes in puncto F, eadem est cum illa, quam acquisivit cadendo ex A in B.

COROLLARIUM IV.

209. Vnde si curvae AD, GD similes fuerint, & aequales, singuli arcus aequae alti CD & ED, BD & FD, AD & GD aequalibus respective temporibus percurrentur. Cum enim motus in hac hypothese eodem modo retardari debeat in ascensu, quo in descensu acceleratur, velocitas quae acquiritur in descensu, eodem tempore in ascensu extingui debet. Sed velocitates acquisitae post lapsum AD, BD, CD, totae amitti solent (207) in punctis G, F, E. Ergo eodem tempore quo motu accelerato percurruntur arcus AD, BD, CD, describentur quoque motu retardato GD, FD, ED. Co-

COROLLARIUM V.

210. Velocitas per arcum HB verticalis Tab.III. circuli acquisita, est ad velocitatem acquisitam per alium arcum EB in infimo puncto B, ut chorda HB ad EB chordam. Nam velocitates lapsu per arcus HB, EB acquisitæ in puncto infimo B, æquales sunt velocitatibus (205) acquisitis lapsu per verticales rectas NB, MB, sive (192) per arcuum chordas HB, EB; sed velocitates acquisitæ per chordas HB, EB sunt (194) ut chordæ ipsæ. Ergo etiam velocitates acquisitæ per arcus HB, EB, erunt ut ipsæ chordæ. Fig. 10.

COROLLARIUM VI.

211. Hinc si capiantur arcus B_1 , B_2 , Tab.III. B_3 &c., quorum chordæ sint respectivæ ut Fig. 10. 1. 2. 3. &c.; velocitates acquisitæ a gravi in infimo puncto B dum ex quiete descendit per illos arcus, erunt (210) ut numeri illi 1. 2. 3. &c.

CAPUT XII.

De pendulorum motu per arcus circuli, & Cycloidis, ubi præcipuæ Cycloidis proprietates recensentur, ac demonstrantur.

DEFINITIO XXXIII.

212. **P**endulum est grave quodlibet ita suspensum, ut circa punctum aliquod

vi gravitatis descensus, & ascensus reciprocos continuare possit. Descensus autem cum subsequente ascensu *Oscillatio* seu *Vibratio* penduli appellatur.

D E F I N I T I O XXXIV.

213. *Pendulum simplex* est, quod constat unico pondere instar puncti considerato, & appenso linea sive filo gravitatis exparte, circa centrum aliquod convertibili.

D E F I N I T I O XXXV.

214. *Pendulum compositum* est, quod pluribus ponderibus constat eandem distantiam tum inter se, tum a centro circa quod oscillationes fiunt, constanter servantibus.

D E F I N I T I O XXXVI.

Tab.IV. Fig 4. 215. Si circulus NVQ, qui tangit rectam CS in V, more rotarum provoluatur super eadem, & circuitum integrum progrediendo conficiat, punctum N, quod situm in eius circumferentia sub initio tangebatur rectam CS in C, motu suo ex rectilineo & circulari composito, describet curvam lineam CNAS, quae *Cyclois* appellatur. Recta CS dicitur *Basis*, & huic ad medium punctum B perpendicularis AB *Axis*; punctum vero A *Vertex* Cycloidis, & demum circulus NVQ vel huic aequalis in alio situ GBA *Circulus genitor* nuncupatur.

Co-

COROLLARIUM I.

216. Ex huius curvae genefi fatis liquet, quod basis CS aequalis est circumferentiae, CB vero semicircumferentiae circuli NVQ, & in quocumque situ genitoris circuli est CV recta arcui VN aequalis.

COROLLARIUM II.

217. Si recta NE fit basi CS parallela, & secans circulum in G; recta NG aequabitur arcui AG. Cum enim parallelae EN, BC abscindant aequales arcus NV, GB, sitque CV recta arcui VN (216) aequalis, etiam aequalis erit arcui GB. Est vero CB recta aequalis (216) semicircumferentiae AGB; reliqua ergo VB, seu FE aequabitur arcui AG. Sed ob aequales NF, GE, aequantur quoque NG, FE. Ergo & NG aequabitur arcui AG.

PROPOSITIO XXXV.

218. **S**I ZL recta Cycloidem tangat in puncto L, ductaque LE normali ad AB a-Tab.IV.
xem, iungatur chorda AM; haec parallela erit Fig. 4
ZL tangenti.

Ducta HK parallela, & infinite propinqua ipsi LE, agatur MT circulum in M tangens, atque huic parallela LO; liquet, tangentes TM, ZL productas, congruere cum arcubus
infi-

infinite parvis MR , LH . Quoniam rectae ML , RH aequantur respectivis arcibus (217) AM , AR , illarum quoque differentia OH aequabitur ipsi MR , quae differentia est arcuum AM , AR , ideoque eadem OH aequabitur ipsi LO . Sed propter parallelas LO , TR , est LO ad OH , ut TR ad RH , sive ut TM ad ML . Ergo aequantur quoque TM , ML , & isosceles erit triangulum TML . Igitur externus angulus TMG trianguli TML duplus erit interni anguli TLM ; sed idem angulus TMG duplus est etiam anguli AMG (nam angulum TMG metitur dimidius arcus MAG , sive integer AG arcus, cuius medietas mesura est anguli AMG .) Ergo angulus TLM aequabitur AMG , ideoque parallelae erunt AM , ZL . Q. E. D.

COROLLARIUM.

219. Igitur producta chorda AM in P , oriatur parallelogrammum $MPHL$, isoscelesque triangulum MRP , cum simile sit isosceli TML .

PROPOSITIO XXXVI.

Tab. IV. Fig. 4. 220. **Q**uivis arcus AL semicycloidis ALS duplus est correspondentis chordae AM genitoris circuli GBA .

Eadem constructione manente, ducatur chorda AR , & demittatur RI perpendicularis ad AM

AM chordam, seu quod idem est, centro A per R describatur arcus circuli infinite parvus RI. Quoniam (219) isosceles est triangulum MRP, rectaque RI perpendicularis est ad eius basim MP, haec bifariam divisa erit in puncto I, ideoque LH, quae est ipsi MP (219) aequalis, dupla erit rectae MI. Sunt autem LH, MI incrementa momentanea synchrona arcus cycloidalis AL, & chordae AM; crevit ergo arcus AL duplo velocius, quam chorda AM. Is itaque huius duplus erit. Q. E. D.

COROLLARIUM.

221. Igitur puncto L abeunte in S, semicyclois ALS dupla erit diametri AB genitoris circuli GBA.

PROPOSITIO XXXVII.

222. *SI pendulum simplex AV circa punctum fixum A rotetur, & globus V filo Tab. IV. AV appensus, & instar puncti consideratus, oscil- Fig. 5. lando describat arcum circuli PVQ; idem huic globo accidet motus, ac si in arcu immoto circuli PVQ, sublato filo, vi gravitatis volueretur, dummodo nulla sit medii resistentia, nullaque frictio circa immobile punctum A.*

Adducatur globus V ad punctum P, & exinde demittatur, ut vi propriae gravitatis per arcum PQ descendat. Recta PF normalis

lis ad horizontem exponat absolutam vim gravitatis, qua globus V urgetur secundum directionem PF. Haec vis (101) resolvatur in duas vires, quarum alteram referat PE recta, ad arcum seu tangentem PM normalis, sive in directum posita cum filo AP, alteram vero exponat PG recta, quae portio est tangentis. Vis PE tota sustinetur filo AP, atque adeo nihil confert ad globi motum, unde idem globus unica vi PG ad motum sollicitabitur secundum PM rectam. Finge modo globum sublato filo, incumbere immoto arcui PVQ. Quoniam idem arcus spectari potest velut polygonum ex infinitis, atque infinite parvis lateribus rectis constans, cuius latus unum in P positionem habet PM tangentis; utique dum globus per PM planum vi gravitatis relativae sollicitatur in puncto P, vis PE tota, quam sustinebat antea AP filum, modo sustinebitur PM plano, & globus sola vi PG ad motum in plano PM sollicitabitur uti prius. Cum igitur idem in omnibus punctis arcus circuli PVQ eodem modo ostendi possit, patet, filum AP vices subire immoti arcus circuli PVQ, & motum in utroque casu per arcum circuli PVQ eadem perfici ratione. Q. E. D.

COROLLARIUM I.

223. Pendulum simplex CV inter duas lat.
 Tab.IV. minas CTA, CXB immotas, & se contin-
 Fig. 6. gentes in C ita oscilletur, ut filum CV in
 situ

situ ad horizontem normali utramque laminam tangat in puncto C, dum vero pendulum oscillatur, circumplicetur filum laminis curvis, easque perpetuo tangat, veluti in T & X. Per hanc fili applicationem ad laminas, continue impeditur motus gravis in circulo, cogiturque describere curvam aliam AVB. Haec autem curva, uti ex genesi eius liquet, composita est ex infinitis atque infinite parvis arcubus circularum, quorum radii semper crescunt descendente pendulo ex A ad V, decrescunt vero ascendente eodem ex V ad B. Vnde eodem quo usi fuimus ratiocinio (222) demonstratur, pendulum in hac curva eodem modo moveri, ac si grave V libere & absque filo per curvam immotam, & perfecte levigatam incederet.

COROLLARIUM II.

224. Omnia ergo quae de motu gravium in curvis lineis demonstravimus, etiam in motu penduli habent locum. Itaque 1.^o Velocitas penduli illi velocitati aequalis est, quam acquirit cadendo per altitudinem verticalem percurso arcui (205) correspondentem. 2.^o Pendulum ex P demissum urgente vi gravitatis descendet ad infimum punctum V, ubi concepto post lapsum impetu feretur ad aequè altum punctum Q, omnemque ibi (207) amittet celeritatem, ac vi gravitatis sollicitante relabetur denuo ad infimum

Tab. IV.
Fig. 5.6.

G

pua-

punctum V , amissamque velocitatem ibi recuperans, ad punctum P redibit, atque ita continuas oscillationes ita & reditu peragendo in curva linea PVQ , motu perpetuo cieretur, si nulla foret medii resistentia, nullaque circa punctum suspensionis, & laminas incurvatas frictio. Verum enim vero propter has causas, singulis vibrationibus licet insensibiliter velocitas penduli diminuitur, perque breviores arcus continue ferri debet, tandemque prorsus quiescere. 3.^o Velocitates penduli in circumferentia circuli oscillantis, sunt in puncto infimo V , ut chordae (210) arcuum descriptorum.

PROPOSITIO XXXVIII.

Tab. IV. 225. **S**I laminae curvae CTA , CXB sint semicycloides inversae, quarum altitudo seu diameter circuli genitoris EA sit aequalis dimidiaei longitudini CD penduli CV ; grave V oscillando, describet inversam cycloidem AVB , cuius medietates APV , BQV , singulae aequales erunt, similesque semicycloidibus CTA , CXB .

Agantur TG , PH parallelae basi AB , iunganturque AG , DH . Semyclois CTA dupla est (221) EA , atque adeo aequalis (ex hyp.) filo integro CDV ; itaque pervento filo in situm TP , arcus cycloidis TA aequalis erit parti liberae TP , quae cycloidem in T tangit. Vnde cum GA parallela sit
(218)

(218) tangenti TK, eique adeo aequalis, & rursus dupla GA vel dupla TK aequalis sit (220) arcui TA, vel rectae TP; erunt aequales TK, KP. Igitur parallelae GT, PH aequali intervallo distabunt a recta AB, abscindentque proinde ex aequalibus semicirculis EGA, DHV aequales arcus GA & HD; quare angulus GAD aequabitur ADH, ideoque parallelae erunt chordae AG, HD, atque etiam KP, DH, & quadrilaterum PKDH erit parallelogrammum, aequaleque proinde erunt rectae PH, KD. Itaque cum AK sit aequalis GT, vel arcui (217) AG, aut arcui DH, erit KD vel PH aequalis arcui reliquo VH, adeoque punctum P erit (215) in cycloide descripta super rectam AB a genitore circulo DHV, qui aequatur alteri EGA. Pendulum ergo V describit cycloidem AVB, cuius medietates APV, BQV aequales sunt, simileque aliis CTA, CXB. Q. E. D.

PROPOSITIO XXXIX.

226. *SI grave oscilletur in cycloide inversa* Tab. IV.
AVB, cuius vertex est punctum in- Fig. 7.
sumum V; vis acceleratrix qua urgetur ad de-
scensum versus V in loco P, est ad vim ac-
celeratricem, qua urgetur in alio quolibet lo-
co O, ut arcus PV ad arcum OV.

Ducantur ex punctis P & O basi AB pa-
 rallelae PQ, OR, circulum genitorem se-
 cantes in H & S, iunganturque chordae
 G 2 VH,

VH, VS. His positis, grave in loco P descendere nititur in arcu PV per tangentem in loco P tamquam per planum gravitate (179) relativa, & quia tangens per P ducta, parallela est (218) chordae HV, vis illa gravitatis relativae diversa non est ab ea, quam idem corpus haberet in puncto H ad descendendum per chordam HV. Similiter vis, qua grave in loco O urgetur ad descendendum per arcum OV, aequalis est vi eiusdem corporis in loco S ad descendendum per chordam SV. Sed quia chordae HV, SV pari tempore a mobili (191) percurruntur, vires seu gravitates relativae in iisdem sunt (125) ut ipsae chordae; ergo & vis qua grave urgetur in loco P, est ad vim qua urgetur in loco O, ut chorda HV ad chordam SV, hoc est ut arcus PV, qui duplus est (220) chordae HV, ad arcum OV duplum chordae SV. Q. E. D.

PROPOSITIO XL.

227. **T**empora oscillationum penduli per arcus cycloidis utcumque inaequales excurrentis sunt aequalia, hoc est oscillationes in cycloide sunt aequidistantiae.

Tab. IV.
Fig. 7. Descendant simul corpora duo ex locis P & O per arcus PV, OV, & tempus descensus per PV divisum intelligatur in partes aequales infinite parvas, arcus autem PE, OE sint spatiosa in prima parte tempore.

poris absoluta. Quia vires acceleratrices in locis P & O tempore infinitesimo pro (64) constantibus sunt habendae, utique spatiola PE, OF inter se erunt, ut vires (125) acceleratrices in locis P & O, sive etiam (226) ut arcus PV, OV, qui initio motus erant spatia percurrenda. Cum itaque spatiola PE, OF sint, ut spatia PV, OV, utique dividendo, erunt quoque ut reliqua EV, FV, quae remanent describenda, sive (226) ut vires acceleratrices in locis E & F. Sed etiam spatiola in secunda parte temporis describenda, sunt (226) ut vires acceleratrices in locis E & F; ergo erunt quoque ut spatiola PE, OF, sive ut arcus PV. OV. Eodem argumento constabit, spatiola reliquis temporis particulis absoluta, esse inter se in ratione data, quam habet arcus PV ad arcum OV, atque adeo componendo, spatium descriptum a corpore decedente ex loco P in tempore descensus ex P ad V, erit ad spatium descriptum ab alio corpore ex O decedente in fine eiusdem temporis, ut PV ad OV. Sed spatium descriptum a priori corpore in tempore descensus ex P ad V, est PV; ergo & spatium descriptum ab alio corpore in eodem tempore, erit OV. Tempora igitur descensus per arcus PV, OV, ideoque per alios etiam quosvis arcus utcumque inaequales, sunt aequalia inter se, sicut & tempora ascensus subsequentis (209) per arcus VQ, VR. Q. E. D.

COROLLARIUM I.

228. Quod si longitudine penduli CV describatur circulus centro C, cum portio cycloidis prope verticem V eodem ferme motu describatur, circulus ille per V transiens fere coincidit cum cycloidis portione prope verticem V, eritque ipsi aequicurvus, & cum ipso in illo loco V, & prope illum locum confundi sine sensibili errore potest. Quaecumque itaque demonstravi de oscillationibus per arcus cycloides, eadem absque errore physico transferri poterunt ad oscillationes penduli per exiguos arcus circuli. Vnde sequitur, oscillationes per exiguos arcus circuli inaequales, esse ad sensum aequidiuturnas.

COROLLARIUM II.

229. Quoniam quo maior est longitudo penduli CV, eo maior cycloidis portio prope V confunditur cum circulo, cuius radius est CV; ideo quo longiora sunt pendula in circuli arcubus oscillantia, eo maiores oscillationes erunt aequidiuturnae. Hinc si minoribus horologiis aptentur pendula oscillantia inter duas laminas cycloides, maioribus autem pendula sine laminis, sed per exiguos arcus circuli excurrentia, utrumque horologium isochronis pendulorum oscillationibus regi debet, atque adeo aptum erit ad mensuram temporis indicandam.

Co-

COROLLARIUM III.

230. Hinc etiam regulæ conflictus corporum ad exactam trutinam ope penduli re-
 vocantur. Ex punctis A & B in plano ver-
 ticali constitutis, & aequæ altis, pendeant cor-
 pora sphaerica G & D, quæ tendant fila paral-
 lela & aequalia, quorum distantia tanta sit,
 quanta est summa diametrorum globorum G
 & D. Centris A & B, & aequalibus inter-
 vallis AH, BC describantur in plano ver-
 ticali exigui circulorum arcus HE, CF,
 in quibus capiantur portiones H₁, C₁;
 H₂, C₂; H₃, C₃ &c., quarum chordæ
 sint ut numeri 1. 2. 3. 4. &c. respective.
 Si globus G tenso filo AH, ita attollatur,
 ut filum transeat per punctum 4. arcus HE,
 globus vero D similiter attollatur ad pun-
 ctum 3. arcus CF, atque simul demittan-
 tur; hi duo globi simul pervenient ad (227)
 puncta infima, ubi se se contingent, atque
 in se. mutuo directe occurrent cum veloci-
 tatibus, quæ erunt inter se ut numeri 4. &
 3, sive ut chordæ (211) arcum H₄, C₃.
 Quod si post istum globus D ascendat ad
 punctum 4 in arcu CF, & globus G in ar-
 cu HE ascendat ad punctum 3.; erit velo-
 citas globi D ad velocitatem globi G post
 istum, ut 4. ad 3. Atque hoc modo co-
 gnitis globorum ponderibus, eorumque ve-
 locitatibus aut velocitatum rationibus ante
 & post istum, facile erit experientiae su-
 G 4 biice.

biicere leges motus ex conflictu tam in corporibus elasticis, quam in corporibus elastico destitutis.

PROPOSITIO XLI.

Tab IV.
Fig. 7.

231. **T**empus quo mobile velocitate ultimo acquisita per descensum a cycloidis altitudine DV, describit motu aequabili semicircumferentiam circuli DHV, est ad tempus quo motu accelerato descenderet per DV, ut semicircumferentia circuli DHV ad duplam diametrum DV.

Tempus quo mobile motu aequabili cum velocitate acquisita post lapsum per DV, conficit semicircumferentiam circuli DHV, est ad tempus quo motu aequabili cum eadem velocitate absolvit CV, ut semicircumferentia circuli DHV ad (44) CV, sive ad duplam DV. Sed tempus quo mobile motu aequabili cum velocitate acquisita lapsu per DV, percurrit rectam CV, aequatur tempori quo motu accelerato descenderet (136) per DV. Ergo etiam tempus quo mobile motu aequabili cum velocitate acquisita lapsu per DV, percurrit semicircumferentiam circuli DHV, est ad tempus quo motu accelerato descenderet per DV, ut semicircumferentia circuli DHV ad duplam diametrum DV. Q. E. D.

P. O.

PROPOSITIO XLII.

232. **T**empus descensus per semicycloidem Tab. IV.
APV est ad tempus descensus per- Fig. 6.
pendicularis per dimidiam penduli longitudi-
nem, ut semicircumferentia circuli DHV ad
diametrum DV.

Ex puncto P agatur horizontalis PL, eique infinite propinqua, & parallela MN. Agatur chorda VH, quae secet MN in O, atque AD in F, ducaturque tangens circularis HI, nec non chorda DH. Quoniam ob rectum angulum DHV, rectus est quoque eiusdem consequens DHF, estque tangens HI aequalis tangenti DI; liquet, punctum I centrum esse semicirculi transeuntis per puncta F, H, D, ideoque diameter FD dupla erit radii HI. His positis, cum motus per PM pro aequabili sumi (38) queat, tempus per PM ad tempus per HR dum circumferentia describitur motu aequabili definito, est in ratione composita ex directa spatii PM ad spatium HR, & inversa celeritatis in P ad (48) celeritatem in H. Sed prima ratio PM ad HR eadem est ac (218) ratio HO ad HR, sive HF ad HI, ob similia triangula RHO, FIH; & secunda ratio, nempe celeritatis in P ad celeritatem in H eadem est ac ratio celeritatis acquiritae lapsu DL ad celeritatem (205) acquiritam

fitam lapsu DV, five eadem est ac ratio (138) DH ad DV, five HF ad DF, ob similia triangula VDH, DFH. Ergo tempus per PM erit ad tempus per HR in ratione composita ex directa HF ad HI, & inversa HF ad DF, five ut factum ex HF in DF ad factum ex HF in HI, five ut DF ad HI, five ut 2. ad 1., aut ut CV ad DV. Sed tot sunt arcus PM in semicycloide APV, quot sunt arcus HR in semicircumferentia DHV; ergo cum tempus descensus per singulos PM sit ad tempus quo fertur grave per singulos HR, ut CV est ad DV, utique etiam tempus descensus per semicycloidem APV erit ad tempus quo describit semicircumferentiam DHV, ut CV ad DV. Sed tempus quo describit semicircumferentiam circuli DHV, est ad tempus accelerati motus per DV, ut semicircumferentia circuli DHV ad (231) CV. Ergo ex aequo perturbate, tempus descensus per semicycloidem APV erit ad tempus motus accelerati per DV, ut semicircumferentia circuli DHV ad diametrum DV. Q. E. D.

COROLLARIUM I.

233. Igitur duplum tempus descensus per semicycloidem APV erit ad tempus lapsus per dimidiam penduli longitudinem DV, ut circumferentia circuli ad diametrum. Sed tempus unius oscillationis in cycloide AVB duplum est temporis descensus per semicycloidem
dem

dem APV, nam tempus ascensus per VQB aequatur (209) tempori descensus per APV. Ergo tempus unius oscillationis in cycloide ad tempus lapsus per dimidiam penduli longitudinem DV erit, ut circumferentia circuli ad diametrum.

COROLLARIUM II.

234. Quoniam quaecumque demonstravimus de oscillationibus per arcus cycloidaes, transferri possunt ad oscillationes penduli per arcus exiguos circuli (228) excurrentis; etiam tempus unius oscillationis per exiguum arcum circuli erit ad tempus lapsus per dimidiam penduli longitudinem, ut circumferentia circuli ad diametrum.

COROLLARIUM III.

235. Dimidia penduli longitudo AE est ^{Tab. V. Fig. 2.} ad spatium AC descensu perpendiculari unius oscillationis tempore absolutum, ut quadratum diametri ad quadratum circumferentiae. Si enim ponatur grave etiam cadere ex A in E, dimidia penduli longitudo AE erit ad spatium AC descensu perpendiculari unius oscillationis tempore absolutum, ut (136) quadratum temporis lapsus per AE ad quadratum temporis lapsus per AC, vel ut quadratum temporis lapsus per AE ad quadratum temporis unius oscillationis, sive ut quadratum diametri ad quadratum (234) circumferentiae, sive ut 10000. ad 98596., aut
ut

ut 10769. ad 126025., qui numeri sunt quadrata numerorum 100. & 314., atque 113. & 355., exponentium quamproxime rationem diametri ad circumferentiam.

COROLLARIUM IV.

Tab.V. 236. Longitudines pendulorum AB, HP
Fig.2.3 sunt, ut quadrata temporum quibus oscillationes singulae peraguntur. Sint enim AE & HF dimidia longitudines pendulorum, rectae vero AC, HV spatia descensu perpendiculari singularum oscillationum tempore absoluta. Igitur AE erit ad AC, ut quadratum diametri ad quadratum (235) circumferentiae; sed in eadem ratione est (235) quoque HF ad HV. Ergo AE est ad AC, ut HF ad HV, & permutando, AE ad HF erit, ut AC ad HV. Sed spatium AC est (106) ad HV spatium, ut quadratum temporis unius oscillationis penduli AB ad quadratum temporis unius oscillationis penduli HP; ergo in eadem quoque ratione erunt rectae AE, HF, ideoque & longitudines pendulorum AB, HP.

PROPOSITIO XLIII.

237. **N**umeri oscillationum a duobus pendulis eodem tempore peractarum, sunt inverse ut tempora, quibus oscillationes singulae absolvuntur.

Nam

Nam si pendulum unum AB bis oscilletur ^{Tab. V.}
 eodem tempore, quo pendulum aliud HP ^{Fig. 2.3.}
 oscillatur semel, utique pendulum AB qua-
 tuor conficiet oscillationes, dum pendulum
 HP absolvit duas tantum. Similiter pendulo
 AB octo vicibus oscillante, quater oscillabi-
 tur alterum HP pendulum, & sic porro.
 Igitur numerus oscillationum penduli AB e-
 rit ad numerum oscillationum penduli HP
 eodem tempore peractarum, ut 2. ad 1. Por-
 ro quia pendulo AB bis oscillante, semel o-
 scillatur pendulum HP, utique dum illud u-
 nam perficit vibrationem, hoc dimidiam tan-
 tum faciet. Ergo tempus unius oscillationis
 penduli AB est ad tempus unius oscillationis
 penduli HP, ut 1. ad 2., ideoque numeri oscil-
 lationum erunt inverse ut tempora, quibus
 oscillationes singulae peraguntur. Q. E. D.

COROLLARIUM.

238. Cum ergo longitudes pendulorum
 sint (236) ut quadrata temporum, quibus
 oscillationes singulae peraguntur, erunt quo-
 que (237) inverse ut quadrata numerorum
 oscillationum, quae eodem tempore ab illis
 pendulis conficiuntur.

PROPOSITIO XLIV.

239. *SI* **S** *massae aequales B & P, quibus pen-* ^{Tab. V.}
dula isochrona sunt instructa, variis ^{Fig. 2.3.}
motricibus gravitatibus urgeantur; longitudi-
nes

nes pendulorum erunt, ut gravitates motrices.

Tempus unius oscillationis penduli AB est ad tempus lapsus per dimidiam penduli longitudinem AE, ut circumferentia circuli ad (233) diametrum. Similiter tempus unius oscillationis penduli HP est ad tempus lapsus per dimidiam penduli longitudinem HF, ut circumferentia circuli ad (233) diametrum. Igitur tempus unius oscillationis penduli AB est ad tempus lapsus per AE, ut tempus unius oscillationis penduli HP ad tempus lapsus per HF, & permutando, tempus unius oscillationis penduli AB est tempus unius oscillationis penduli HP, ut tempus lapsus per AE ad tempus lapsus per HF. Sed tempora oscillationum in utroque pendulo (*ex hyp.*) sunt aequalia; ergo etiam tempora quibus corpora B & P cadunt per rectas AE, HF, aequalia invicem erunt. Sed vires motrices constantes, quae indefinenter urgent aequales massas, sunt inter se ut spatia ab illis pari tempore (125) absoluta. Ergo & gravitates motrices, quae vires (130) constantes sunt, erunt ut rectae AE, HF, sive ut longitudo pendulorum AB, HP. Q. E. D.

COROLLARIUM I.

240. Quoniam massarum aequalium gravitates motrices sunt, ut gravitates (129) acceleratrices; longitudo pendulorum erunt etiam

etiam inter se, ut gravitates acceleratrices.

PROPOSITIO XXXV.

241. **L**ongitudines pendulorum ad singula minuta secunda oscillantium, in omnibus terrae locis non sunt aequales, sed illae decrescunt pergendo a polo ad aequatorem.

Accurate observationes ab Academicis Londinensibus, & Parisiensibus institutae in variis terrae locis, maxime id evincunt. Et sane anno 1737. D. D. De Maupertuis, Clairaut, Camus, & le Monier Pelli in Laponia in latitudine boreali $66^{\circ} 48'$ invenerunt penduli longitudinem ad minuta secunda oscillantis esse ped. paris. 3. lin. 9. $\frac{17}{100}$. Anno 1728.

D. de Lisle Archangelopoli in latitudine boreali $64^{\circ} 34'$ invenit longitudinem penduli ad minuta secunda oscillantis esse ped. 3. lin.

8. $\frac{13}{20}$. Anno 1732. D. Graham e societate Regia Londinensi, Londini in latitudine boreali $51^{\circ} 30'$ invenit eam esse ped. 3. lin.

8. $\frac{748}{1000}$. Anno 1735. D. de Mairan Parisiis in latitudine boreali $48^{\circ} 50'$ 10." invenit pen-

duli longitudinem esse ped. 3. $\frac{5}{9}$. Anno 1700.

D. des Haies in insula S. Dominici in latitudine boreali $19^{\circ} 48'$ invenit penduli longi-

tu-

tudinem esse ped. 3. lin. 7. Anno demum 1736. in Punta — Palmar sub ipso fere aequatore in latitudine meridionali 2.¹ D. de la Condamine penduli longitudinem invenit ped. 3. lin. 6. $\frac{96}{100}$; & D. Bouguer cum eodem in Rioiama in latitudine meridionali 9.¹ eam invenit ped. 3. lin. 6. $\frac{82}{100}$, vel ped. 3. lin. 6. $\frac{84}{100}$. Ergo pergendo a Polo ad aequatorem decrefcit longitudo penduli ad fingula fecunda fcrupula ofcillantıs. Q. E. D.

S C H O L I O N.

242. Neque vero hae differentiae longitudinum pendulorum ad fecunda fcrupula ofcillantium, refundi debent in varias aeris, & frıctionum refıftentias, aut in difficultatem eas differentias obfervandi, vel etiam ad caloris diverfitatem. Nam 1.^o differentia longitudinum pendulorum aeris, & frıctionum refıftentiae tribui nequit; pendula quippe in obfervationibus per arcus exiguos lente moveri folent, iisque proinde parum admodum refıftere debet aer, & fi illa refıftentia, ficuti & alia frıctionis, fenfibilis fit, utique motum retardat fere eodem modo, & potius minus fub aequatore, quam verfus polos, ubi denfior aer eft, & ubi tamen pendulum velocius ofcillatur. 2.^o Neque reiici etiam poteft in difficultatem has differentias obfervandi; fi-
qui-

quidem diligentissimis observatoribus non difficile fuit saltem in magna latitudinum differentia numerum oscillationum eiusdem penduli tempore unius revolutionis fixarum, & horum numerorum in variis locis differentiam adnotare. Et re quidem vera, idem pendulum quo D. de Maupertuis usus est Pelli in Laponia in latitudine $66^{\circ}.48'$, tempore unius revolutionis fixarum oscillationes peragebat 86453,; Pariis vero in latitudine $48^{\circ}.50'.10''$. tantum 86395., existente differentia facile observabili 58 oscillationum. Sed (238) longitudines pendulorum sunt reciproce, ut quadrata numerorum oscillationum eodem tempore peractarum; ergo cum horum quadratorum differentia sit sensibilis, observabilis quoque erit differentia longitudinum pendulorum. 3° . Differentia longitudinum pendulorum repetenda non est a caloris diverso gradu, quippe in observationibus, quae sub circulo arctico, Londini, Parisiis, prope aequatorem, ac sub ipso aequatore institutae sunt, habita fuit ratio caloris, & inaequalitatis, quae inde in pendulorum longitudine oriri poterat, fuitque ulterius observatum, calorem sub zona torrida maiorem non esse quam nonnullis diebus aestivis in hisce nostris regionibus, ibi quidem diutius perseverare, sed effectus maiores non habere.

PROPOSITIO XLV.

243. **G**ravitas acceleratrix in omnibus terrae regionibus eadem non est, sed decrefcit pergendo a polo ad aequatorem.

Gravitas acceleratrix in diverfis superficiei terrae locis est, ut longitudo penduli ifochroni (240) in illis locis; sed penduli ifochroni longitudo in variis superficiei terrae locis varia est, quin imo ea decrefcit pergendo a polo ad aequatorem (241). Ergo etiam gravitas acceleratrix eadem non est in omnibus terrae locis, sed ea decrefcit pergendo a polo ad aequatorem. Q. E. D.

COROLLARIUM I.

244. Gravitas acceleratrix sub circulo arctico in latitudine $66^{\circ}.48'$ est ad gravitatem acceleratricem sub aequatore, ut 44117. ad 41890. Nam (241) in observatione D. de Maupertuis Pelli instituta in latitudine $66.48'$, penduli longitudo erat ped. 3. lin. 9. $\frac{17}{100}$, hoc est lin. $441. \frac{17}{100}$. In observationibus autem ab aliis Academicis fere sub aequatore peractis, longitudo penduli ifochroni (241) erat ped. 3. lin. 6 $\frac{96}{100}$, vel ped. 3. lin. 6. $\frac{82}{100}$, vel etiam

tiam ped. 3. lin. 6. $\frac{84}{100}$, hoc est mediam capi-
piendo, ped. 3. lin. 6. $\frac{90}{100}$ proxime, seu li-
neis 438 $\frac{90}{100}$. Sed gravitas acceleratrix sub
circulo arctico est (240) ad gravitatem pro-
pe æquatorem, ut longitudo penduli in pri-
mo loco ad penduli longitudinem in secun-
do; ergo gravitas acceleratrix sub circulo ar-
ctico erit ad gravitatem acceleratricem sub
æquatore, ut 441 $\frac{17}{100}$ ad 438 $\frac{90}{100}$, sive ut
 $\frac{44117}{100}$ ad $\frac{43890}{100}$, aut ut 44117 ad 43890.

COROLLARIUM II.

245. Quoniam longitudo penduli sub cir-
culo arctico est ped. 3. lin. 9. $\frac{17}{100}$, & sub æ-
quatore ped. 3. lin. 6. $\frac{90}{100}$; liquet, differen-
tiam longitudinum pendulorum ad minuta se-
cunda sub circulo arctico, atque sub æqua-
tore oscillantium, esse tantum lin. 2. $\frac{27}{100}$, seu
fere lin. 2. $\frac{3}{10}$. Sed differentia longitudinum
pendulorum sub circulo arctico atque sub æ-
quatore, est ut differentia gravitatum (240)
acceleratricum in illis locis; ergo gravitas

H 2

ac-

acceleratrix sub circulo arctico erit ad eius excessum supra gravitatem sub aequatore, ut $441 \frac{17}{100}$ ad $2 \frac{27}{100}$, sive ut $\frac{44117}{100}$ ad $\frac{227}{100}$, aut ut 44117 . ad 227 . seu fere ut 194 . ad 1 . Ergo gravitas acceleratrix sub circulo arctico est ad eam sub aequatore, ut 194 . ad 193 . Ex quo patet, gravitatem acceleratricem sub circulo arctico non multum differre ab illa sub aequatore.

P R O P O S I T I O XLVI.

246. **I**uxta Hugonii observationes, spatium quod grave perpendiculariter cadendo in medio non resistente describit tempore unius minuti secundi, est ped. parif. $15 \frac{1}{12}$. Parisiis vero in latitudine boreali $48^{\circ} 50' 10''$, spatium illud est ped. parif. 15 . dig. 1 . lin. $\frac{7}{9}$.

Hugenius penduli ad singula minuta secunda oscillantis longitudinem adinvenit ped. 3 . lin. $8 \frac{1}{2}$; sed pes unus continet digitos 12 . & unus digitus 12 . lineas, adeoque pes unus constat lineis 144 . Ergo illa penduli longitudo erat lin. $\frac{881}{2}$, & dimidia longitudo $\frac{881}{4}$. Sed (235) est quadratum diametri ad quadratum circumferentiae, ut dimidia penduli longitudo ad spatium, quod grave perpendiculariter cadendo describit tempore unius oscillationis, sive unius minuti secundi; ergo

10000.

10000. erit ad 98596., ut lin. $\frac{881}{4}$ ad ipsum spatium, quod per regulas proportionis erit quamproxime lin. 2172., & dividendo per 144., prodibunt pedes $15\frac{1}{12}$. At D. de Mairan invenit Parisiis longitudinem penduli ad secunda minuta oscillantis esse ped. 3. lin. 8. $\frac{5}{9}$, unde eodem calculo instituto, sed adhibita accuratiori ratione diametri ad circumferentiam, nempe 10000. ad 31415., inveniemus spatium uno minuto secundo descensu perpendiculari descriptum, esse ped. 15. dig. 1. lin. $\frac{7}{9}$. Q. E. D.

C A P V T XIII.

De Proiectorum Corporum motu.

D E F I N I T I O XXXVII.

247. **G**Rave *horizontaliter* proiici dicitur, si impellitur secundum lineam directionis horizonti aequidistantem. Dicitur vero *oblique* proiici, si impellitur secundum directionem, quae cum horizontali obliquum angulum facit.

D E F I N I T I O XXXVIII.

Linea iuxta quam fertur grave proiectum, eius *semita* dici solet, & angulus quem linea
H 3 pro-

projectionis cum horizontali constituit, vocatur *angulus projectionis*; spatium vero horizontale emensum a projecto, *amplitudo semitae* dici solet.

PROPOSITIO XLVII.

249. **S***I mobile proiciatur horizontaliter, aut oblique, eiusdem semita curva erit.*

Tab. V.

Fig. 45.

Mobile K, quod veluti gravitatis expers considero, proiciatur secundum directionem AX; tempus autem lationis in partes aequales ita divisum intelligatur, ut in prima parte temporis feratur mobile ex A ad B. His positis, si nulla alia corpori vis accederet, illud cum eadem (67) velocitate progrediretur in recta illa, absolveretque aequalibus temporibus totidem spatia, ipsi AB aequalia. At si vis quaecumque impulsu unico in ipsum agere supponatur, motumque illi communicare, quo secundum directionem perpendicularem ad horizontem (priori sublato motu) absolveret aequabiliter AL rectam in prima temporis parte, movebitur motu (96) composito ex utroque per diagonalem AG, & sequenti temporis parte describeret GI rectam, ipsi (67) AG aequalem. Verum si in puncto G vis eadem secunda vice eodem impulsu agat, quo mobile secunda parte temporis describat GF rectam; motus ex priore, & hoc motu compositus erit secundum rectam GM, quam in secunda parte tem-

po-

poris permeabit, indeque in tertia absolveret
 aequabiliter spatium MN, ipsi (67) GM ae-
 quale. At si in M vis eadem tertio agat,
 mobile e semita MN detorquebitur in MO,
 postque tertiam temporis partem reperietur
 in puncto O, atque hac lege proiectum mo-
 tu suo describet polygonum AGMOQ. Quod
 si singulae partes temporis ponantur minui
 in infinitum, ipsarumque numerus infinitum
 crescere concipiantur; latera polygoni mi-
 nuentur in infinitum, & ipsarum numerus in
 infinitum augebitur, atque ita polygonum in
 curvam lineam convertetur, hoc est si vis
 deorsum impellens talis sit, ut constanter,
 atque indefinenter in corpus agat secundum
 directionem perpendicularem ad horizontem,
 qualis profecto est vis gravitatis qua mobile
 K urgetur; illud hac vi agente, in curva
 linea progredietur. Q. E. D.

COROLLARIUM I.

250. Liquet rectam AX curvam contin-
 gere in puncto A. Nam statim ac mobile Tab. v.
 ferri incipit per AX, gravitatis actione re- Fig. 4.5
 trahitur ab hac recta, cogiturque ferri in
 curva, atque adeo recta AX nusquam cum
 curva convenit, quam in A, atque adeo e-
 rit tangens.

COROLLARIUM II.

251. Patet quoque, singulas rectas BG, IM,
 NO &c. invicem esse aequales, & paralle-
 las;

las; exponunt siquidem spatia aequalia, quae gravitatis vi impellente, singulis tempusculis absolvit grave. Et quia gravium directiones in tota semita AGMOQ pro (164) parallelis haberi queunt; sequitur rectas BG, IM, NO &c. esse quoque invicem parallelas.

COROLLARIUM III.

252. Si rectae MI, ON, QP productae intelligantur, donec convenient cum AX in punctis C, D, E; secabitur recta AE in partes aequales in punctis B, C, D. Cum enim rectae BG, IM sint (251) invicem parallelae, AG erit ad GI, ut AB ad BC; est vero AG ipsi GI (249) aequalis. Ergo & AB aequabitur ipsi BC. Similiter propter parallelas BG, CM, DO, est GM ad MN, ut BC ad CD; sed est GM ipsi MN (249) aequalis. Ergo & BC aequabitur ipsi CD. Eodem ratiocinio constabit, aequales fore CD, DE.

COROLLARIUM. IV.

253. Grave motu composito describit par-
 Tab. V. tem polygona AGMO eodem tempore, quo
 Fig. 4 f. motu aequabili projectionis percurrisset cor-
 respondentem rectam AD. Cum enim rectae AB, BC, CD invicem sint (252) aequales, utique mobile motu aequabili projectionis eas pari tempore percurrisset; sed prima parte temporis absolvit rectam AB. Ergo post tertiam partem temporis pervenisset mobile ad
 pun-

punctum D; sed idem grave post tertiam partem temporis motu composito (249) reperitur in puncto O. Ergo eodem tempore describit partem polygoni AGMO, quo sola vi projectionis percurrisset rectam AD.

COROLLARIUM V.

254. Cum projecti semita curva sit (249), numquam mobile eam sequitur directionem, iuxta quam impellitur a vi impressa, sed a vi gravitatis deorsum inflecti debet. Colligendum ergo altius est, ut projectum attingere scopum queat. Quod si in distantis minimis globus tormenti bellici praecise dirigi ad scopum soleat, id non alia ex causa fit, quam quod brevissima eius semita tam modice incurvatur, ut pro recta linea proxime sumi queat.

PROPOSITIO XLVIII.

255. **D**ato quolibet puncto D, ad quod per-
venisset mobile K motu aequabili Tab. V.
Fig. 6.7.
projectionis, invenire portionem curvae AO,
quae eodem tempore a mobili est descripta.

Ducatur ex puncto D verticalis recta DO, occurrens curvae in O: dico, arcum curvae AO quaesitum esse. Arcus enim AO spectari potest velut polygonum ex infinitis laterculis rectis constans; igitur si ex singulis angulis, quos haec latera comprehendunt,
 du-

ductae intelligantur totidem rectae, ipsi OD parallelae, quae in totidem punctis aequaliter (252) dividunt AD rectam; liquet, arcum AO tot exigua latera contenturum, quot aequales partes continet recta AD. Sed singula haec latera curvae AO eodem tempore motu composito absolvuntur, quo motu aequabili projectionis describerentur (249) partes singulae rectae AD. Ergo dum corpus K motu aequabili projectionis pervenisset ad punctum D, motu composito describeret AO arcum. Q. E. I.

COROLLARIUM I.

256. Quia mobile K eodem tempore, quo motu aequabili projectionis migrasset ex A in D, motu composito describit (255) arcum AO; patet, vim gravitatis perinde egisse in corpus K ac si secundum propriam directionem toto illo tempore impulisset ipsum per DO, seu per AG.

COROLLARIUM II.

257. Dum ergo corpus motu aequabili projectionis pervenisset ex A in D, vi unica gravitatis impulsus, motu accelerato descendisset ex A in G.

PROPOSITIO II.

Tab. V 259. *SI corpus K proiciatur iuxta rectam*
Fig. 6 7. *AX, eiusdem semita erit parabola*
AMQ,

AMQ, habens pro diametro verticalem rectam *AH*, & pro ordinatis rectas *FM*, *GO*, parallelas tangenti *AX*.

Quoniam grave *K* eodem tempore quo motu aequabili projectionis tendit ex *A* in *C*, urgente sola vi gravitatis descendisset (257) ex *A* in *F*, & tempore quo migrat ex *A* in *D* motu aequabili projectionis, vi gravitatis sola urgente cecidisset libere per *AG*; patet, tempus lapsus per *AF* esse ad tempus lapsus per *AG*, ut tempus per *AC* ad tempus per *AD*, sive (44) ut *AC* ad *AD*, unde quadratum temporis quo labitur per *AF*, erit ad quadratum temporis lapsus per *AG*, ut quadratum *AC* ad quadratum *AD*. Sed *AF* est ad *AG*, ut quadratum (136) temporis quo labitur per *AF*, ad quadratum temporis lapsus per *AG*; ergo & *AF* est ad *AG*, ut quadratum *AC* ad *AD* quadratum, sive ut quadratum *FM* ad *GO* quadratum. Sed haec est praecipua proprietas lineae parabolicae, cuius tangens est *AX*, diameter *AH*, atque ordinatae *FM*, *GO*; ergo parabolica erit projecti semita *AMQ*. Q. E. D.

PROPOSITIO L.

259. **S**I corpus *K* proiciatur secundum re-
ctam *AX* ea velocitate, quam obti-
neret cadendo ex *S* in *A*; describet parabola-
lam

Tab. v.

Fig 6.7.

Ducatur BG ipsi AX parallela, atque traiciatur per B verticalis linea DBR. Quia sunt parallelae BG, MA, est BM ad MT, ut GA ad AT; sed BM est aequalis MT. Ergo & GA aequalis erit AT. Similiter BG est ad MA, ut BT ad TM; sed BT est dupla TM. Ergo & BG dupla erit MA, atque illius quadratum quadruplum huius erit. Sed MA quadratum aequale est rectangulo TAS, sive rectangulo ex AT vel AG in rectam AS. Igitur BG quadratum aequabitur quoque rectangulo ex AG in quadruplam rectae AS, atque ita BG erit ordinata parabolae, cuius diameter est AG, tangens AX, & parameter quadrupla rectae AS. Sed haec parabola eadem prorsus est cum illa, quam describit grave, dum (259) proiicitur iuxta AX cum ea velocitate, quam acquisivisset cadendo ex S in A. Ergo proiecti semita parabolica transibit per punctum B. Q. E. D.

COROLLARIUM I.

261. Quia horizontalis BT ita occurrit diametro AG parabolae ABH, ut sint aequales AG, AT; utique BT parabolam tanget in puncto B.

COROLLARIUM II.

262. Cum horizontalis BT tangat in B verticalem parabolam ABH; liquet, B esse punctum sublime, aut verticem parabolae ABH.

Co-

COROLLARIUM III.

263. Ducta ergo amplitudine horizontali AH, quae parallela erit horizontali rectae TB, parabolam tangenti in puncto B, eadem AH amplitudo ordinata erit parabolae ABH, habentis pro axe verticalem rectam BR. Quare AH dupla erit rectae AR, vel TB, hoc est quadrupla rectae MT, quae ordinata est semicirculi AMS.

COROLLARIUM IV.

Tab. VI. 164. Maxima distantia, ad quam tormen-
Fig. 2. tum bellicum eadem pulveris pirii copia, & qualitate explodere globum potest, est dum projectio fit sub angulo semirecto. Si enim globus ab actione pulveris iaculatus sub semirecto angulo MAH, eam velocitatem habuerit, quam obtinisset cadendo ex S in A, utique recta TM utpote radio aequalis, maxima erit omnium ordinarum semicirculi SMA, unde amplitudo AH, quae quadrupla est (263) MT, maxima omnium erit.

COROLLARIUM V.

Tab. VI. 265. Globi autem eadem pulveris copia
Fig. 2. & qualitate projecti secundum directiones AL, AF, aequidistantes a recta AM, quae cum AH facit angulum semirectum, describent curvas AG, AK mutuo convenientes in horizontis aliquo puncto I, ideoque ad
aequa-

aequales distantias a tormento bellico explo-
dentur. Cum enim sint aequales arcus LM,
FM, aequabuntur etia reliqui SL, AF, at-
que ordinatae EL, NE. Sed amplitudo se-
mitae AG quadrupla (263) est EL, & se-
mitae AK amplitudo quadrupla (263) est
NF; ergo utrique semitae AG, AK eadem
prorsus competit amplitudo, ideoque ambae
convenient in horizontis aliquo puncto I.
Igitur si amplitudo solum consideretur, perin-
de est siue proiciatur globus iuxta directio-
nem AL, siue secundum AF rectam. Hoc
autem discrimen est inter utramque proie-
ctionem, quod inferior iactus sit adhibendus,
quoties murus aliquis verticalis diruendus
est, si vero urbium recta fuerint perrum-
penda, praestat tunc adhibere altiore iac-
tum.

S C H O L I O N I.

266. Vt autem tormentum bellicum sub ^{Tab.VL}
dato angulo eleuetur, opus est regula lignea, ^{Fig. 3.}
aut metallica MBD, cui adhaeret rectangu-
lum BFED cum semicirculo BLD, diviso in
suos gradus, ex cuius centro C pendet fi-
lum pondere P instructum. Et sane, si dan-
da sit tormento bellico inclinatio grauum 40;
regula MBD ita in os machinae introduca-
tur, ut congruat cum eius axe. Deinde tor-
mentum bellicum tamdiu attolli debet, aut
deprimi, donec filum CP designet in semi-
circuli limbo K arcum LK graduum 40. Hoc

pe-

peractō; dico, tormenti axem MD cum horizontali MH comprehendere angulum graduum 40. Nam productō filo donec occurrat ipsi MH in N, rectus (159) erit angulus CNM, adeoque etiam recto aequales erunt duo simul anguli CMN, MCN seu BCK. Sed quia arcus BL est graduum 90., recto quoque aequantur simul anguli LCK, BCK; ergo angulus CMN aequatur alteri LCK. Sed angulus LCK est graduum 40.; ergo totidem graduum erit etiam angulus CMN.

S C H O L I O N II.

267. Quae de semitis proiectorum sumus haecenus demonstrati, in vacuo solum, atque in aere proxime habent locum, ubi nimirum resistentia nulla est, aut insensibilis relate ad pondus corporis. Caeterum si foret sensibilis resistentia medii per quod transit proiectum, tunc motus projectionis non esset amplius uniformis, sed retardatus iuxta eam legem, qua resistere medium solet, ideoque proiecti semita non esset amplius parabolica. Proiecti semitam in hoc casu determinarunt Newtonus, Wolfius, aliique.

CAPVT XIV.

De vi centripeta, & centrifuga.

DEFINITIO XXXIX.

268. **V**is centripeta est vis illa, qua mobile aliquod e motu rectilineo continue detorquetur, & versus centrum aliquod indefinenter urgetur.

SCHOLION.

269. Cum corpus quodlibet semel motum, secundum eandem rectam nitatur semper (67) progredi uniformiter; patet, nullum mobile posse orbitam aliquam describere motu suo, nisi vi quadam versus centrum aliquod indefinenter agente, in ea orbita detineatur. Rotetur mobile uniformi cum motu in circumferentia circuli EAC; hoc ubi ad A pervenerit, sublata vi illa, qua in orbita detineatur, per tangentem AB protinus (70) avolare. Vt ergo retineatur mobile in circumferentia circuli EAC, opus est, ut interea dum mobile describeret rectam infinite parvam AB, vis quaequam in illud agens, ipsum retrahat per BC, sive AH, normalem scilicet ad AB; his enim duabus viribus simul iunctis feretur (96) mobile motu composito per AC arcum, qui pro recta linea sumi potest.

Tab. VI.
Fig. 4.

I

Co-

COROLLARIUM.

270. Quoniam vis centripeta infinitesimo saltem tempore (64) constans est, vis autem motrix constans exponi potest per spatium, quod eadem urgente vi dato illo tempore (125) absolvit corpus; sequitur, vim centripetam etiam exponi posse per spatium tempore infinite parvo a mobili absolutum. Quare cum illud spatium (169) sit BC, utriusque vis centripeta exponi potest per hanc rectam.

DEFINITIO XXXIX.

271. *Vis centrifuga* est renixus, quo corpus obstat vi centripetae, conanti illud retrahere a tangente.

COROLLARIUM.

272. Igitur vis centrifuga est *reactio*, centripeta autem *actio*. Et quia (79) reactio aequalis, & contraria est actioni, etiam vis centrifuga aequalis erit vi centripetae, & contraria; quare cum vis centripeta exponi (270) soleat per BC, etiam vis centrifuga exponi poterit per hanc rectam.

SCHOLION I.

273. Id quidem constat in funda. Cum enim filum aequaliter tendi soleat, vis qua lapis trahitur versus manum, aequabitur illi vi qua manus trahitur versus lapidem.
Sed

Sed vis qua lapis trahitur versus manum, centripeta est, quae vero trahit manum versus lapidem, est centrifuga; ergo vis centripeta contraria est centrifugae, & aequalis.

S C H O L I O N II.

274. Itaque vis centrifuga confundi nequit cum illa vi, qua corpus conatur progredi per tangentem, quaeque etiam dicitur *tangentialis*; tantum siquidem est discriminis inter illas, ut prima sit ad alteram, veluti magnitudo quaevis finita ad infinitam. Esto ^{Tab VI.} AC pars circumferentiae infinite parva, cuius ^{Fig 4.} proinde chorda quae cum arcu confundi debet, infinitesima etiam erit, hoc est ad finitam quamlibet magnitudinem veluti ad diametrum AE, eam rationem habebit, quam finita quantitas ad infinitam. Demissa intelligatur ex puncto C ad AE perpendicularis CH, quae abscindet AH rectam infinitesimam respectu AE, atque adeo rectae AE, HE pro aequalibus sumi poterunt. Quoniam chorda arcus AC infinite parva est respectu AE, multo magis HC, quae minor est chorda arcus AC, infinite parva erit respectu AE, vel HE. Sed AH est ad HC, ut eadem HC ad HE; ergo cum HC infinite parva sit respectu HE, etiam AH vel BC infinite parva erit respectu HC vel AB. Sed vis centrifuga est ad vim tangentialem (125), ut BC ad AB; ergo etiam illa ad hanc erit, ut finita quantitas ad infinitam.

L E M M A III.

Tab. VI. 275. *SI in circulis concentricis ACH, DFL*
 Fig. 5. *sumantur arcus quicumque similes AC,*
DF, atque ex punctis C & F ducantur CB,
FE, radio IA parallelæ, quas rectas AB,
DE tangentes circulos in A & D, secens in
punctis B & E; rectæ BC, EF erunt, ut ra-
dii AI, DI.

Iungantur chordæ AC, DF. Quoniam arcus AC, DF ponuntur similes inter se, iuncta IC transibit per punctum F. Porro in triangulis AIC, DIF est AI ad ID, ut CI ad IF; ergo AC recta parallela erit rectæ DF, atque angulus IAC æquabitur IDF. Sed etiam rectus angulus IAB æquatur recto alteri IDE; ergo reliquus angulus CAB æqualis erit reliquo FDE. Recti autem seu æquales sunt etiam anguli ABC, DEF; igitur triangulum ABC simile erit alteri DEF, ideoque BC erit ad EF, ut AC ad DF. Sed propter parallelas AC, DF, est AC ad DF, ut AI ad DI; ergo etiam BC erit ad EF, ut radius AI ad DI radium. Q. E. D.

P R O P O S I T I O LII.

276. *SI duo mobilia æqualia æqualibus temporibus circumferentias inæquales uniformi motu describant; erit vis centrifuga in*

in maiori circumferentia ad eam, quae in minori, sicuti ipsarum radii inter se.

Mobile A describat aequabiliter circumferentiam ACH, atque eodem tempore mobile aliud D circumferentiam DFL: dico, vim centrifugam mobilis A esse ad eam mobilis B, ut radius AI ad radium DI. Ponantur arcus infiniti parvi AC, DE eodem tempore absolvi a mobilibus A & D. Quoniam mobilia A & D describunt eodem tempore (*ex hyp.*) circumferentias ACH, DFL, utique pari tempore etiam describent partes similes earundem. Atqui etiam (*ex hyp.*) absolunt pari tempore arcus AC, DE; ergo hi similes etiam erunt, ideoque BC erit ad EF, ut AI ad DI (275). Sed vis centrifuga mobilis A est ad vim centrifugam mobilis D, ut (272) BC ad EF; ergo vis centrifuga mobilis A erit quoque ad vim centrifugam mobilis B, ut radius AI ad radium DI. Q. E. D.

COROLLARIUM I.

277. Hinc si tellus vertitur circa axem diurno motu, homines, aliaque corpora globo terraqueo insistentia, centrifugam vim adquirent, qua nitentur recedere a centro terrae, & revera recederent, si illorum gravitas huic nisui non obstaret. Haec autem vis centrifuga in aequatore maxima est. sub polis nulla, media demum in intermediis terrae locis. Nam dum tellus volvitur cir-

Tab. VI.
Fig. 6.

ca axem PQ, partes constitutae ad polos P & Q non moventur, atque adeo vim centrifugam nullam habent. At dum pars terrae in loco R sub aequatore, describit diurno motu circumferentiam, cuius radius est CR, pars terrae in loco D describit circumferentiam, cuius radius est DI, axi terrae PQ normalis. Ergo (276) vis centrifuga in loco R erit ad eam in loco D, ut radius CR ad radium ID. Sed CR radius maior est radio ID; ergo & vis centrifuga in loco R erit maior vi centrifuga in loco D. Eodem ratiocinio constabit, vim centrifugam in loco R excedere quamvis aliam; ergo illa maxima omnium erit.

COROLLARIUM II.

278. Hinc gravitas sub polis maxima esse debet, sub aequatore minima, media vero in intermediis terrae locis. Recta RK exponat vim centrifugam loci R, recta autem DF vim centrifugam loci D; liquet, totam centrifugam vim RK directioni gravium adversari, huic vero obliquam esse centrifugam vim DF. Age modo, videamus quanta sit pars centrifugae vis DF, quae directe opponitur gravitati. Hoc obtinebimus (96) resolvendo centrifugam vim DF in duas alias DH, DG, quarum altera vis DH directe opponitur gravitati, altera vis DG ipsi normalis, gravitatis actionem nequaquam impedit. Iam vero centrifuga vis in R est (*ex hyp.*) ad centri-

I +

fu-

fugam vim in D, ut RK ad DF; sed etiam prima vis centrifuga (276) est ad aliam. ut CR ad ID, vel ut CD ad ID. Ergo RK erit ad DF, ut CD ad ID; sed ob similia triangu-
 gula CDI, FDH, est CD ad ID, ut DF ad DH. Ergo etiam RK erit ad DF, ut eadem DF ad DH, ideoque RK erit ad DH, ut quadratum RK ad DF quadratum, sive ut quadratum CR ad quadratum ID. Sed cum gravia in R & D viribus RK, DH nitantur recedere a centro C contra gravitatis directionem, rectae RK, DH exponent decrementa gravitatis in illis locis; ergo ponderis decrementum in loco R erit ad decrementum ponderis in loco D, ut quadratum semidiametri aequatoris CR ad quadratum rectae ID, quae dicitur *Cofinus* latitudinis datae RD. Apparet itaque, quod si tellus vertitur circa axem, actio gravitatis maxima erit sub polis, sub aequatore minima, atque in locis intermediis media.

COROLLARIUM III.

279. Hinc si tellus vertitur circa axem, Tab. VI. maris aquae ad aequatorem R constitutae, Fig. 7. minori vi gravitatis urgeri debent, quam quae sunt positae ad polos P & Q. Cum autem omnia fluida servant aequilibrium inter se, & aquae in R minus gravitent, quam in P, necessario in R debent elevari altius quam in P, ut minor gravitas in R a quantitate maiori fluidi compensetur. Mare igitur

tur sub æquatore debet esse altius quam sub polis.

C O R O L L A R I U M IV.

280. Et quoniam continentis superficies eadem ferme est, quæ maris; sequitur continentem sub æquatore elevari altius quam sub polis, ideoque figuram terræ sphaeroidis instar esse, elevatæ quidem ad æquatorem in R & E, compressæ vero ad polos P & Q.

L E M M A IV.

Tab. VI. 281. *SI in circulo BFAE, capiatur arcus infinite parvus EA, atque ad diametrum BA agatur ex E perpendicularis EM; quadratum arcus EA sumi potest velut æquale rectangulo BAM.*
Fig. 8.

Iungantur chordæ EB, EA. Cum ex angulo recto E trianguli BEA, demissa sit ad BA perpendicularis EM; diameter BA erit ad chordam EA, ut eadem chorda EA ad AM, ideoque quadratum chordæ EA æquale erit rectangulo BAM. Sed arcus infinite parvus EA pro eius chorda accipi tuto potest; ergo etiam quadratum arcus EA sumi potest velut æquale rectangulo BAM.
Q. E. D.

C O R O L L A R I U M.

282. Quoniam rectangulum BAM duplum est

est rectanguli CAM, consequens est, ut quadratum arcus infinite parvi AE duplum sit etiam rectanguli CAM.

PROPOSITIO LII.

283. **S**I quodvis corpus in circumferentia circuli uniformi incedat motu ea quidem celeritate, quæ acquiritur cadendo ex altitudine LA; vis centrifuga ad pondus corporis erit, ut dupla altitudo LA ad radium CA. Tab VI.
Fig. 8,

Intelligatur mobile cadere ex L in V eodem tempore illo, quod insumit in percurrento æquabiliter infinitesimo arcu AE. Rursus idem mobile concipiatur cadere per LA, indeque velocitate ultimo acquisita, absolvere pari tempore AG rectam, quæ (136) dupla erit LA. Hoc posito, quia mobile eadem velocitate percurrit spatia AE, AG, utique AE ad AG erit, ut tempus per AE ad (44) tempus per AG. Sed tempus per AE idem est (*ex constr.*) cum tempore lapsus per LV, & tempus per AG idem (*ex constr.*) cum tempore lapsus per LA; ergo etiam AE erit ad AG, sive ad duplam LA, ut tempus lapsus per LV ad tempus lapsus per LA. Igitur quadratum AE ad quadruplum quadrati LA erit, ut quadratum temporis per LV ad quadratum temporis per LA, sive (136) ut LV ad LA, & factum ex quadrato AE in LA æquabitur facto ex quadruplo qua-

quadrati LA in LV, & (dividendo utrumque factum per LA) quadratum AE aequabitur facto ex quadrupla LA in LV, seu quadruplo rectanguli ALV. Sed idem AE quadratum aequale est (281) duplo rectanguli CAM; ergo duplum rectanguli CAM aequale erit quadruplo rectanguli ALV, seu rectangulum CAM aequabitur duplo rectanguli ALV; atque adeo AM erit ad LV, ut dupla AL ad CA, seu DE erit ad LV, ut dupla AL ad CA. Est autem (125) vis centrifuga ad gravitatem, ut spatium DE ad spatium LV; ergo & vis centrifuga erit ad gravitatem, ut dupla AL ad CA. Q. E. D.

COROLLARIUM I.

284. Hinc ratio reddi potest, cur calix vitreus plenus aqua, atque impositus latae fasciae, nihil effundat aquae si motu aequabili circulariter moveatur. Ponamus siquidem aquam ea circumvolui celeritate, quae acquiritur cadendo ex altitudine pedum 15, atque 3. pedum esse radium circuli, quem describit. Igitur (281) vis centrifuga erit ad pondus aquae, ut 30. ad 3., sive ut 10. ad 1. Cum igitur in hoc casu vis centrifuga decies pondere maior sit, ea in omni puncto circumferentiae apprimer aquam calicis eius fundo.

COROLLARIUM II.

284. Si duo mobilia pondere inaequalia F
& H,

& H, eadem velocitate rotentur in circum-^{Tab VI.}
ferentia circuli BFAE; vires centrifugae e-^{Fig. 8.}
runt, ut pondera eorundem. Finge enim, ve-
locitatem communem utrique corpori F &
H, acquisiram fuisse cadendo ex L in A.
Igitur (183) vis centrifuga mobilis F erit
ad eius pondus, ut dupla altitudo LA ad ra-
dium CA. Similiter vis centrifuga mobilis H
erit ad eius pondus, ut dupla altitudo LA
ad (203) radium CA. Ergo vis centrifuga
mobilis F erit ad eius pondus, ut vis cen-
trifuga mobilis H ad pondus suum, & per-
mutando, vis centrifuga mobilis F erit ad
vim centrifugam mobilis H, ut pondus mo-
bilis F ad pondus mobilis H.

COROLLARIUM III.

285. Hinc si fluidum corpus & solidum
ipsi immersum, aut etiam si duo fluida va-
riae specificae gravitatis veluti mercurius
vivus & aqua, tubo vitreo includantur, ilque
postea ad horizontem inclinatus circulariter
moveatur; corpus gravius ob centrifugam
vim (284) maiorem, ascendere debet altius
prae leviori. Ex eodem quoque principio
fluit, quod inter cribrandum graviora grana
tritici circumferentiam cribri petant, dum
contra, paleae leviores colliguntur ad cen-
trum cribri.

COROLLARIUM IV.

286. Hinc male Cartesius statuit, planetas
omnes

omnes circa solem deferri a vorticoso caelestis materiae motu. Supponit siquidem hic philosophus, quod dum sol vertitur circa axem, communicet circula rem motum materiae caelesti, quae ipsum ambit undique, & circumdat, extenditurque ad Saturnum usque, adeoque concludit, planetas omnes a vorticis materia abreptos, moveri circulariter circa solem. At vel caelestis materia specificè gravior est planeta, aut levior ipso est. Si primum asserant cartesiani; fateri utique etiam debent, quod caelestis materia ob centrifugam vim maiorem a vorticis centro fugiat, cogatque planetam ipsum accedere (285) ad centrum solis, quod cartesianum sistema prorsus destruit. Si vero alterum asseratur; necessario sequitur, ipsum planetam ob centrifugam vim maiorem, semper recedere a centro solis (285), tandemque ad limbum vorticis avolare, quod in cartesiani hypotesi est absurdum. Ergo superest ut dicatur, materiam vorticis gravitare aequaliter ac planeta; at si haec hypothesis admittatur, quis non videt, planetas omnes pari tempore completuros suas periodos circa solem? Quod cum astronomicis observationibus sit contrarium, concludi debet, a vero prorsus abluere hypotesim cartesianam, explicandis planetarum motibus adinventam.

COROLLARIUM V.

287. Si mobile in circumferentia circuli
mo-

moveatur ea velocitate, quam acquirit cadendo ex altitudine, quae quartae parti diametri sit aequalis; habebit conatum recedendi a centro aequalem suae gravitati, hoc est aequè valide filum quo retinetur, trahet, atque cum illo suspensum est. In hoc etenim Tab. VI. casu altitudo LA , unde cadere debet gra- Fig. 8. ve, ut eam velocitatem acquirat, qua circumfertur in circulo $BFAE$, quarta pars erit diametri BCA , atque adeo dupla LA aequabitur radio AC . Sed vis centrifuga (183) est ad pondus, ut dupla LA ad radium AC ; ergo cum dupla LA aequalis sit radio AC , etiam vis centrifuga aequalis ponderi erit.



PARS



PARS SECVNDA

SEV

MECHANICA PRACTICA

CAPUT I.

De veste, machinarum simplicium prima.

DEFINITIO I.

288.



Est a mechanicis appellatur linea recta rigida, fulcro innixa, ponderibus elevandis, aut sustinendis accommodata.

SCHOLION I.

289. Vt in casu aequilibræ unice mens versetur circa rationem ponderis ad potentiam machinae applicatam, neque ad alia distrahatur, inter se mechanici convenere, ut vestem, aliasque machinas sic spectarent, quasi carerent pondere, atque massa, consta-

starentque ex lineis tantum, & figuris geometricis plane rigidis, gravitate expertibus, & frictione. Hic autem modus abstracte machinas contemplandi, non quidem impedit, quin mechanicus spectet postea, & consideret qualitates, quas physice ipsae habent, ut inde colligat vim mentuam, quae praerequiratur, ut frictio superetur, motusque machinis imprimatur.

SCHOLIUM II.

290. Circa vectem tria sunt maxime distinguenda. 1.^o Nempe pondus sustinendum, aut elevandum R. 2.^o Potentia P, quae pondus elevat, aut sustentat. 3.^o Fulcrum C, cui vectis inniti solet, & super quo rotatur, dum immobile ipsum manet. Ex situ vario horum trium, tria vectis genera oriuntur.

Tabula
VII.
Fig. 1. 2.
3.

DEFINITIO II.

291. Vectis *primi generis* est, quando fulcrum medium tenet locum inter potentiam, atque pondus. *Secundi generis* vectis dicitur, quando pondus inter potentiam, & fulcrum iacet. Denique in *tertii generis* vecte potentia agit inter pondus, & fulcrum.

DEFINITIO III.

292. Vectis *inflexus* ille est, cuius radii, aut brachia AC, BC comprehendunt angulum ACB.

Tabula
VII.
Fig. 4

DE-

DEFINITIO IV.

293. *Pondus* appello quidquid ope vestis sustineri, deprimi, aut etiam attolli potest. Quod vero sustinet pondus, deprimat, aut attollit, *Potentiam* voco.

SCHOLION.

294. Si potentia machinae applicata, fuerit inanimata, cuiusmodi est grave appensum; tunc ex pondere appensi corporis statim liquet potentiae *quantitas absoluta*. Ita si grave appensum fuerit librarum 100., totidem librarum quoque erit potentiae quantitas absoluta. At si potentia fuerit animata veluti homo; tunc ut absoluta eius potentia detegatur, inquirere opus est, quot libras ponderis possit homo propriis viribus elevare. D. de la Hire, ut humani corporis vim detegeret, ponderavit hominem mediae altitudinis, invenitque eum esse librarum parisiensium 140., hoc est florentinarum $186\frac{2}{3}$, cum parisiensis libra sit ad florentinam, ut 16. ad 12, sive ut 4. ad 3. Experimentis postea institutisprehendit, hunc ipsum hominem vi muscutorum coxarum, & crurum, dum haec modice incurvantur, posse attollere parisienses libras 290. Siquidem ille homo poplitibus parum flexis erigere sese potest, licet 150. parisiensium librarum pondere sit gravatus; sed huiusmodi homo ponderat parisienses libras

140. Ergo vi muscutorum coxarum, & crurum potest attollere 290. libras parisienses. Vis autem muscularis brachiorum, quam solent homines adhibere ad pondus aliquod verticaliter elevandum, valet circiter parisienses libras 160. Si enim homo mediae altitudinis aliquod fixum corpus imminens eius capiti, ambabus manibus firmiter apprehendat, tunc elevare poterit proprium corpus, licet 20. librarum parisiensium pondere sit gravatum. Sed pondus humani corporis valet 140. libras parisienses; ergo vis, qua praediti sunt muscoli brachiorum, valebit circiter 160. libras parisienses. Denique observavit idem D. de la Hire, quod si homo 60. gradibus inclinatus, horizontaliter brachiis agat, potest attollere, trahere, aut propellere pondus librarum parisiensium 27. Vim istam itaque habet homo, qui funi alligatus, dum ambulat, navim trahit; non posset enim trahere ambulando, si eius inclinatio minor foret gradibus 60. Nec mirum videri debet, quod exigua haec potentia navigium movere possit; quippe cum integrum eius pondus a subiecta aqua sustineatur, tota vis illa eo unice tendit, ut aquae superet resistantiam, quae certe exigua esse solet, dum navigio imprimitur exiguus motus.

DEFINITIO V.

295. Potentiam *obliquam* voco, quae ad
 K obli-

obliquum angulum vecti est applicata; *directam* autem voco, quae perpendiculariter in vectem agit.

DEFINITIO VI.

Tabula 296. In vecte quolibet ACB si ex fulcro
VII. C ad directiones potentiarum P & Q de-
Fig. 5.6. mittantur perpendiculares CL, CV; hae
vocantur *distantiae* potentiarum a fulcro C.

COROLLARIUM I.

Tabula 297. Igitur brachia CA, CB erunt *distan-*
VII. *siae* potentiarum P & Q, directe trahentium
Fig. 7. AB vectem.

COROLLARIUM II.

Tabula 298 Cum etiam pondera P & Q directe
VII. (159) trahant horizontalem vectem AB, ut-
Fig. 8. que brachia CA, CB erunt quoque *distan-*
siae ponderum a fulcro C.

DEFINITIO VII.

Tabula 299. Potentiae P & Q dicuntur *esse in ae-*
VII. *quilibrio*, si immotum teneant vectem quem-
Fig. 5.6. libet ACB, convertibilem circa aliquod ful-
7. crum C.

DEFINITIO VIII.

Tabula 300. *Quantitas relativa* potentiarum P &
VII. Q, quae etiam *momentum* dicitur, est vis,
Fig. 5.6. aut actio illarum ad rotanda vectis brachia
7. CA, CB circa immobile fulcrum C.

Co-

COROLLARIUM.

301. Manente igitur aequilibrio, potentiae P & Q habebunt (300) momenta aequalia, & contra, si momenta aequalia habeant, inter illas dabitur aequilibrium.

Axioma.

302. Potentiae aequales P & Q directe Tabula VII. Fig. 10. Tab IX. Fig. 1. vecti AB applicatae ad aequales distantias a fulcro C, aequalia habent momenta.

SCHOLIUM.

303. Cum enim omnia sint aequalia, nulla ratio esse potest, cur momentum unius momento alterius maius sit.

COROLLARIUM I.

304. Ergo aequales potentiae P & Q, Tabula VII. Fig. 10. quae ad aequales distantias a centro C vectem trahunt, servant (301) aequilibrium inter se.

COROLLARIUM II.

305. Quare etiam pondera aequalia P & Q, Tabula VII. Fig. 9. quae in vecte horizontali ad aequales distantias a fulcro suspensa manent, servant aequilibrium inter se.

P R O P O S I T I O I.

Tabula 306. **S**I binae potentiae aequales P & Q a-
 VII gentes iuxta directiones BA & AB ,
 Fig. 11 trahant extremitates A & B inflexi vectis cu-
 iuslibet ACB , inter illas dabitur aequilibrium.

Puncta A & B iunge rigida recta AB , quae si sola esset, potentiae aequales, & contrariae P & Q , eiusdem extremitatibus applicatae, in aequilibrio (84) plane forent. Rectae immotae AB adde modo inflexam, rigidamque lineam ACB , convertibilem circa C ; utique aequilibrium idem erit. Nam quiescente rigida recta AB , immota quoque manebit inflexa altera ACB . Finge demum in nihilum redigi rectam AB , non inde tamen aequilibrium destruetur. Cum enim puncta A & B ob rigiditatem inflexae lineae ACB , eodem modo a se nequeant separari ac quando aderat rigida recta AB ; utique potentiae P & Q perinde agent in inflexam, rigidamque lineam ACB ac si adhuc subsisteret recta AB . Ergo inter illas dabitur aequilibrium. Q. E. D.

P R O P O S I T I O II.

Tabula 307. **I**isdem positis, si binae potentiae P & Q
 VII sint in aequilibrio constitutae, aequa-
 Fig. 11 les etiam erunt inter se.

Po-

Potentias P & Q exponant rectae AK , BO , atque potentia AK sit, si fieri potest reliqua BO maior, hac autem coercita, aut amota, substituatur alia BR potentia, quae sit ipsi AK aequalis. Ergo (306) dabitur aequilibrium inter potentias AK , & BR ; at idem aequilibrium dabatur quoque (*ex hyp.*) inter potentias AK , & BO . Ergo BR potentia erit alteri BO aequalis, totum parti, quod est absurdum. Non ergo AK potentia erit altera BO maior. Eodem argumento constabit, eandem AK potentiam non esse alia BO minorem; superest ergo, ut ipsi aequalis sit. $Q. E. D.$

PROPOSITIO III.

308. **D**atis binis potentiis P & Q , quae applicatae extremitatibus A & B inflexi vectis cuiuslibet ACB , in ipsum agent iuxta directiones AP , BQ ; binas alias invenire, quae iisdem extremitatibus applicatae, atque agentes iuxta directiones BA & AB , prioribus aequipolleant.

Tabula
VII.
Fig. 12.

Potentias P & Q exponant rectae AH , BF , atque ex H & F ducantur HK , FO , quarum altera parallela sit ad CA , altera ad CB : dico, potentiis P & Q aequipollere potentias AK , BO . Quoniam potentia AH aequipollet binis AG , AK , utique etiam actio, seu vis potentiae AH ad rotandum bra-

K 3

chium

chium vectis AC, aequipollens erit actionibus, aut viribus potentiarum simul AG, AK; sed potentia AG utpote agens iuxta rectam AC, conatur quidem brachium vectis impellere versus C, nullam vero exerit actionem ad rotandum illud brachium circa C. Ergo actio seu vis potentiae AH ad rotandum brachium vectis AC, aequipollebit actioni, seu vi alterius potentiae AK. Simili modo ostendam, actionem BF potentiae aequivalere actioni potentiae BO; ergo binae potentiae AK, BO aequipollentes erunt binis AH, BF, five potentiis P & Q. Q. E. I.

PROPOSITIO IV.

Tabula 309. *SI binae potentiae P & Q applicatae*
 VII. *extremitatibus A & B inflexi vectis*
 Fig. 12. *cuiuslibet ACB, servent aequilibrium inter se;*
potentia P erit ad Q potentiam, ut huius distantia CV a fulcro C ad distantiam CL alterius ab eodem fulcro.

Superiori posita constructione, liquet, potentias binas AK, BO aequipollere (208) duabus P & Q; sed potentiae P & Q servant (ex hyp.) aequilibrium inter se. Ergo & illud servabunt reliquae AK, BO, quae idcirco (307) aequales erunt. Ex fulcro C agantur CH, CK, nec non CF, CO. Triangula CKA, COB habent aequales bases AK, BO, suntque ulterius aequae alta; ergo invicem aequabuntur.

tur. Sed propter parallelas KH , AC , triangulum CKA aequale est alteri CHV , & propter parallelas OF , BC , triangulum COB aequale est alteri CFB . Ergo cum triangulum CKA aequale sit triangulo COB , etiam triangulum CHA aequabitur CFB , atque adeo basis AH trianguli CHA erit ad BF basim trianguli CFB , ut altitudo huius CV ad CL alterius altitudinem. Quare potentia AH , sive P , erit ad BF potentiam, sive Q , ut distantia huius a fulcro C ad alterius distantiam ab eodem fulcro. $Q. E. D.$

PROPOSITIO V.

310. **S**I binae potentiae P & Q applicatae Tabula VIII.
extremitatibus A & B vestis recti Fig. 1.
 AB , servant aequilibrium inter se; erit potentia P ad potentiam aliam Q , ut distantia huius CV ad distantiam alterius CL .

Ex fulcro C ducatur utcumque CS recta, occurrens ipsi BQ in S , eaque velut rigida concipiatur, cuius extremo S applicatas habeat aequales, & contrarias potentias SO , SI , tales nimirum, ut illarum una SI valeat cum alia P immotum tenere inflexum vestem ACS . Hoc posito, cum potentiae P & Q immotum (*ex hyp.*) teneant AB vestem, cum quoque immotum tenere pergant quatuor potentiae P , Q , SI , SO , quarum extremae SI , SO urpote contrariae, & ae-

K 4

qua-

quales, mutuo se (84) elidunt. Itaque immoti iacebunt duo inflexi vestes ACS, SCB, quorum alterum trahunt potentiae SI & P, alterum vero potentiae SO & Q. Cum ergo immotus iaceat vestis ACS inter potentias SI & P, utique (309) potentia P erit ad potentiam SI, ut CV est ad CL; sed ob vestem alium SCB immotum inter potentias SO & Q, potentia Q aequabitur (307) ipsi SO, aut SI. Ergo potentia quoque P erit ad potentiam aliam Q, ut distantia CV ad distantiam CL. Q. E. D.

COROLLARIUM I.

Tabula VII. Fig. 7. 311. Igitur si potentiae P & Q directe trahentes vestem AB, servant aequilibrium inter se; potentia P erit ad potentiam Q, ut CB est ad CA, quae sunt (297) distantiae potentiarum a fulcro C.

COROLLARIUM II.

Tabula VII. Fig. 8. 312. Item si pondera P & Q vesti horizontali AB applicata, servant aequilibrium inter se; pondus P erit ad pondus Q, ut CB ad CA, quae sunt (298) distantiae ponderum a fulcro C.

COROLLARIUM III.

Tabula VIII. Fig. 2. 313. Demum si directiones potentiarum P & Q productae conveniant in puncto D; ducta CE ad BD parallela, erunt potentiae P & Q, ut rectae DE, EC. Completo enim

nim parallelogrammo ECOD, triangulum CED aequabitur COD, ideoque basis DE trianguli CED erit ad basim DO trianguli COD, ut huius altitudo CV ad illius altitudinem CL; atqui potentia P est ad potentiam aliam Q, ut CV est (310) ad CL. Ergo eadem potentia P erit etiam ad aliam Q, ut DE ad DO, sive ut DE ad EC.

PROPOSITIO VI.

314. *SI binde potentiae P & Q applicatae* Tabula VIII.
extremitatibus A & B vectis recti AB, Fig. 1.
sint ut distantia CV ad distantiam CL; inter
illas dabitur aequilibrium.

Si non fuerit aequilibrium inter potentias P & Q, detur, si fieri potest, inter potentiam P, atque aliam BH potentiam, quae maior sit Q. Igitur potentia P erit ad potentiam BH, ut CV est (310) ad CL. Sed etiam potentia P est (*ex hyp.*) ad aliam Q, ut CV est ad CL. Ergo potentia P ad potentiam BH erit, ut eadem potentia P ad potentiam Q, ideoque BH potentia aequabitur potentiae Q, totum parti, quod est absurdum. Eodem modo constabit, eandem potentiam P non posse aequilibrari cum alia, quae minor sit Q. Ergo aequilibrabitur cum ipsa Q. Q. E. D.

COROLLARIUM I.

Tabula 315. Igitur si potentiae P & Q directe
VII. vestem trahentes, fuerint inter se, ut CB
Fig. 7. est ad CA, inter illas dabitur aequilibrium.

COROLLARIUM II.

Tabula 316. Item si pondera P & Q ex veste
VII. horizontali suspensa, fuerint inter se, ut CB
Fig. 8. est ad CA, in aequilibrio ipsa erunt.

SCHOLION.

Tabula 317. Hinc novimus qua ratione ad aquam
IX. e puteis hauriendam, soleant rustici adhibere
Fig. 2. machinam quamdam, quae *Ciconia* dici so-
let, eamque construunt tali pacto. Prope
puteum GFH excitatur trabs verticalis EC
in suo extremo C bifurca. Huic adnectitur
alia trabs BD, convertibilis circa C, & di-
visa in partes aequales, ex cuius brachio
uno CD funis cum situla S suspenditur, ex
altero autem corpus A, quod magis pon-
derat, quam situla aqua plena. Cum edu-
cenda e puteo aqua est, funis DL deprimi
manu solet, ut aquae situla immergatur; haec
autem, remota manu, necessario e puteo
educetur. Nam ob aequalia brachia CB,
CD, quemcumque situm habeat trabs BD,
pondus A & situla S aequidistabunt semper
a fulcro C, quapropter si corpus A tan-
tum ponderaret, quantum situla aqua ple-
na, esset aequilibrium (314) inter illa. At
cum

cum plus ponderet corpus A, quam sirula aqua plena, illud sirulae praevalerebit, quae proinde ascendet, atque ita e puteo hauriet aquam.

C A P V T II.

De mutua relatione momentorum, quibus pondera, & potentiae in velle agunt.

P R O P O S I T I O VII.

318. **P**ondera quaecumque P & Q appensa ad
aequales distantias a fulcro C in ve- Tabula VII.
te horizontali AB, momenta habent, quae sunt Fig. 9.
in ponderum ratione.

Si pondus P sit alteri Q aequale, momenta quoque aequalia (305) habent. Si vero pondus P sit duplum alterius Q, concipi illud potest in duas aequales partes divisum, quarum singulae habebunt momenta aequalia tum inter se, tum etiam momento ponderis Q, five momentum P duplum erit momenti Q. Rursus si pondus P triplum sit ponderis Q, dividi illud potest in tres partes aequales, quarum singulae momenta habebunt aequalia prorsus momento Q. Ergo momentum exercitum a tribus hisce partibus simul sumptis, seu momentum ponderis P triplum maius erit momento Q, & sic
 por-

porro. Itaque generatim momentum ponderis P tanto maius erit momento Q , quanto pondus P est maius pondere Q , seu, quod idem est, momentum P erit ad momentum Q , ut pondus P ad pondus Q . Q. E. D.

PROPOSITIO VIII.

Tabula
VIII.
Fig. 4.

319. **P**ONDERA aequalia P & Q appensa ad inaequales distantias a fulcro C , momenta habent, quae sunt in ratione distantiarum ab eodem fulcro.

Producto veste AC versus L , donec CL sit ipsi CA aequalis, fiat ut CL ad CB , ita pondus Q ad alterum pondus R , quod suspensum ad punctum L aequilibrabitur (316) cum pondere solo Q , ideoque momentum R aequabitur (301) momento Q . Quare momentum P ad momentum Q erit, ut idem momentum P ad momentum R . Sed ob aequales distantias CA , CL , momentum P est ad momentum R , ut pondus P est (318) ad pondus R , sive (*ex hyp.*) ut pondus Q ad pondus R . Ergo etiam momentum P ad momentum Q erit, ut pondus Q ad pondus R , sive (*ex constr.*) ut LC ad CB , aut ut CA ad CB , quae sunt distantiae ponderum a fulcro C . Q. E. D.

COROLLARIUM I.

Tab. X.
Fig. 6.

320. Hinc ratio apparet, cur in statera
AD

AD *Romana* vulgo dicta, unico appendiculo, aut facomate dato P diversarum mercium pondera explorentur. Cum enim momentum ponderis P in ea augeri debeat ratione, qua crescit (319) eius distantia a fulcro C , utique si in E appensum, non servet aequilibrium cum pondere Q maiori, idem servare debebit, si magis removeatur a fulcro C , veluti si suspensum sit in B ad distantiam nempe CB , quae sit ad CA , ut pondus Q est (316) ad pondus P .

COROLLARIUM. II.

321. Quoniam perinde est, seu CB vectis comprimatur in B a pondere quovis dato, seu directe trahatur a potentia data P , quae illi ponderi sit aequalis; patet, momentum potentiae P agentis in B , fore ad eius momentum, dum applicata est in A , ut distantia CB est (319) ad distantiam CA .

Tabula
VIII.
Fig. 5.

COROLLARIUM III.

322. Statuto itaque aequilibrio potentiam inter & pondus, difficilis non est eiusdem ponderis elevatio, si vel magis removeatur potentia a fulcro C , aut si exequi id non possit, pondus fulcro propius applicetur. In primo enim casu potentiae momentum (319) crescit, & contra in altero momentum ponderis diminuitur.

PRO-

PROPOSITIO IX.

Tabula 323. **P**ondera inaequalia P & Q appensa
VIII. ad inaequales distantias a fulcro C ,
Fig. 6. momenta habent, quae sunt in composita ra-
tione distantiarum, & ponderum.

Intelligatur tertium pondus R alteri P ae-
quale, quod appendatur ad distantiam CD
ipli CB aequalem; liquet, momentum P fo-
re ad momentum R , ut distantia AC est
(319) ad distantiam CD , sive (*ex constr.*)
ut recta AC ad CB . Momentum vero R
est ad momentum Q , ut pondus R est (318)
ad pondus Q , sive (*ex constr.*) ut pondus
 P ad pondus Q . Ergo ratio, quae compo-
nitur ex ratione momenti P ad momentum
 R , & ex ratione momenti R ad momentum
 Q , sive ratio momenti P ad momentum Q ,
eadem erit ac ratio composita ex ratione
distantiae AC ad distantiam CB , & ex ra-
tione ponderis P ad pondus Q . Q E. D.

COROLLARIUM I.

Tabula 324. Igitur ponderis P momentum erit ad
VIII. momentum ponderis Q , ut factum ex pon-
Fig. 3. dere P in distantiam suam AC a fulcro C ,
ad factum ex pondere Q in distantiam suam
 BC ab eodem fulcro.

Co.

COROLLARIUM II.

325. Hinc si factum ex pondere P in distantiam AC minus sit facto ex pondere alio Q in distantiam BC ; momentum P minus erit momento Q .

COROLLARIUM III.

326. Igitur si factum ex pondere P in AC auferas a facto ex pondere Q in BC , residuum praepondium erit. Ita si pondus P sit 10. librarum, Q vero librarum 30., AC digitorum 4., & CB digitorum 3., factum ex pondere P in AC erit 80., & factum ex pondere Q in CB 90. Igitur praeponderat Q in B momento ut 10.

PROPOSITIO X.

327. *SI quorvis pondera P & Q pendeant ex A & B , invenire punctum aliud in recta AC , ex quo si suspendatur summa ponderum P & Q , eius momentum valeat momenta simul ponderum P & Q pendentium ex A & B .*

Tabula
VIII.
Fig. 6.

Singula pondera P & Q ducantur in distantias respectivas CA , CB : dico, quod si horum factorum summa per aggregatum ponderum dividatur, prodibit quaesiti puncti distantia a fulcro C . Ponatur siquidem punctum F esse id, quod quaeritur.

tur. Igitur momentum summae ponderum P & Q suspensae ex puncto F , aequabitur (*ex hyp.*) summae momentorum eorundem ponderum P & Q pendentium ex A & B . Sed momentum summae ponderum P & Q suspensae ex F , est (324) ut factum ex summa ponderum P & Q in distantiam CF , & summa momentorum ponderum P & Q pendentium ex A & B , est (324) ut summa factorum ex P in CA , atque ex Q in CB . Ergo factum ex summa ponderum in CF aequabitur summae factorum ex P in CA , atque ex Q in CB , ideoque si horum factorum summa per summam ponderum dividatur, prodibit in quoto CF recta, quae est distantia quaesita, atque ita invenietur punctum quaesitum F . Q . E . L .

S C H O L I O N.

328. Sit pondus P 4. librarum, Q vero librarum 2. fit praeterea AC 6. digitorum; BC autem digitorum 3. Igitur momentum P erit (324) ut 24., atque momentum Q ut 6., unde horum summa erit ut 30. Igitur etiam momentum summae ponderum P & Q suspensae ex puncto F , hoc est summa ponderum P & Q ducta in rectam CF , erit ut 30.; sed summa ponderum est ut 6. Ergo recta CF erit ut 5., hoc est pollicum 5. atque ita inventum erit punctum quaesitum F .

PRO-

PROPOSITIO XI.

329 **S***I potentia verticaliter agens, cuius datae machinae applicetur, pondusque attollat; illius momentum ad huius momentum erit, ut factum ex potentia in spatium, quod ipsa perficit dato tempore iuxta propriam directionem, ad factum ex pondere in spatium ab eo percursum eodem tempore contra propriam directionem.*

Potentia & pondus ita mutuo in se agant ope machinae cuiusvis datae, ut potentia iuxta propriam directionem moveri nequeat, quin rapiat quoque pondus contra illius propriam directionem; liquet, quod si loco eiusdem machinae datae substituatur vectis cuius longitudo, & fulcrum talia sint, ut eadem potentia, atque idem pondus vectis extremitatibus applicata, eadem velocitate ac in machina data mutuo se se moveant, iidem erunt in vecte, atque in machina data actiones ponderis, & potentiae, eademque prorsus momenta. Horizontali itaque KL vecti applicari intelligantur potentia P, & pondus A, quorum directiones KP, LA horizontali KL sint semper perpendiculares, ac proinde mutuo parallelae; vectis autem rotetur circa fulcrum C, & obtineat positionem HF, filumque Hp productum, secet horizontalem KL in B, filum vero Fa in O. In hac hypothese potentia P secundum
L pro-

Tabula
VIII.
Fig. 7.

propriam directionem percurrit spatium BH, & pondus A contra propriam directionem describit eodem tempore spatium FO. Iam vero cum similia sint triangula CBH, CFO, est HC ad CF, ut BH ad FO; sed KC aequatur HC, & CL aequatur CF. Ergo etiam KC erit ad CL, ut BH ad FO, & permutando KC erit ad BH, ut CL ad FO, factumque ex P in KC erit ad factum ex P in BH, ut factum ex A in CL ad factum ex A in FO, & permutando, factum ex P in KC erit ad factum ex A in CL, ut factum ex P in BH ad factum ex A in FO. Sed momentum potentiae P est (324) ad momentum ponderis A, ut factum ex P in KC ad factum ex A in CL; ergo etiam momentum potentiae P erit ad momentum ponderis A, ut factum ex P in BH ad factum ex A in FO. Q. E. D.

COROLLARIUM I.

330. Quoties igitur deprimi nequit potentia P secundum propriam directionem, quin interea pondus A contra propriam directionem taliter elevetur, ut spatium BH, quod potentia describeret dato tempore, sit ad spatium FO interea a pondere absolvendum, in ratione ponderis ad potentiam; tunc ob factum ex potentia P in eius spatium BH, aequale facto ex pondere A in spatium suum, utique momentum potentiae momento ponderis est aequale, atque ita dabitur aequilibrium.

Co-

COROLLARIUM II.

331. Hinc si in machina quavis data explorentur spatia, quae a potentia, & pondere essent eodem tempore percurrenda, habebitur quoque ratio ponderis ad potentiam, quae est cum pondere aequilibrata, atque adeo palam fiet potentiae quantitas absoluta. Finge enim potentiam ita moveri debere in machina quadam data, ut secundum propriam directionem debeat percurrere 100. pedes, interea dum pondus contra propriam directionem absolvit solummodo pedem unum; concludere statim potes, in hac machina potentiam cum pondere aequilibrari, si ea fuerit centesima pars ponderis, & si maior adhibeatur, potentia vincet pondus.

COROLLARIUM III.

332. Quia in casu aequilibræ potentia (330) est ad pondus, ut spatium ponderis ad potentiae spatium, utique quo tardius ascendit pondus, eo minor potentia opus est ad illud ope machinae elevandum, & vicissim quanto pondus est celerius elevandum, tanto maior potentia esse debet. In omnibus ergo machinis compendium virium cum dispendio temporis, atque compendium temporis cum dispendio virium iungi debet. Hinc per mechanica instrumenta potentiae absoluta quantitas proprie non augetur, sed spatium ponderis elevandi, vel deprimendi

ob instrumenti applicationem ita minui solet, ut momentum ponderis momento potentiae non maius sit. Ita si vis quaequam agens scrupulo unius horae, potest attollere pondus unius librae per spatium unius pedis, nullum est instrumentum, machina nulla, qua fieri possit, ut eadem vis uno horae scrupulo agens, attollere queat pondus duarum librarum per idem spatium unius pedis. Poterit autem scrupulo uno horae ope machinae alicuius attollere pondus duarum librarum per semissem unius pedis; imo eadem potentia pondus 1000. librarum poterit horae scrupulo elevare, sed per partem millesimam unius pedis.

S C H O L I O N.

333. Non tamen colligi inde potest, frustra machinas adhiberi. Saepe enim circumstantia loci non finit, ut pondus aliquod elevetur, nisi machina praesto sit. Etenim si ex fundo navis, aut putei tota aquae quantitas educenda esset, posset quidem situla adhiberi quamdiu ipsa aquae immergi potest; at si aquae copia, quae superest, non sit tanta, quanta opus est, ut ipsi situla immergatur, tunc frustra situla uteremur, sed ad fuctoriam antliam esset unice recurrendum. Non ergo antliam adhibemus, quia illius ope maior aquae quantitas eodem tempore hauriatur, quam ipsius situlae beneficio, sed quia in exsiccandis omnino navibus, puteisque

que non potest situla adhiberi. Similiter machina saepe infervit, ut pondus integrum transferatur, aut elevetur, quod absque machina non nisi per partes fieri certe posset. Finge enim ab homine, qui tantum ferro potest 100 libras, transferendum esse pondus 1000. librarum ad distantiam milliaris. Sane si dividi posset pondus in 10. aequales partes, quae ponderarent singulae 100 libras; homo ille decem itinera conficiendo, in quorum singulis exempli gratia insumeret horam unam, totum pondus per partes transferre posset post 10. horas. At si in partes dividi pondus nequeat, veluti si de statuis, obeliscis, saxisque ingentibus ageretur, tunc illi machina opus est, ut illo eodem tempore transferre integrum corpus queat, quod ipse insumeret transferendo illud per partes. Id tandem commodi machinae nobis praestant, quod vires inanimatae veluti elementa, aut animatae ut animalia, id possunt agere ope machinae, quod eodem tempore quatuor, aut quinque homines vix praestarent. Exemplo esse queunt tum molendina, quae motu aquae, aut aeris agitantur, tum machinae etiam illae, quas adhibere assolent olitores ad aquam e puteis hauriendam. Neque vero utilitas harum machinarum in eo est collocanda, quod scilicet rotae illae, aut instrumenta ita potentiam iuvent, ut pari tempore magis elevent datum pondus, quam sine illis; sed

quia motus aquae, aut aeris nullius ferme dispendii sunt, & sustentatio equi, aut bovis machinae applicati, longe minor est sumptu, qui ad alendos quatuor, aut quinque homines praerequitur.

C A P V T III.

De communi centro gravitatis corporum plurimorum, deque tribus potentiis rectae rigidae applicatis, atque in aequilibrio constitutis.

D E F I N I T I O IX.

Tabula 334. **S**I in rigida recta AB, iungente cen-
VIII. tra gravitatis corporum P & Q,
Fig. 8. ita acceptum fuerit punctum C, ut si ex illo corpora suspendantur, servant aequilibrium inter se; idem punctum C dicitur *commune centrum* gravitatis corporum P & Q.

C O R O L L A R I U M I.

335. Quoniam pondera P & Q ex communi gravitatis centro suspensa (334) quiescunt; liquet, sustentato gravitatis centro C, integrum pondus corporum sustineri, ideoque perinde esse ac si gravitas corporum P & Q tota coacta esset in centro C.

Co-

COROLLARIUM II.

336. Igitur potentia R sustinens centrum C , sentiet summam ponderum P & Q . Et si loco potentiae R sustinentis, substituatur in C aliquod fulcrum, quod subeat eius vires, hoc pressionem absque dubio sustinebit, quae valet summam ponderum P & Q .

COROLLARIUM III.

337. Quia perinde est, siue pondera P & Q premant rigidam rectam AB , siue binae vires ponderibus his aequales, hanc ipsam rigidam rectam trahant; patet pressionem, quam sustinet fulcrum in C , valere illarum virium aggregatum.

COROLLARIUM IV.

338. Quoniam pondera P & Q ex C suspensa, servant (334) aequilibrium inter se, utique pondus P erit ad pondus Q , ut BC est (312) ad CA , atque adeo componendo, summa ponderum P & Q erit ad pondus Q , ut summa rectarum BC & CA , seu BA est ad CA . Quare datis ponderibus P & Q , ac recta AB , primum est invenire illorum centrum gravitatis commune C .

PROPOSITIO XII.

339. **I**nvenire commune centrum gravitatis trium corporum P , Q , R . Tabula VIII. Fig. 9.

L 4

Cen-

Centra gravitatis corporum P & Q iunge rigida recta AB , inventoque (338) illorum centro communi gravitatis C , agatur ex C rigida recta CE , transiens per centrum gravitatis corporis tertii R . Demum ita secetur CE in F , ut sit EF ad FC , quemadmodum summa ponderum P & Q ad pondus R : dico, punctum inventum F commune esse centrum gravitatis corporum P , Q , R . Nam cum in C sit centrum gravitatis corporum P & Q , liquet, quod si recta CE suspendatur ex puncto F , ea premi debet in C a summa (336) ponderum P & Q , in puncto autem E comprimitur a pondere solo R . Ergo pondus in C erit ad pondus in E , ut summa ponderum P & Q ad pondus R ; sed etiam EF est (*ex contr*) ad FC , ut summa ponderum P & Q ad pondus R . Ergo pondus in C erit ad pondus in E , ut EF ad FC , ac proinde (316) immota EC manebit seu, quod idem est, punctum F erit (334) commune centrum gravitatis trium corporum P , Q , R . Q. E. I.

S C H O L I O N.

'340. Simili modo detegi quoque potest commune centrum gravitatis quorumcumque corporum.

PRO-

PROPOSITIO XIII.

341. **D**atis binis potentiis P & Q , immo-
tum senentibus AE vestem, inveni-
re vim, & directionem, secundum quam pre-
mitur fulcrum C .

Tabula
VIII.
Fig. 10.

Potentias P & Q referant rectae AY , EG , factisque circa illas rectangulis BD , FL , in recta AC sumatur pars CI aequalis differentiae rectarum AD , EF , & ducta ad vestem perpendiculari CO , quae aequet summam rectarum AB , EL , compleatur rectangulum $ISOC$, habens diagonalem CS : dico, hanc ipsam rectam, vim, & directionem exponere, secundum quam premitur fulcrum C . Etenim potentia P , sive AY trahit punctum A viribus AB , AD ; potentia autem Q , vel EG urget punctum E viribus EL , EF . Ergo simul potentiae P & Q trahunt vestem AE , seu premunt fulcrum C summa virium AB , EL , seu (*ex constr.*) vi CO , & differentia virium AD , EF , seu (*ex constr.*) vi CI ; Sed binae vires simul CO , CI aequipollent uni CS . Ergo simul potentiae P & Q premunt fulcrum C vi & directione CS . Q. E. D.

PROPOSITIO XIV.

342. **S**I directiones potentiarum P & Q pro-
ductae conveniat in aliquo puncto M ;
ibi etiam conveniet directio resistentiae fulcri C

Tabula
VIII.
Fig. 10.

Su-

Superiori posita constructione, iungatur CM recta, & ducta CV parallela ad EM, sumatur in ea CH aequalis rectae EG. Ducatur quoque HR ad AM parallela, quae in puncto R conveniet cum CM. Demum demissis RK, HZ perpendicularibus ad AE, agatur huic parallela HT, occurrens ipsi RK in T. Cum potentia EG sit ad AY potentiam, ut CV est (313) ad VM, erit quoque ut CH ad HR; ergo cum CH sit (*ex constr.*) ipsi EG aequalis, etiam HR aequabitur ipsi AY. Igitur triangulum RTH erit simile, & aequale alteri ABY, sicuti & triangulum HZC aequale erit, simileque alteri ELG. Itaque singulae rectae RT, HZ, sive RT, TK aequantur singulis rectis AB, EL, atque adeo tota RK aequabitur rectis simul AB, EL, seu CO. Similiter singulae rectae HT, ZC aequales sunt rectis singulis YB, LG, sive AD, EF. Ergo illarum differentia CK aequabitur harum differentiae CI, ideoque completo rectangulo NCKR, hoc aequale erit, & simile alteri ICOS, rectaeque proinde CS, CR aequales inter se erunt, atque positae in directum. Sed pressio fulcri C exponitur (341) CS recta; ergo & resistentia fulcri, quae huic pressioni aequalis, & contraria est, exponetur recta CR, quare eius directio conveniet in puncto M cum directionibus potentiarum P & Q. Q. E. D.

COROLLARIUM I.

343. Igitur potentiae P & Q , ac resistentia fulcri C inter se erunt, ut rectae RH , HC , CR ; sed hae tres rectae proportionales sunt rectis MV , VC , CM . Ergo potentiae P & Q , ac resistentia fulcri C erunt quoque ut rectae MV , VC , CM , atque adeo illis possunt commode repraesentari.

COROLLARIUM II.

344. Hinc si tres potentiae P , Q , X applicatae rigidae rectae AB in punctis A , E , C , immotum teneant illum vectem; earum directiones convenient simul in puncto M . Potentia enim X aequilibratur cum reliquis P & Q ; sed potentiae P & Q aequipollent (341) CS potentiae. Ergo & potentia X aequilibrabitur cum CS , ideoque illarum una erit contraria alteri, & aequalis. Sed potentia exposita a CR aequalis est, & contraria (342) ipsi CS potentiae; ergo potentia X exponitur CR recta, atque adeo eius directio conveniet in M cum directionibus reliquarum P & Q . Itaque tres potentiae P , Q , X exponentur rectis RH , HC , CR , sive rectis MV , VC , CM , quae sunt prioribus proportionales.

PRO-

PROPOSITIO XV.

Tab. IX. 345. **S**I binae potentiae P & Q applicatae
Fig. 3. *veſti horizontali AE ſint in aequilibrio cum pondere quovis R ; tunc demiffa ex E ad PA normali EL , potentia P erit ad pondus R , ut recta EC ad EL .*

Quoniam potentiae P & Q aequilibratae ſunt cum pondere R , utique ſi directiones potentiarum conveniant ad punctum M , ibi etiam (344) conveniet ponderis R directio. Ducatur CV ad EM parallela, & iungatur CL . Liquet, potentias P & Q ac pondus R eſſe (344) ut rectae MV , VC , CM . Iam vero ob rectos angulos MLE , MCE , circulus diametro ME deſcriptus, tranſibit quoque per L & C , ideoque angulus LEC aequabitur LMC , ſive VMC . Eandem ob cauſam etiam angulus CLE aequabitur CME , ſive huic alterno MCV parallelarum EM , CV . Igitur ſimilia erunt triangula VMC , LEC , ac proinde MV erit ad MC , ut EC ad EL ; ſed potentia P eſt ad pondus R (344), ut MV ad MC . Ergo erit quoque, ut EC ad EL . Q. E. D.

CAPUT IV.

*De proprietatibus, ac symptomatis vestis
secundi, & tertii generis.*

PROPOSITIO XVI.

346. **S**I quaequam potentia P directe trahens Tab. IX.
horizontalem vestem AC secundi, aut Fig. 45.
tertii generis, sit aequilibrata cum pondere
 R ; eadem potentia P erit ad pondus R , ut
distantia ponderis a fulcro C ad potentiae di-
stantiam ab eodem fulcro.

Pro ducto veste AC versus D , donec CD
recta sit ipsi CA aequalis, applicetur in D
potentia alia Q , quae aequalis sit ipsi P .
Igitur potentiae P & Q applicatae brachiis
 CA , CD , momenta (302) aequalia habe-
bunt; sed quia in veste AC potentia P (*ex
hyp.*) aequilibrata est cum pondere R , mo-
mentum potentiae P aequatur (301) pon-
deris R momento. Ergo etiam momentum
potentiae Q aequale erit momento ponderis
eiusdem R ; unde amota, aut coercita poten-
tia P , inter potentiam Q , & pondus R neces-
sario dabitur (301) aequilibrium. Potentia er-
go Q erit (312) ad pondus R , ut BC est
ad CD , aut (*ex constr.*) ut BC est ad AC .
Verum potentia P aequatur (*ex constr.*) po-
ten-

tentiae Q; Ergo etiam potentia P erit ad pondus R, ut BC est ad AC, quae rectae sunt distantiae ponderis, & potentiae a fulcro C. Q. E. D.

COROLLARIUM I.

Tab. VII
Fig. 2.

347. Itaque in secundi generis veste AC potentia P, quae aequilibrata est cum pondere R, eodem pondere minor erit. Nam potentia P est ad pondus R, ut BC est (345) ad CA; sed BC recta est minor CA. Ergo & potentia pondere minor erit. Itaque hic vestis potentiae vim adauget, ideoque usus maximi esse potest ad ingentia pondera sustinenda.

COROLLARIUM II.

Tab. VII
Fig. 3.

348. Contra, in tertii generis veste AC potentia P, quae aequilibrata est cum pondere R, eodem pondere maior erit. Nam potentia P est ad pondus R, ut BC est (346) ad CA; sed BC est CA maior. Ergo & potentia P pondere maior erit. Itaque hic vestis minuit vim potentiae, atque adeo sustinendo corpori non inservit.

SCHOLIUM I.

349. Ad vestem secundi generis revocantur 1.^o *Remi*. Dum enim navis agitur remis, horum palmulae aquae inniti solent, atque adeo aqua est fulcrum; pondus promovendum in *scalmo* est, ubi nempe affigitur

tur navi remus; potentia denique in altero extremo remi. Ergo quo longior remus est, sive quo magis distat potentia a fulcro, eius momentum eo augeri debet. Non tamen colligi inde potest, aucto remo navim facilius promoveri. Nam cum longior remus sit, crescit quidem distantia scalmi a fulcro, at distantia potentiae ab ipso eadem perseverat, alioquin navis non posset commode promoveri; igitur aucto remo nedum momentum potentiae crescit, sed illud quoque resistentiae maius fit. Distet enim potentia a fulcro 2. pedibus, & distantia scalmi ab eodem sit 1. pedis; utrique in casu aequilibri erit potentia ad resistentiam, ut 1. ad 2., atque ita potentia erit dimidia resistentiae. Aucto autem remo longitudine 1. pedis, distantia potentiae a fulcro erit 3. pedum, scalmi vero distantia 2. pedum; igitur in casu aequilibrui erit potentia ad resistentiam, ut 2. ad 3., hoc est potentia aequalis erit duabus tertiis partibus resistentiae. Itaque aucto remo erit difficilior motus navis. 2.^o *Postes* quoque sunt vectes totidem secundi generis, quorum fulcra sunt *Cardines*; pondera sunt in eorundem centris gravitatum; potentia demum extremitati alteri applicatur. Vnde quo magis potentia a cardinibus ipsis distat, eo facilius postes aperiri, claudique possunt.

S C H O L I O N II.

350. Vfus autem vectis tertii generis in
hu-

humano corpore admirabilis plane est. Dum enim brachio horizontali pondus aliquod sustinemus, tertii generis vectis adest, cuius fulcrum in nodo scapulae est; musculi autem cubitum flectentes horizontaliter, sunt potentia; pondus denique elevandum in extremitate brachii situm est. Vis ergo muscularis brachii maior esse debet (348) pondere quod sustentat; id autem in homine natura provida egit, ut & propria membra, & pendentia ex illis corpora citius elevaret.

PROPOSITIO XVII.

Tab. IX.
Fig. 6.

351. *SI pondus R pendens, ex veste horizontali AB, sit in aequilibrio cum potentiis directe trahentibus P & Q; potentia P erit ad aliam Q, ut recta BC ad CA.*

Removeatur animo potentia Q, eiusque loco substitue fulcrum B; utique potentia P erit ad pondus R, ut BC est (346) ad AB. Rursus manente potentia Q, removeatur altera P, atque eiusdem loco substitue fulcrum A; eritque pondus R ad potentiam Q, ut recta BA est (346) ad AC. Ergo ex aequo, potentia P erit ad aliam Q, ut BC est ad AC. Q. E. D.

COROLLARIUM I.

352. Igitur si duo homines suppositis humeris in A & B, sint aequilibrati cum pondere R; potentia sustinens in A erit ad sustententem in B, ut BC est ad AC.

Co-

COROLLARIUM II.

353. Quoniam ponderis R partes sustentatae in A & B, aequales sunt potentiis sustentantibus idem pondus; etiam pars ponderis R, quam regit homo in A erit ad illam, quam sustinet homo in B, ut BC est ad AC.

COROLLARIUM III.

354. Quare si aequentur distantiae BC, AC, uterque homo in A & B constitutus, dimidiam partem ponderis sustinebit.

COROLLARIUM IV.

355. Hinc innotescit, quomodo tres ho- Tab. IX.
Fig 7.
mines horizontali utentes vecte, possint ferre aequaliter datum pondus. Sumpto siquidem vecte EC, eoque bifariam diviso in F, huic innitatur alius AF vectis, ita in B divisus, ut eius pars BF dimidia sit AB. Appenso demum pondere ad punctum B, applicentur homines punctis E, C, A, & singuli tertiam partem ponderis sustinebunt. Nam ut AB est ad BF, ita pars ponderis sustentata in F est ad eam ponderis portionem, quam (353) sustinet homo in A. sed recta AB dupla est BF. Ergo pars ponderis sustentata in F, dupla eius erit, quam regit homo in A, ideoque diviso pondere D in tres aequales partes, unam sustinebit homo in A, reliquae autem duae prement ve-
M ctem

Item EC in F. Sed ob aequales EF, FC, pressio in F aequaliter distribuetur (354) inter duos homines in E & C constitutos; ergo hi quoque sustinebunt singuli partem tertiam ponderis P.

COROLLARIUM V.

Tab. IX
Fig. 8.

356. Si vero quatuor homines debeant sustinere aequaliter pondus D; tunc adhibendi sunt duo vestes AH, EC, quorum punctis mediis G, & F inniti debet alter GF. Quod si ex puncto medio B huius vestis, pendeat pondus D, singuli homines constituti ad puncta A, H, C, E quartam partem ponderis sustinebunt. Nam ob aequales BG, BF singuli vestes AH, EC dimidium (354) ponderis regent, in punctis G & F. Igitur ob aequales quoque GH, GA, nec non FC, FE, singuli homines positi in A, H, C, E, quartam partem ponderis sustinebunt.

CAPITULUM V.

De Libra, Machinarum simplicium altera.

DEFINITIO X.

Tab. X.
Fig. 1.

357. **L**ibra est hasta ubique aequae densa, & crassa AB; atque in medio suspensa, ex cuius extremitatibus A & B pendunt scutellae, aut lances D & E, quibus pondera imponuntur.

SCHO-

SCHOLIUM.

358 Haec machina adhibetur ad mercium pondus ope alterius dati aequipondii examinandum.

PROPOSITIO XVIII.

359. **S***i aequalia pondera H & I pendeant ab extremitatibus hastae AB, atque suspensa maneat ex puncto medio C, quod centrum gravitatis eiusdem erit: quaecumque situm habeat hasta AB, quiescet.* Tab. X.
Fig. 1.3.

I. Quoties hasta AB horizonti est parallela, lineae directionum ponderum H & I perpendiculares (159) ad ipsam erunt, atque adeo brachia AC, CB erunt distantiae ponderum a centro motus. Quare cum haec brachia sint aequalia, atque aequentur pondera H & I, inter illa (305) dabitur aequilibrium. Tab. X.
Fig. 2.

II. Quod si hasta AB ab horizontali situ dimoveatur, tunc ducta DE per C parallela ad horizontem, quae secet directiones in D & E; liquet, rectas DC, EC fore (159) distantias ponderum H & I a centro motus C. Sed ob similia triangula ACD, ECB, est AC ad CB, ut CD ad CE; ergo cum sint aequales AC, CB, aequales quoque erunt DC, CE, atque ita aequalia pondera H & I ad aequales distantias a cen-

M 2

tro

tro motus hinc inde posita , erunt (305)
aequilibrata . Q. E. D.

COROLLARIUM.

Tab. X. 360. Quoniam quemcumque situm habeat
Fig. 3. hasta AB, semper pondera aequidistare (359)
debent a centro motus C, utique si pon-
dus I paululum superet aliud H, huic al-
terum praevalebit, tamdiuque ascendet, do-
nec hasta BA verticaliter collocetur. Itaque
haec libra adhiberi nequit ad pondus mer-
cium explorandum. Nam dum inquirimus
pondus mercium, nos prorsus latet quale
esse debeat aequipondium in lance altera
collocandum, idque non nisi tentando in-
vestigamus. Quare si aequipondium quod su-
mimus, sit paullo gravius, aut levius mer-
cibus ponderandis, in verticalem situm statim
adducitur hasta BA, atque ita nequit dete-
gi pondus mercium. En igitur rationem, cur
hac libra reiecta, aliam postea mechanici in-
vestigarint.

PROPOSITIO XIX.

Tab. X. 361. *Si aequalia pondera H & I pendeant*
Fig. 4. *S*ab extremitatibus hastae AB, atque
suspensa maneant ex puncto L, quod paullo
altius sit centro gravitatis C hastae AB; haec
si horizonti fueris parallela, quiescit. At si
inclinetur, oscillari tamdiu debes, donec ite-
rum fiat parallela ad horizontem.

Prius

Prius eodem constat ratiocinio, quo in theoremate praecedenti; posterius autem sic demonstro. Sit hasta AB inclinata ad horizontem, atque ex motus centro L demissa verticali recta LD, quae occurrat hastae in E, traiciatur per E horizontalis recta GF, conveniens cum directionibus ponderum in G & F; patet, rectas GE, EF esse (159) distantias ponderum a centro motus. Iam vero ob similia triangula AGE, FBE, est GE ad EF, ut AE ad EB; sed AE est minor AC, seu CB, atque adeo multo minor EB. Ergo & GE multo minor erit recta EF. Momentum ergo ponderis I praevalebit (319) momento alterius H, atque adeo descendet tandiu pondus I, donec iterum hasta AB parallela fiat ad horizontem. Q. E. D.

COROLLARIUM.

363. Si ex hasta horizontali suspensa pondera H & I sint paululum inaequalia, & pondus H sit maius pondere alio I, brachium CA descendet, & CB attolletur, pondusque I a centro motus magis recedet, quam aliud H, donec sit pondus H ad aliud I, ut EF est ad EG, in quo casu quiescet hasta, quia (314) dabitur aequilibrium. Haec libra itaque inclinata ostendit quodnam ponderum maius sit, ideoque hoc sensim imminuto, componetur libra in horizontalem situm, verumque pondus mercium indicabit. En igitur rationem, cur in mercium pondere ex-

M 3

plo-

Tab. X.
Fig. 4.

plorando ea libra soleat adhiberi, quae habet centrum motus paullo altius centro gravitatis hastae AB.

PROPOSITIO XX.

363. **L** *Libram perfectam, aut instrumentum construere, in cuius extremitatibus appensa gravia aequalia aequiponderant in situ horizontali.*

Tab. X.
Fig. 5.

Invento centro gravitatis hastae AB, quod bifariam ipsam dividet, paretur exilis stylus CH, & frustum H eiusdem cum illo ponderis, primumque perpendiculariter in medio hastae AB ex parte superiori, alterum vero ex inferiori parte afferruminentur, ne dum hasta obliqua est, gravetur magis ex una, quam ex altera parte. Paullo supra centrum gravitatis hastae AB fiat exile foramen, per quod traiciatur politus axis ex chalybe. Rursus parentur duae laminae DI, SO, quae prope D & S foramina habeant, & iunctae sint in OI, per foramina autem illa traiciendus est axis librae. Hasta AB dicitur *Iugum*, *acus* CH *Lingula* appellatur, & laminae DI, SO *Trutina* dici solent, atque AD, DB librae *brachia* nuncupantur. Denique ex punctis A & B hastae AB suspendantur lances E & G, quae seorsim ponderatae, una cum chordis, aut catenis ex quibus pendent, eiusdem ponderis esse debent.

bent. Hac posita constructione, dico, quod si libra ex trutina DO suspensa, abscondatur lingula intra eandem; gravia lancibus imposita, atque aequilibrata, erunt aequalia inter se. Etenim suspensa libra ex puncto V, trutina DO perpendicularis (159) erit ad horizontem; sed (*ex hyp.*) absconditur lingula intra illam. Ergo & ipsa lingula perpendicularis erit ad horizontem. Sed eadem quoque lingula est perpendicularis hastae AB; Ergo eadem hasta AB parallela erit ad horizontem; sed quia centrum motus est supra punctum medium hastae AB, pondera aequilibrata aequidistant ab illo centro. Ergo (312) aequalia quoque inter se erunt. Q. E. D.

S C H O L I O N I.

364. Putant artifices imperiti ad constructionem perfectae librae non opus esse, ut eius brachia tum longitudine, tum etiam pondere sint aequalia, atque ut lances D & E eiusdem debeant esse ponderis; sed sufficere arbitrantur, ut brachium AD una cum lance E eiusdem ponderis statuatur cum DB brachio, & altera lance G. At quis non videt, hoc aequilibrium quoque dari, si lanx levior e longiori brachio sit suspensa, & contra lanx gravior e breviori? hoc autem posito aequilibrium, si aequalia pondera lancibus imponantur, utique ob inaequales distancias a centro motus, aequilibrium (319) non servabunt, sicque libra dolosa erit.

Tab. X.
Fig. f.

S C H O L I O N II.

Tab. X. 365. Vt autem detegi dolus queat, po-
 Fig. 5. nenda est initio merx in E, aequipondium ve-
 ro in G, & postea merx in G, aequipon-
 dium vero in E, sicque aequilibrium de-
 struetur. Si enim brachium AD longius fue-
 rit quam DB, merx initio habebit momen-
 tum maius, ideoque cum pondere inaequa-
 li, & maiori in G aequilibrium (316) con-
 servabit. Ponendo autem mercem in G, &
 pondus in E, hoc ob maiorem distantiam
 a centro motus, adquiret (319) momentum
 maius, & merx vicissim ob minorem distan-
 tiam, minus, atque adeo destruetur illico
 aequilibrium.

S C H O L I O N III.

366. Quamvis libra ad vestem primi ge-
 neris reducatur, nihilominus eiusdem frictio
 circa axem notabilis esse debet, eaque adau-
 getur, quo magis iugum apprimitur eidem
 axi seu, quod idem est, quo appensa pon-
 dera sunt maiora. Iugum enim moveri ne-
 quit, quin ora foraminum axim radant; sed
 corpus unum radere aliud nequit, quin fri-
 ctio aliqua oriatur, quae quidem eo est ma-
 ior, quo corpus radens aliud comprimit vi
 maiori. Ergo iugum librae nequit dimoveri
 e situ horizontali quin frictio aliqua oria-
 tur, quae quidem eo maior erit, quo ma-
 gis iugum apprimitur eius axi, seu quo ap-
 pensa pondera sunt maiora. CA-

CAPUT VI.

De trochlea, machinarum simplicium tertia.

DEFINITIO XI.

367. **T***rochlea* est rota lignea, aut metal-^{Tab. X.}
lica BLED capsula LH inclusa, ^{Fig. 7. 8.}
& convertibilis circa axiculum C. Cavam
autem habet circumferentiam, ut per il-
lam transeat ductarius funis ABLEP, cu-
ius extremo uni adnectitur pondus A, al-
teri vero adhaeret potentia P.

DEFINITIO XII.

368. *Trochlea mobilis* illa est, quae sur-
sum una cum pondere elevatur. Si autem
trochlea tantum vertitur circa axiculum, ea
immobilis dici solet.

SCHOLION I.

369. Quoties potentia P sustinet ope tro-^{Tab. X.}
chleae pondus A, eius pars inferior BDE ^{Fig. 7. 8.}
ad sustentationem ponderis nihil confert; si
enim illa destructa foret, non tolleretur ideo
aequilibrium. Superior autem trochleae por-
tio BLE unice regit funem, adeo ut si hoc
adfixo in B & E, destrueretur postea ea-
dem trochleae parte BLE, idem esse per-
geret aequilibrium, dummodo sit superstes
linea rigida BCE. Igitur trochlea BLED
re-

reducitur tandem ad vectem BCE, fulcrum in C habentem, cuius extremitatibus B & E pondus, & potentia ad rectos angulos applicantur.

S C H O L I O N II.

370. Ne concussionibus trochlea subiiciatur, quae resistantiam quamdam creant, curandum est, ut trochleae axiculus adfixus rotae sit, atque una cum illa eodem tempore intra capsulam convertatur; sic enim trochlea movebitur circulariter, quin concussio aliqua oriatur. At si axiculus capsulae sit affixus, circaque ipsum immotum trochlea verti debeat; tunc quia axiculus amissum implere nequit rotae foramina per quae transit, ipsa circulariter non movebitur, sed concussionibus aliquas patietur, quae sane augeri debent, quo magis trochlea usu detrita est; atque ob hanc causam trochlea istiusmodi nullius ferme commodi esse potest.

P R O P O S I T I O XXI.

Tab. X. 371. *Si potentia P applicata immobili tro-*
Fig. 7.8. *chleae BLED, in aequilibrio sit cum*
pondere quovis A; potentia ponderi aequalis erit.

Quoniam directiones ponderis, & potentiae circumferentiam trochleae tangunt in B & E,

& E, perpendiculares utique esse debent ad eius radios CB, CE. iam vero praeter lineam rigidam BCE convertibilem circa C, partes reliquae trochleae nihil conferunt (369) ad sustentationem ponderis A. Ergo potentia P erit ad pondus A, ut distantia CB est (312. 309) ad distantiam EC. Sed CB est ipsi EC aequalis; ergo & potentia P aequabitur ponderi A. Q. E. D.

S C H O L I O N I.

372. Vnica ergo trochlea, quae tantum vertitur circa axiculum, vim potentiae non adauget, sed id commodi solum praestat, ut facilius potentia agat. Et revera, cum pondus extollimus absque trochlea, vis muscularis debet simul extollere brachia ipsa, quae absque dubio gravia sunt; at quando trochleam adhibemus, vis muscularis iungi solet ponderi brachiorum, commodiorque proinde fiet dati ponderis elevatio.

S C H O L I O N II.

373. Id etiam commodi praestat trochlea, quod per illam verticalis directio potentiae in horizontalem mutari queat, atque ita securitati trahentium prospiciatur. Si enim pondus H altius attollendum, trahentium capibus immineret, utique fracto DE fune, illi in extremum vitae periculum adigerentur; verum si ope trochleae alterius EBI directio verticalis in horizontalem BC convertere-
Tab. X.
Fig. 9.

teretur, fracto fune DE, nil periculi est timendum. Quin & potentia, quae nequit trahere verticaliter, directione verticali in horizontalem conversa, elevando corpori applicabitur. Ita verticaliter trahere nequit equus, horizontaliter autem trahit; unde verticali directione in horizontalem mutata, pondus ab equo poterit elevari.

P R O P O S I T I O XXII.

Tab. XI. 374. *Fig. 1.* **S**I linea directionis CD ponderis G transeat per centrum trochleae mobilis BLA, pondus autem G regatur partim a fune FA, qui haereat unco F, partim a fune RB, cui applicatur potentia P; eadem haec potentia eris ad pondus G, ut radius CA ad chordam AB, iungentem puncta contactuum A & B.

Demittatur ex A ad funem RB perpendicularis AE. Quoniam partes trochleae BLA, BHA nihil conferunt ad sustentationem ponderis G, excepta rigida recta BA, sane perinde erit ac si bini funes RB, FA adfixi extremitatibus B & A rigidae rectae BA, essent in aequilibrio cum pondere G suspenso ex puncto O, ideoque si rectae RB, FA conveniant ad punctum D, eo etiam conveniet directio (344) ponderis G. Porro ob aequales tangentes BD, AD, radiosque pariter aequales CB, CA triangula CBD, CAD sunt

sunt mutuo aequilatera, ideoque angulus BDC aequabitur ADC; ergo etiam angulus BDO aequabitur ADO, quare ob rectas DB, DO respectivé aequales rectis DA, DO, etiam BO aequabitur ipsi AO, & angulus BOD aequabitur AOD, ideoque hi duo anguli recti erunt. Ob parallelas demum CB, AE, quae perpendiculares sunt ad RD, angulus BAE aequalis est alterno CBA; sed etiam angulus CAB, seu CAO aequatur eidem angulo CBA in triangulo isosceli BCA. Ergo angulus BAE aequabitur CAO; sed etiam rectus angulus BEA aequalis est recto COA. Ergo similia erunt triangula EBA, OCA, ac proinde AC erit ad AB, ut AO ad AE. Sed potentia P applicata funi RB, est ad pondus G suspensum ex puncto O, ut AO est (345) ad AE; ergo eadem potentia P erit quoque ad pondus G, ut radius AC ad chordam AB. Q. E. D.

PROPOSITIO XXIII.

375. *SI potentia P applicata trochleae mobili BLA, in aequilibrio sit cum pondere quovis G, funes autem RB, FA paralleli fuerint inter se; potentia P dimidia erit ponderis G.* Tab. XI.
Fig. 2.

Quoniam funes RB, FA sunt (*ex hyp.*) paralleli, tanguntque trochleam in B & A, utique chorda BA iungens puncta contactuum

Et cum B & A, diameter erit trochleae BLA, atque adeo radius AC erit ad chordam AB, ut 1. est ad 2. Sed potentia P est ad pondus G, ut radius AC est (374) ad chordam AB. Ergo & potentia P erit ad pondus G, ut 1. est ad 2., hoc est eadem potentia P dimidia erit ponderis G. Q. E. D.

S C H O L I O N.

376 Quia trochlea cum unco suo, & capsula sustinetur a potentia trahente P, eius gravitas addenda est ponderi appenso G.

P R O P O S I T I O XXIV.

Tab. XI. 377. *Si potentia P applicata polyspasto CDIM in aequilibrio sit cum pondere quovis B, funes autem CD, EL, GF, HI paralleli fuerint inter se; potentia P erit ad pondus B, ut unitas ad numerum funium eorundem.*

Cum funes omnes sint (*ex hyp.*) paralleli, ideoque a centris trochlearum suarum intervallo radiorum utrinque distent, nulla ratio esse potest, cur a pondere appenso B unus magis quam alter extendi queat. Iam vero hi funes sustinent pondus B; hoc igitur vi aequali omnes extendit funes, atque ita per eos dividi debet, unde si funes fuerint quatuor, perinde erit, ac si tantum pars quarta ponderis ex fune CD penderet. Atqui potentia P aequatur ponderi suspen-

fo

so ex (371) fune CD; ergo potentia P in hoc casu non nisi quartam partem ponderis sustinebit seu, quod idem est, potentia ad pondus erit, ut unitas ad numerum funium, qui a pondere extenduntur. Q. E. D.

COROLLARIUM I.

378. Quia numerus trochlearum superiorum, & inferiorum simul sumptarum aequalis est funium numero inferiores trochleas sustentantium; potentia P erit ad pondus B, ut unitas est ad numerum trochlearum.

COROLLARIUM II.

379. Datis ergo potentia, & numero trochlearum, invenietur etiam pondus B, si potentia per trochlearum numerum multiplicetur. Ita si absoluta potentia P sit 50. librarum, & quatuor trochleae adhibeantur, pondus B erit 200. librarum.

SCHOLION.

380. Vtus polyspasti insignis est in ponderibus elevandis, tum quia haec machina exiguum spatium tenet, atque huc illuc transferri commode potest, tum etiam quia insigni compendio virium ingentia pondera ope huius machinae elevantur.

PROPOSITIO XXV.

381. **S**I potentia P applicata tribus mobilibus Tab XI.
trochleis C, D, H, sit in aequilibrio Fig. +
cum

cum pondere quovis K; du&is chordis AB, EF, GI, pondus K erit ad potentiam P in ratione composita ex ratione chordae AB ad radium BC, & ex ratione chordae EF ad radium FD, atque tandem ex ratione chordae GI ad IH radium.

Quoniam pondus K sustinetur partim ab unco N, partim ab unco R, pondus K erit ad partem ponderis, quam sustinet uncus R, ut chorda AB est (374) ad radium BC. Rursus haec pars ponderis suspensa ex unco R, erit ad ponderis partem illam, quam sustinet uncus T, ut chorda EF est (374) ad radium FD. Tandem pars ponderis, quae pendet ex unco T, est ad potentiam P, ut chorda IG est (374) ad radium IH. Sed pondus K est ad potentiam P in ratione composita ex ratione ponderis K ad partem ponderis sustentatam ex unco R, & ex ratione partis ponderis quam sustinet uncus R, ad eius partem, quam regit uncus T, atque tandem ex ratione partis ponderis sustentatae ab unco T, ad potentiam P. Igitur pondus K erit quoque ad potentiam P in ratione composita chordae AB ad radium BC, & ex ratione chordae EF ad radium FD, atque denique ex ratione chordae GI ad IH radium. Q. E. D.

COROLLARIUM.

382. Hinc si AB sit ad BC, ut 6. ad 1. & EF

& EF ad FD, ut 5. ad 1., tandemque GI ad IH, ut 4. ad 1.; Pondus K erit ad potentiam P in ratione composita ex ratione 6. ad 1. & ex ratione 5. ad 1., atque tandem ex ratione 4. ad 1. Sed ratio, quae componitur ex hisce tribus rationibus, eadem est ac ratio 120. ad 1. Igitur pondus K erit ad potentiam P, ut 120. ad 1., quare potentia unius librae huic machinae applicata, sustinebit 120. libras.

PROPOSITIO XXVI.

383. **S**I potentia P applicata tribus mobilibus trocleeis C, D, H, in aequilibrio sit cum pondere quovis K, funes autem OG, TE, RA paralleli sint funibus LI, MF, NB; potentia eadem P octava pars erit ponderis K. Tab. XL.
Fig. 5.

Quia paralleli sunt funes RA, NB, nec non TE, MF, atque OG, LI, chordae AB, EF, GI erunt diametri trochlearum mobilium C, D, H, ideoque chordae singulae ad suos radios habebunt rationem duplicatam. Cum itaque pondus K sit ad potentiam P (381) in ratione composita ex ratione chordae AB ad BC, & ex ratione chordae EF ad FD, atque tandem ex ratione chordae GI ad IH, consequens est, ut idem pondus K sit ad potentiam P in triplicata ratione 2. ad 1. sive ut 8. ad 1. Vicissim ergo potentia P erit ad pondus K,

N
ut

ut 1. ad 8., hoc est potentia P octava pars erit ponderis K. Q. E. D.

COROLLARIUM.

384. Si quatuor trochleis mobilibus uteremur, eodem ratiocinio (383) constaret, pondus esse ad potentiam sustentem in ratione quadruplicata 2. ad 1., sive ut 16. ad 1. Et si trochleae mobiles quinque forent, esset pondus ad potentiam in ratione quinquuplicata 2. ad 1., hoc est in ratione 32. ad 1., & sic deinceps. Itaque generatim numerus mobilium trochlearum exponit quantum ratio ponderis ad potentiam multiplex esse debeat rationis 2. ad 1.

SCHOLION I.

385. Quoniam huc usque egimus de potentia, quae trochleae immobili applicata, est in aequilibrio cum pondere quopiam dato, nulla fuit habita ratio frictionis, quam trochlea pati solet dum convertitur circa capsulam. At si de elevando corpore sermo sit, tunc frictio est ad calculum revocanda, ne in errorem aliquem inducamur. Experientia vero constat, eo maiorem frictionem esse, quo magis trochleae axiculus apprimitur ipsi capsulae, seu, quod idem est, quo maius est pondus, quod ope trochleae elevatur. Eadem quoque frictio crescit, quo partes axiculi, quae foramen capsulae radunt, circa illud citius convertuntur.

tuntur. Itaque, caeteris paribus, eo minor erit frictio, quo trochlea maior est, & quo minor est axiculus, cum quo trochlea verti solet.

S C H O L I O N II.

386. Aliam quoque resistantiam superare potentia debet, dum trochleis pondus elevat. Cum enim funis qui trochleae circumvolvitur, non sit perfecte flexibilis, non exigua pars potentiae successive infumi debet ad illum ita incurvandam, atque flectendum, ut trochleam amplecti queat. Hanc funium resistantiam metiri conati sunt praestantissimi viri Amontons, atque Desaguliers, qui experimentis pluribus institutis invenerunt, illam, caeteris paribus, eo minorem esse, quo trochleae sunt maiores, & quo magis exigui, atque usu detriti sunt funes, qui trochleae obvolvuntur.

C A P V T VII.

De axe in Peritrochio, Machinarum simplicium quarta.

D E F I N I T I O XIII.

387. **A**xis in Peritrochio est cylindrus EMF, Tab. XII
qui Axis etiam appellatur, cui ad- Fig. 1.
nexa est rota HLOS Peritrochion graece dicta. Haec vertitur baculis A & D, qui etiam scytalae dici solent.

SCHOLIUM.

Ut hac machina pondus aliquod eleve-
tur, axi funis adnecti debet, & funi pon-
dus. Deinde potentia ita applicanda est ro-
tae, ut ea circa axem, hic vero circa se
ipsum converti possit; tunc enim funis axi
circumplicatur, atque interea extollitur pon-
dus G. Frequenter in hac machina sine
scytalis adest rota instar tympani efformata,
intra cuius cavitatem homines ambulando,
rotam atque axem vertunt, sicque elevant
pondus datum. Haec machina *Geranium* di-
citur, soletque saepius adhiberi ad transfe-
rendas naves e demissiori alveo in altiore.
Quandoque axi in peritrochio etiam deest
rota, eius tamen loco substituuntur scytalae,
aut manubria A & B; commodior namque
est manubrii usus ad axem machinae conver-
tendum.

Tab.XII
Fig. 2. 3.

DEFINITIO XIV.

388. Si axis EMF parallelus fuerit ho-
rizonti, tunc axis in peritrochio *Sucula* ap-
pellatur, at si axis fuerit verticalis, *Ergata*
dici solet.

Tab.XII
Fig. 1. 2.

SCHOLIUM I.

Sucula inservit ponderi elevando, ergata
autem trahendo. Si sit sucula adhibenda in
aedificiis construendis, ea instrui debet bi-
nis manubriis AE, FB, ad quae potentiae
ap-

Tab.XII
Fig. 3.

applicantur, ac praeterea ille funis, qui ipsi circumplicatur, sustinere debet cophinum H cum pondere L, ut hæc ratione calx, saxa, & marmora promptius attollantur. Qui vero ergata uti solent ad transferenda pondera supra planum, illis supponunt cylindros ligneos C, A, B, ut ita frictio minuatur; si enim pondus radendo incederet supra planum, superanda frictio esset, quae observante D. Desaguliers, trienti ferme ponderis est aequalis.

Tab. XII
Fig. 4.

S C H O L I O N II.

389. Vis manus applicata manubriis AE, Tab. XII
FB, diversa est in quavis parte circuli, Fig. 4.
quem describit. Et sane 1.^o minima est vis manus, dum horizontaliter manubrium trahit. 2.^o Semper crescit manubrio descendente, nunquam tamen humani corporis pondus aequat. 3.^o Maxima est vis manus, si manubrium elevandum altitudinem poplitum non excedat. 4.^o Manubrio ascendente, vis manus minui semper solet. Et sane observavit D. Desaguliers, quod si homo ponderans 140. libras Parisienses, applicetur manubrio alicuius machinae, in qua vis manus, & pondus eodem tempore per aequalia spatia promoventur, circumferentia autem circuli quem describit, in quadrantes quatuor dividatur; eadem vis manus in altiori circuli huius puncto valet parisienses libras 27., quadrante autem primo circuli abfoluto,

N 3

luto,

luto, est librarum circiter 130. Eadem quoque vis manus in infimo puncto circuli valet 160. libras, & quadrante tertio absoluto, ad 30. libras circiter se extendit. Si ergo hi numeri colligantur in unam summam, atque haec per quatuor dividatur, prodibit in quotiente vis media manus manubrium circumagentis, librarum parisiensium scilicet $86\frac{1}{4}$. Hoc igitur erit pondus, quod homo ille poterit elevare, si tota sua vi indefinenter manubrium vertat. Verum quia saepe debet ipse quiescere, ut respiret, utique eius manus amittet vim acquisitam in fortiori circuli loco, antequam accedat ad debiliorem, sicque permittet corpori, ut descendat. Praeterea ut vis manus elevet pondus datum, eius directio huiusmodi esse debet, ut semper tangat circumferentiam circuli, quem describit, quod in praxi minime obtinetur. Igitur ob has causas experimentales physici detexerunt, vim manus, quae indefinenter manubrium vertit, elevare vix posse 30. libras parisienses. Caeterum si duo homines applicentur eodem tempore binis manubriis AE, FB contrario ordine collocatis, facilius elevabunt simul 70. libras, quam illorum alteruter 30. libras. Nam dum minima est vis manus applicatae manubrio FB, vicissim maxima erit altera, quae circumagit aliud AE, sicque unus homo alteri opem feret.

Tabula
XII.
Fig. 3.

PRO-

PROPOSITIO XXVII.

390. *Si vis manus scytalae applicata, ope* Tabula XII.
axis in peritrochio elevet pondus G; ut Fig. 1.2.
momentum illius ad illud ponderis erit, ut
factum ex vi illa in scytalae longitudinem,
ad factum ex pondere in axis radium.

Vis manus scytalae applicata, tantundem assolet promoveri in una machinae conversione, quanta est circumferentia, cuius radius est scytala ipsa AC, tantundem vero extollitur pondus G, quantum funis tractorii illud est, quod circumplicat semel axem. Ergo spatium vis manus ad illud ponderis erit, ut circumferentia, cuius radius est AC, ad axis circumferentiam, sive ut longitudo scytalae ad radium axis. Sed momentum vis manus est ut factum ex eadem vi in spatium, quod dato tempore (329) absolvit iuxta propriam directionem, momentum vero ponderis est ut factum ex pondere ipso in spatium eodem illo tempore absolvendum contra propriam directionem. Ergo momentum vis manus scytalam circumagentis, ad momentum ponderis erit, ut factum ex vi illa in scytalae longitudinem, ad factum ex pondere in axis radium. Q. E. D.

COROLLARIUM.

391. Quod si vis manus ad pondus fuerit, ut radius axis ad scytae longitudinem; tunc factum ex illa vi in scytae longitudinem aequale erit facto ex pondere in axis radium, ideoque momentum vis manus manubrium circumagentis, aequale erit ponderis G momento, atque ita dabitur aequilibrium.

SCHOLION I.

392. Vt vis huius machinae intimius percipiat, libet rem totam exemplo aliquo illustrare. Sit scytae longitudo parisiensium pedum 2., radius vero digitorum 2. Cum pes unus ex 12. constet digitis, duo pedes continebunt digitos 24., quare scytae longitudo erit ad axis radium, ut 24. ad 2., five ut 12. ad 1. Vnde si vis manus fuerit librarum 86., ea profecto huic machinae applicata, aequilibrabitur cum pondere librarum 1032. Nam vis manus est ad pondus, ut 86. ad 1032., five ut 1. ad 12.; sed etiam axis radius est ad scytae longitudinem, ut 1. ad 12. Ergo vis manus ad pondus erit, ut radius axis ad scytae longitudinem, ideoque (391) dabitur aequilibrium.

SCHOLION II.

393. Haec quoque machina ad vestem reduci

duci potest. Si enim rota exponatur circum- Tabula
XIII.
Fig. 1.
 lo AIS, axis autem concentrico alio circum-
 lo TKO; liquet, quod dum potentia appli-
 cata in R iuxta directionem tangentis AF
 deprimit illam rotam, perinde est hac si di-
 recte applicaretur horizontali vecti AL, ha-
 bent i fulcrum in C, atque attolleret pondus
 G. Quoties igitur potentia in A est ad pon-
 dus G, ut radius axis CL ad radium ro-
 tae AC, necessario dabitur (315) aequili-
 brium. Si vero eadem potentia descendat
 ex A in H, ibique deprimat rotam ver-
 ticaliter iuxta HV, quae producta occurrat
 horizontali vecti in R; tunc distantia po-
 tentiae a centro motus C definiatur recta
 RC, ideoque momentum eius in H ad mo-
 mentum ipsius in A erit, ut distantia RC
 est (321) ad distantiam AC. Sed recta RC
 minor est recta AC; ergo & momentum po-
 tentiae in H minus erit momento eiusdem
 in A. Momentum ergo potentiae diminui-
 tur, descendente illa ex A in H, sicuti vi-
 cissim augeri debet, ascendente potentia ex
 H in A. Idem quoque accidit in *Geranio*,
 ubi hominis pondus verticaliter rotam pre-
 mens, potentiae vices gerit; quare ascen-
 dente homine ex H in A, eiusdem momen-
 tum augeri debet, & si homine stante in H,
 sit cum pondere aequilibratum, ascendente
 illo ex H in A, potentia vincet pondus.

SCHO.

SCHOLION III.

394. Posito aequilibrio in hac machina, ut potentia acquirat momentum maius, & facilius superet resistantiam, curandum est 1.^o Ut scytae, aut manubria sint longiora quoad fieri potest; sic enim augebitur potentiae spatium, eiusque proinde momentum (329) crescet. 2.^o Exiguam crassitiem axis habere debet, quanta scilicet opus est ad pondus corporis sustentandum; hoc enim pacto spatium ponderis minuetur, atque (329) eius momentum ideo minus erit. 3.^o Funis qui axi circumplicatur, debet esse validus, & exiguus, ut facilius axim amplecti (386) queat. 4.^o Tandem maxime est cavendum, ne dum funis axi circumplicatur, supra obvolutum alium funem cadat; alioquin hoc modo aucta crassitie axis, etiam spatium ponderis augetur, atque (329) inde cresceret eius momentum.

SCHOLION IV.

Tabula
XIII.
Fig. 2.

395. Ad axem in peritrochio revocatur *spiralis conus*, cui cum tenditur horologium, circumplicatur catenula tali pacto. Intra metallicum tympanum clauditur elastrium S, cuius puncto G haeret catenulae una extremitas, altera vero figitur puncto E spiralis conici EL. Cum horologium concitandum ad motum est, posita clavi in B, rotatur conus circa axem AB, atque ita catenula, quae

quae, horologio quiescente, circumplicata tympano erat, obvolvitur ipsi cono, & sic tenditur elastrium, quod cum expandere se nitatur, tympanum intus premit, illudque circa proprium axem rotare cogit. Potentia itaque est elastrii ipsa vis, quae ope catenulae applicatur initio puncto K, inde vero reliquis F & E, adeo ut successive removeatur ab axe AB. Resistentia, quae hic ponderis locum tenet, sunt horologii rotae omnes movendae ab unica rota EH, ideoque potentiae momentum erit (390) ut factum ex elastrii vi in radium coni in loco K, & perventa catenula ad punctum F, momentum potentiae erit (390) ut factum ex vi elastrii in radium coni in loco F, & sic porro. Quia vero in ea ferme ratione vis elastrii minui solet, qua coni radius augetur, momentum vis elastrii idem ferme est in punctis K, F, E, atque adeo spiralis conus aequabiliter verti debet, & motus pariter horologii pro aequabili sumi potest.

CAPUT VIII.

De Cochlea, Machinarum simplicium quinta.

DEFINITIO XV.

396. **C**ylindrum rectum spirali similiter sulcatum *Cochleam* vocant, & quidem *Marem* si sulcata superficies convexa sit, *Fos-*
mi-

minam vero, si concava. Debet autem *mas cochlea* ita foeminae conformis esse, ut illius eminentiae huius cavitatibus plane congruant.

S C H O L I O N.

Tabula
XIII.
Fig. 3.

397. Utimur cochlea ad corpus aliquod comprimendum, uti apparet in torculari EHF, quod communiter adhibetur ad oleum ex plantarum seminibus exprimendum, vel ab uvis iam contusis succum residuum educendum. Quandoque utimur etiam cochlea ad elevandum aliquod pondus G. Sive autem corpus aliquod ope cochleae comprimitur, aut elevetur, semper cochlea *mas* LD matrici EH inferitur, qua immota manente, scythalis AL, BL circumducitur cochlea *mas* LD, quae proinde in primo casu deprimi semper debet, & contra in altero elevari, & rapere secum pondus.

Tabula
XIII.
Fig. 4.

P R O P O S I T I O XXVIII.

Tabula
XIII.
Fig. 4.

398. **D***Vm vis manus scythae AL cochleae applicata, elevat pondus G, eius momentum ad illud ponderis erit, ut factum ex illa vi in circumferentiam, cuius radius est scythae longitudo, ad factum ex pondere G in binarum belicum intervallum.*

In una cochleae conversione tantundem promoveri solet vis manus scythae applicata,

cata, quanta est circumferentia, cuius radius est ipsa scytae longitudo; tantundem vero pondus G elevatur, quantum est binarum helicum intervallum. Sed momentum vis manus scytae circumagentis est ad momentum ponderis, ut factum ex vi illa in eius spatium, ad factum ex pondere (329) in spatium suum. Ergo etiam momentum vis manus scytae circumagentis, ad momentum ponderis erit, ut factum ex illa vi in circumferentiam, cuius radius est ipsa scytae longitudo, ad factum ex pondere in binarum helicum intervallum. Q. E. D.

COROLLARIUM I.

399. Quod si vis manus fuerit ad pondus G , ut binarum helicum intervallum ad circumferentiam, cuius radius est ipsa scytae longitudo, tunc factum ex illa vi in circumferentiam aequale erit facto ex pondere in binarum helicum intervallum. Ergo momentum vis manus aequale erit ponderis G momento, atque ita dabitur aequilibrium.

COROLLARIUM II.

400. Quo ergo maior est scytae longitudo, & quo minus est duarum helicum intervallum, momentum vis manus eo maius erit, & contra, illud ponderis erit minus.

SCHO-

SCHOLION.

401. Quantum vero augeri debeat in hac machina vis potentiae, sequenti exemplo aperiemus. Sit longitudo scytalae parisiensium pedum 3., & digiti unius binarum helicum intervallum. Quoniam pedes singuli 12. constant digitis, utique longitudo scytalae quae est 3. pedum, erit quoque digitorum 36. Sed circumferentia circuli est ferme sextupla eius radii. Ergo circumferentia cuius radius est ipsa scytalae longitudo, quamproxime erit 216. digitorum, haecque proinde erit ad binarum helicum intervallum, ut 216. ad 1. Cum autem homo scytalae applicatus, ipsam horizontaliter brachiis a se pellat, vis eius manus erit (194) librarum parisiensium 27., ideoque factum ex illa vi in circumferentiam a scytala velut radio descriptam, erit 5832. Similiter si pondus fuerit librarum 5832., factum ex pondere in binarum helicum intervallum erit 5832. Ergo cum primum factum alteri sit aequale, momentum quoque vis manus aequabitur (398) momento ponderis, atque ita etsi vis manus valeat tantum 27. libras parisienses, huic tamen machinae applicata, sustinebit parisienses libras 5832.

SCHOLION II.

402. Quotiescunque est in hac machina aequilibrium, illud utique tolli nequit, etiamsi po-

potentia paululum augeatur; etenim superanda etiam frictio est, quae in cochlea maxima esse solet. Siquidem quia mas cochlea foeminae sic inferitur, ut pars parti apte respondeat, consequens est, ut pondus aliquod nequeat ope cochleae elevari, quin mas cochlea super quiescentem foeminam ita incedat, ut illius eminentiae huius cavitates perpetuo radant, sicque frictio maxima oriatur.

SCHOLION III.

403. Id autem commodi habet cochlea ex frictione, quod nempe ipsa minime retrocedat, etsi potentiae actio cesset, quod quidem in aliis machinis non succedit; in illis siquidem cadit pondus statim ac potentia sustinens removetur. Huius autem phaenomeni ratio est, quia pondus ope cochleae elevatum, deorsum trahit cochleam verticaliter, illa autem vicissim nequit descendere nisi oblique, iuxta scilicet directionem helicis, quas ipsa habet. Cum autem directio helicis ab horizontali parum abludat; liquet, quod si vis ponderis prementis helicem dividatur in duas vires, quarum altera ad helicem sit normalis, altera parallela, utique haec exigua prorsus erit. Sed hac vi sola urgetur cochlea ad descensum; ergo si a cochlea superanda sit exigua frictio, ea minime retrocedet.

CA-

CAPUT V.

De cuneo, machinarum simplicium sexta.

DEFINITIO XVI.

Tabula 404. **C***uneus* est prisma triangulare EGKBS, cuius plana opposita sunt triangula isoscelia GEO, KSB. Altitudo EV trianguli GEO vocatur cunei *Altitudo*, eiusque basim GO vocant cunei *Latitudinem*. Denique recta ES, quae triangulorum vertices iungit, dicitur *Acies* cunei, & plana EOBS, EGKS cunei *Facies*, seu *Latere* nuncupantur.

SCHOLION.

Tabula 405. Ligno findendo acies cunei sequenti methodo applicatur. Sit ACB planum cunei, qui faciebus AC, BC tangat lineam scindendam molem. Malleo percutiatur cuneus in puncto medio N secundum directionem NP, ipsi AB normalem, quae transibit per verticem C. trianguli isoscelis ACB. Hoc peracto, ita cuneus debet adigi intra lignum, quasi promoveretur super duo plana lignea SC, HC aequaliter inclinata ad verticalem rectam NC, atque adeo etiam ad horizontem. Haec itaque duo plana aequaliter, & (178) perpendiculariter ab eodem cuneo premi debent.

DE-

DEFINITIO XVII.

406. Semicuneus est prisma triangulare EDBAC, cuius opposita plana sunt triangula isoscelia rectangula in A & E. Vnum ex hisce planis est triangulum ABC, alterum vero est, quod ipsi opponitur.

Tabula
XIII.
Fig. 7.

SCHOLION.

407. Solet semicuneus inservire ponderi elevando ad exiguam altitudinem, idque perficitur tali modo. Iaceat grave H inter planum verticale FG, & verticem semicunei. Idem postea semicuneus ita horizontaliter a potentia aliqua promoveatur, ut eius vertex tendat ex C in G; liquet (sumpta LC ipsi CG aequali, & erecta verticali LS) grave H contra propriam directionem descripturum eodem tempore spatium LS.

PROPOSITIO XXIX.

408. *SI potentia aliqua semicuneo applicata, elevet pondus datum; eius momentum ad momentum buius erit, ut factum ex potentia in semicunei altitudinem ad factum ponderis in latitudinem eius.*

Dum semicuneus promovetur ex C in G, hoc est dum potentia cuneo applicata, describit spatium CG, aut ipsi aequale LC iuxta propriam directionem, grave H contra

Tabula
XIII.
Fig. 7.

O

pro-

propriam directionem describit (407) spatium LS. Igitur spatium potentiae ad illud ponderis erit, ut recta LC ad LS; sed LC est ad LS, ut AC ad AB. Ergo etiam spatium potentiae ad spatium ponderis erit, ut AC est ad AB; sed momentum potentiae est ad illud ponderis, ut factum ex potentia in eius spatium iuxta propriam directionem, ad factum ex pondere (319) in eius spatium contra propriam directionem. Ergo & momentum potentiae semicuneo applicatae, erit ad ponderis H momentum, ut factum ex potentia in AC, quae est semicunei altitudo, ad factum ex pondere in AB, quae est semicunei latitudo. Q. E. D.

COROLLARIUM I.

409. Quod si potentia sit ad pondus, ut semicunei latitudo AB ad eiusdem altitudinem AC; tunc factum ex potentia in altitudinem aequale est facto ex pondere in latitudinem semicunei, ideoque aequalia erunt momenta ponderis, & potentiae, atque ita dabitur aequilibrium.

COROLLARIUM II.

410. Si manente semicunei altitudine AC, minuaturs latitudo ipsius AB seu, quod idem est, si acutior fiat angulus BCA; tunc factum ex pondere in AB, hoc est ponderis H momentum, momento potentiae minus erit. Haec ergo ponderi praevalebit.

PRO.

PROPOSITIO XXX.

411. **M**anente aequilibrio inter resistentiam ligni, & potentiam directe cuneo applicatam, potentia cunei absoluta est ad resistentiam findendi ligni, ut dimidia cunei latitudo ad eius latus.

Malleo percutiatur cuneus in latitudinis medio puncto N vi, & directione NP, perpendiculari scilicet ad AB, quae producta transibit (405) per punctum C. Deinde ad plana SC, HC demittantur ex N perpendiculares NO, NR, compleaturque parallelogrammum NDPG diagonalem habens NP. Dum vi absoluta NP adigitur cuneus intra lignum, aequaliter atque ad angulos rectos premit (405) lignea plana SC, HC; sed cunei vis NP aequipollens est binis viribus ND, NG, quae (*ex constr.*) sunt perpendiculares ad illa plana. Igitur dum cuneus intra lignum adigitur vi NP, premit plana lignea SC, HC viribus ND, NG, quae proinde aequales erunt. Porro hisce viribus conatur cuneus partes ligni invicem separare; manente itaque aequilibrio, resistentia ligni aequivalere debet illis duabus viribus simul sumptis, sive alterutri bis sumptae, ob ambarum aequalitatem. Cum autem in triangulo rectangulo ANC ex angulo recto N demissa sit ad AC perpendicularis NO, uti-

O 2

que

Tabula
XIII.
Fig 6

que angulus NAO aequabitur ONC , seu DNP . Eandem ob causam in triangulo re-
ctangulo BNC angulus NBC aequabitur RNC ,
seu GNP , aut sibi alterno angulo NPD ob
parallelas NG , DP . Ergo triangulum NDP
simile erit alteri ACB , atque NP ad ND
erit, ut AB ad AC , & consequentia du-
plicando, NP erit ad duplam ND , ut AB
ad duplam AC , sive ut dupla AN ad du-
plam AC , aut ut AN ad AC . Sed potentia
cunei absoluta est ad resistantiam ligni, ut
 NP ad duplam ND ; ergo erit quoque ut
dimidia cunei latitudo AN ad ipsius latus
 AC . Q. E. D.

COROLLARIUM I.

412. Manente igitur cunei latere AC , seu
 BC , si eius latitudo AB minuat, seu si
minor fiat angulus ACB ; tunc perfectior e-
vadit cuneus ACB , seu minor potentia opus
est ad aequilibrium faciendum. Diminuta si-
quidem recta AB minor quoque evadet al-
tera recta AN , quae medietas est AB , ideo-
que minuetur ratio AN ad AC ; igitur mi-
nuetur quoque potentiae ratio (411) ad re-
sistentiam. Sed resistantia eadem semper est;
ergo potentia, quae est cum illa aequilibra-
ta, evadet minor.

COROLLARIUM II.

Tabula
XIV.
Fig. 1.

413. Hinc si latera cunei referant duae
curvae HZ , BZ inter se similes, & aequa-
les,

les, ac se tangentes in puncto Z, prodibit cuneus perfectissimus. Curvarum HZ, BZ capiantur hinc inde arcus infinite parvi ZC, ZO, ducaturque communis tangens ZS, occurrens ipsi HB in S. Constat ex dictis, quod curva HZ spectari potest velut polygonum ex infinitis, atque infinite parvis lateribus rectis constans, quorum unum, veluti ZC, constituit cum tangente ZS infinitissimum angulum CZS. Eodem modo constabit, infinite parvum fore etiam angulum OZS; igitur infinite parvus erit etiam totus angulus CZO. Sed quo cunei angulus minor est, eo perfectior (412) cuneus esse debet; ergo cum infinite parvus sit angulus CZO, perfectissimus quoque erit cuneus HZB.

COROLLARIUM III.

414. Quare cum *Novacula* sit instar cunei habentis latera curvilinea, erit ea cuneus perfectissimus, ideoque cohaerentiam pilorum debet tam celeriter separare, ut exigui doloris ideam in nobis excitet.

COROLLARIUM IV.

415. Non itaque est mirandum, si rostra, & ungues avium nonnullarum, quae nempe vivere rapto solent, efformata sint instar cunei habentis latera curvilinea; illas enim natura provida sic munivit, ut inde fierent aptiores ad volatilia alia depraedanda.

O 3

SCHO.

S C H O L I O N I.

416. Stante aequilibrio inter potentiam cuneo applicatam, & resistentiam ligni, illud minime destruetur, etiam si potentia paululum augeatur. Cum enim utraque facies cunei scabra sit, nec pariter scabritie careant ligni partes invicem separandae; cuneus nequit adigi intra lignum, quin maxima fiat frictio, a vi cunei superanda.

S C H O L I O N II.

417. Caeterum ad cuneum revocantur omnia ferme artificum instrumenta, & quidem 1.^o *Afcia* & *Securis*, quibus utimur ad scindenda, & findenda ligna. 2.^o Omne *Scalprorum* genus, quibus *Sculptores*, *Caelatores*, atque *Lignarii Fabri* uti solent. 3.^o Omnia demum *Cultra*, *Enses*, *Clavi* etiam, & *Pugiones*, atque alia huiusmodi instrumenta, ad separandas partes corporis adinventata.

C A P V T XI.

*De dentatis rotis, & compositis
Machinis inde ortis.*

D E F I N I T I O XVIII.

418. **R**ota dentata est, cuius circumferentia dividitur in determinatum numerum aequalium dentium, & aequae distantium inter se.

SCHO-

SCHOLION.

419. Olaus Roemerus cum Parisiis ageret, demonstravit, figuram dentium in rotis epicycloidalem esse debere, ut minima evadat frictio. Idem ostendit postea etiam D. de la Hire. Hanc vero figuram dentium non esse in praxi receptam, maxime dolet Wolfius.

DEFINITIO XIX.

420. Cum plures dentatae rotae ita invicem connectuntur, ut una in alias agens, circulariter ipsas moveat; machina inde genita *ex dentatis rotis composita* dici solet.

SCHOLION.

421. Machinarum ex dentatis rotis compositarum est ferme numerus infinitus. Construi autem solent ad partes temporis indicandas, ad polienda vitra, ad contusionem granorum, ex quibus olea exprimuntur, atque ad innumeros alios usus, humanae vitae admodum necessarios. Ego vero consulens brevitati ad nonnullas tantum machinas me converto, quae vel ex dentatis unice constant rotis, vel compositae sunt ex trochlea, aut cochlea rotis iuncta; harum namque viribus adinventis, primum erit eadem methodo reliquarum quoque vires expendere, & mensurare.

DEFINITIO XX.

Tabula
XIV.
Fig. 2.

422. Si axes A, H, E, G mutuo sint aequales, iique (excepto extremo G) habeant singuli 10. dentes, quibus moveant aequales rotas totidem S, N, F dentibus 100. praeditas; machina inde confurgens *Pancrati*um dicitur a Stevino.

SCHOLIUM.

423. Vt vero hac machina pondus aliquod elevetur, vis manus applicanda est manubrio CDL, cuius longitudo CD decupla esse debet radii axis A, sive huic aequalium H, E, G. Pondus vero suspendi debet ab axe extremo G.

PROPOSITIO XXXI.

424. *SI Pancrati*um ex axibus quatuor conflet, spatium vis manus erit ad illud ponderis eodem tempore absolutum, ut 10000. ad 1.

Tabula
XIV.
Fig. 2.

Dum vis manus applicata in D, semel circumagitur manubrium CDL, semel quoque revolvitur axis A; ergo spatium a vi manus percursum, erit ad spatium absolutum a singulis dentibus axis A, sive ab axe A, ut circumferentia, quae describitur a vi manus, ad circumferentiam axis A, sive ut manubrii longitudo ad radium axis A sive (423) ut 10. ad 1. Igi-

1. Igitur spatium vis manus decuplum esse debet spatii axis A. Sed cum sint 10. dentes in axe A, & 100. in rota S, decies revolvitur axis A, dum semel vertitur rota S, five axis H; ergo spatium vis manus centuplum erit spatii axis H. Sed eandem ob causam decem revolutiones conficit axis H, dum unam complet rota N, five axis E; ergo spatium vis manus millecuplum erit spatii axis E. Eodem ratio- cinio etiam constabit, spatium axis E decuplum esse spatii percurfi ab axe G, five a pondere P; igitur spatium vis manus applicatae manubrio in D, decem millecuplum erit spatii percurfi a pondere P. Quare spatium vis manus ad illud ponderis erit, ut 10000. ad 1. Q. E. D.

COROLLARIUM I.

425. Hinc si potentia, quae tantum sustinet libram unam, huic machinae applicetur, ea sustinebit pondus 10000. librarum. Potentia siquidem est ad pondus, ut 1. ad 10000.; sed spatium ponderis est (424) ad spatium potentiae, ut 1. ad 10000. Ergo potentia erit ad pondus, ut huius spatium ad spatium potentiae, atque ita (330) dabitur aequilibrium.

COROLLARIUM II.

426. Simili modo constar, quod si haberet machina quinque axes, qui essent ad ro-

O 5

tas

tas in eadem positi proportionē; potentia unius librae regere posset pondus 100000. librarum; si vero haberet sex axes, sustentaret pondus librarum 1000000., & sic deinceps. Itaque generatim ut librae ponderis, quas potentia sustinet, innotescant, praemittenda est unitas tot cyphris 0, quot ipsa machina axes habet; atque ita si in hac machina forent 50. axes, potentia unius librae sustinere posset tot libras, quot exponere solet unitas 50. cyphris 0 praemissa. Porro iuxta calculum Archimedis, iste numerus tam enormis non maior est numero arenularum, quae imple- rent mundi spatium universum; ergo cum Formica possit unum granum arenulae ele- vare, illa huic machinae applicata, elevare posset integrum universum arenulis illis ple- num. Non itaque est mirandum, si solebat dicere Archimedes, a se motum iri inte- grum universum, si pedem posset figere e- xtra mundum.

Dic ubi consistam, coelum, terramque movebo.

DEFINITIO XXI.

Tabula
XIV.
Fig. 3.

427. Si axis dentatus B moveat dentatam rotam C, haec autem EN cylindrum, indeque trochleas L & H, ope ductarii funis ELHSI; prodibit machina a D. Padmore Bristolii inventa, quae & ingentia pondera ad altitudinem magnam elevat, & de loco ad locum commode transferri potest.

SCHO-

SCHOLIUM.

428. Axis dentatus B in hac machina aequatur alteri axi EN, cui circumplicatur funis LE. Numerus quoque dentium rotæ C debet vigesies maior esse numero dentium axis B. Longitudo demum FO manubrii AOF dupla esse solet radii axis B vel EN.

PROPOSITIO XXXII.

429. *SI in machina a D. Padmore inventa, Tabula
vis manus applicata manubrio AOF XIV.
elevator pondus P; spatium vis manus erit ad Fig. 3.
spatium ponderis eodem tempore absolutum,
ut 80. est ad 1.*

Cum numerus dentium rotæ C vigesies (428) maior sit dentium numero axis B, utique dum axis B, seu vis manus applicata manubrio in A, vigesies vertitur circa F, semel revolvitur rota C, sive axis EN, cui funis circumplicatur. Quare spatium vis manus erit ad spatium a fune LE descriptum eodem tempore, ut viginti circumferentiae quarum radius est OF, ad unam circumferentiam axis EN; sed circumferentia radio OF descripta, dupla est circumferentiae (428) axis EN. Ergo spatium vis manus erit ad illud funis ut 40. est ad 1. hoc est primum spatium quadragies altero maius erit. Verum dum pondus P ascendit per
spa-

spatium, ipsi HL aequale, funis partes aequales IS, LH transeunt per L trochleam, aequale adeo spatium funis LE duplum erit spatii ponderis P. Ergo spatium vis manus octuagies maius erit spatium ponderis P, hoc est primum spatium erit ad alterum, ut 80. ad 1. Q. E. D.

COROLLARIUM I.

430. Hinc si vis manus manubrio applicata in machina, ubi spatium potentiae semper aequale est ponderis spatium, regere tantum posset 30. libras; ipsa huic machinae applicata sustineret pondus 2400. librarum. Nam pondus esset ad vim manus, ut 2400. ad 30., sive ut 80. ad 1.; sed etiam spatium vis manus foret in hac machina ad spatium ponderis, ut 80. ad 1. Ergo pondus esset ad vim manus, ut huius spatium ad spatium illius, ideoque inter potentiam & pondus (330) daretur utique aequilibrium.

COROLLARIUM II.

431. Constat autem (389) vim manus hominis posse aliquandiu manubrium vertere, unaque attollere pondus 30. librarum parisienfium in illa machina, in qua spatium potentiae aequale est ponderis spatium. Ergo homo ille huic machinae applicatus, posset attollere 2400. libras parisienfes; atque ita si duo homines huic machinae applicentur, elevare utique possunt 4800. libras parisienfes.

PRO-

DEFINITIO XXII.

432. Si cochlea IO iuncta sit dentatis ro-^{Tab XV}
tis GF, HD; prodibit *compositum Torcular*, Fig. 1.
ad comprimenda corpora maxime accomo-
datum.

SCHOLION.

433. Haec autem machina sic construitur.
Verticali cylindro RR aptatur tum scytala
AB 1. $\frac{1}{3}$ cubitis longa, tum curriculum E,
12. fufis praeditum, quae moveant denta-
tam rotam DH habentem pro diametro
duos cubitos, dentes vero 36. Rursus huic
rotae dentatae HD adnexum est curriculum
aliud C 16. constans fufis, quorum longitu-
do se extendit ad cubitos 1. $\frac{1}{3}$. Denique haec
fusa movere debent dentatam aliam GF rotam
cochleae IO insertam, quae habet dentes
48., & diametrum 3. $\frac{1}{3}$ cubitorum. Haec au-
tem machina a Clar. Ioanne Maria Lam-
predio inventa est, cum Illustrissimus, atque
Excellentissimus Dominus Caietanus Antino-
rius non tantum gravissimorum Munerum di-
gnitate, sed & bonarum Artium Studio con-
spicius ab eo aliquid novi exposceret ad
effugienda communium Torcularium incom-
moda. Cum autem machinam huiusmodi cae-
teris omnibus torcularibus praestare nove-
rit, eam ruri ad oleum, vinumque expri-
mendum applicari iussit.

PRO-

PROPOSITIO XXXIII.

434. **P**otentia, quae in compositio torculari aequilibratur cum comprimendi corporis resistentia, est nona pars eius, quae necessaria est ad idem praestandum in communibus torcularibus.

Tabula
XV.
Fig. 1.

Quia curriculum E 12. fusa habet, rota vero HD dentes 36; utique dum curriculum idem E, five potentia applicata in A tres complet revolutiones, unam perficiet rota HD, & curriculum etiam C. Quoties ergo potentia applicata in A, novies revolvitur circa B, curriculum etiam C tribus vicibus revolvetur. Verum cum C curriculum 16. fusa habeat, & GF rota constet dentibus 48., curriculo C perficiente tres revolutiones, unam absolvet rota GF, atque adeo & IO cochlea. Ergo in una cochleae conversione, dum nempe haec descendit per duarum helicum intervallum, potentia in A applicata novem circumferentias describet, quarum radius est AB. Manente itaque aequilibrio inter potentiam & resistentiam, erit potentia ad resistentiam (330), ut duarum helicum intervallum ad novem circumferentias, quarum radius est AB. Sed si scytala ipsa AB esset cochleae IO adfixa, ut in communibus torcularibus, atque potentia aliqua ipsi applicata, foret

foret in aequilibrio cum eadem resistentia; utique resistentia ad illam potentiam esset (330), ut circumferentia cuius radius est AB, ad duarum helicum intervallum. Itaque ex aequo perturbate, potentia in torculari composito erit ad alteram in communi, ut una circumferentia ad novem circumferentias eiusdem radii cum priore, sive ut 1. ad 9., hoc est prima potentia pars nona alterius erit. Q. E. D.

COROLLARIUM I.

435. Quare si in communibus torcularibus potentia quaequam data sufficiens per se sit ad superandam comprimendi corporis resistentiam; utique ad id praestandum in composito torculari pars nona eiusdem necessaria tantum erit.

COROLLARIUM II.

436. Non aegre colligi inde potest, hoc nostrum torcular esse aliis communibus praefendum. Nam 1.^o in communibus torcularibus dum praecipue crescit comprimendi corporis resistentia, quinque, aut sex homines convertendae cochleae vix sufficiunt, verum in hoc nostro ad cochleam convertendam plusquam sufficit unus homo. 2.^o Ad scytalae punctum A potest loco hominis substitui bos, vel equus, sicque impensae plurimum parceretur, quod in communibus torcularibus non praestatur. 3.^o In communi-
bus

bus torcularibus homines, qui sunt scytalæ applicati, non eodem semper tenore agunt, sed ipsam inordinato impellere solent motu, ex quo fit, ut sæpe frangantur scytalæ, atque matrix, quin etiam muri, quibus matrix innititur, contremiscant, id quod accidere in nostro nequit, in quo potentia scytalæ applicata, ordinato semper, atque æquabili fertur motu.

S C H O L I O N.

437. Neque in praxi magnum compendium virium in hac machina cum magno dispendio temporis iungi solet. In communi siquidem torculari vix dum manus scytalæ applicata, describit quadrantem circuli, scytala ipsis cruribus, quæ matricem sustinent, occurrendo, progredi ulterius nequit, nisi extracta scytala a foramine, per quod transit, postea in aliud subsequens inferatur. Vnde vis manus scytalæ applicata, duas revolutiones perficit illo tempore, quo ipsa cochlea unam complet. Constat vero, scytalæ longitudinem, seu radium circuli percurrendi a vi manus, in communibus torcularibus esse sex circiter cubitorum; ergo cum circumferentia sit ferme sextupla radii, utique illa, cuius radius est ipsa scytalæ longitudo, erit cubitorum circiter 36. Vidimus autem, vim manus scytalæ applicatam, in una cochleæ conversione duas circumferentias describere; ergo totum spatium a vi manus per-

percursum, erit cubitorum circiter 72. In torculari autem hoc nostro cum longitudo scytalae sit unius cubiti cum dimidio, spatium a vi manus percursum in una cochleae conversione erit cubitorum circiter 81. Haec duo igitur spatia cum minimum differunt inter se, tum etiam in nostro torculari breviori tempore expedientur. Homo enim ad scytalam nostrae machinae applicatus, semper uniformiter promovetur, dum in communibus torcularibus quo magis crescit comprimendi corporis resistentia, eo tardiori incedere solet motu; siquidem ille homo modo totis viribus urget scytalam, modo debet quiescere ut respiret. Huc accedit, quod ipsi homines scytalae applicati cum in quavis cochleae conversione quater scytalam ipsam ex uno in aliud foramen transferre cogantur, id nisi maximo temporis dispendio praestare nequeunt, atque adeo spatium licet parum longius in torculari hoc nostro, celerius tamen est absque dubio percurrendum. Adde etiam quod ex hac machina id commodi comparatur, quod idem homo, vel quaecumque animata potentia scytalae applicata, si directionem immutet, viribusque suis contraria utatur via, depressam cochleam ad matricem usque elevat, atque adeo brevi & expedita methodo materiam comprimendam rursus aptat, premitque. Quae quidem omnia nullo pacto in caeteris torcularibus obtinentur.

DE-

DEFINITIO XXIII.

Tabula 438. Si rotæ dentatæ E adnexa fuerit
 XV. DF cochlea; prodibit *infinita Cochlea* Archi-
 Fig. 2. medis.

SCHOLION.

439. Dum hac machina attollitur datum pondus, vis manus applicari solet manubrio in C, quod dum ipsa vertit, spiræ cochleæ circumagunt dentes rotæ E, atque ita attollitur pondus P. Dicitur autem hæc cochlea *Infinita*, quod sine fine circumagi ipsa possit.

COROLLARIUM.

440. Dum semel cochlea circumvolvitur, non nisi intervallo unius dentis promoveri solet rota dentata E.

PROPOSITIO XXXIV.

Tabula 441. **S**I vis manus ope cochleæ infinitæ mo-
 XV. veat pondus P; spatium vis manus
 Fig. 2. ad illud ponderis erit, ut circumferentia ra-
 dii BO toties repetita, quot sunt dentes in ro-
 ta E, est ad circumferentiam axis AH.

Dum applicata manus in C, semel revolvitur circa B, unus dens rotæ E a cochlea (440) promovetur, seu per spirarum longitudinem totam transit. Vt itaque ro-
 ta

ta E revolutionem integram compleat seu, quod idem est, omnes eius dentes transeant per spiras cochleae DF, potentia in C toties vertere manubrium debet, quot sunt dentes in rota E. Hoc vero temporis intervallo tantundem elevabitur pondus P, quantum funis tractorii illud est, quod circumplicat semel axem AH. Ergo spatium vis manus erit ad illud ponderis, ut circumferentia radii BO toties repetita quot sunt dentes in rota E, est ad circumferentiam axis AH. Q. E. D.

COROLLARIUM I.

442. Hinc si 100. dentes fuerint in rota E, spatium vis manus ad illud ponderis erit, ut circumferentia radii BO centies repetita, est ad circumferentiam axis AH, sive ut BO radius centies sumptus, est ad radium axis AH.

COROLLARIUM II.

443. Quare si fuerit pondus ad vim manus, ut radius BO centies repetitus, est ad radium axis AH; erit quoque pondus ad vim manus, ut huius spatium ad spatium ponderis, atque ita necessario dabitur (330) aequilibrium.

SCHOLIUM I.

444. Ut vis huius machinae melius percipiat, lubet rem totam exemplo aliquo illu-






illustrare. Sunto ut prius, 100. dentes in rota E, atque longitudo BO manubrii BOC sit digitis 10. longa, semidiameter vero axis AH digito uno constet. Quoniam BO radius est ut 10., utique is centies repetitus erit ut 1000.; radius autem axis AH est ut 1. Ergo spatium vis manus erit ad illud ponderis ut 1000. ad 1., sive ut 30000. ad 30. Ex quo fit, ut si vis media manus manubrio applicata, sustineret tantummodo 30. libras, ipsa huic machinae applicata (330) regeret pondus 30000. librarum; pondus siquidem esset ad vim manus ut 30000. ad 30., sive ut 1000. ad 1., sive ut spatium vis manus ad spatium ponderis.

S C H O L I O N II.


445. Constat autem (389) vim manus posse aliquandiu manubrium vertere, atque attollere pondus 30. librarum parisiensium in machina, in qua potentia & pondus per aequalia spatia promoventur. Ergo si vis illa huic machinae applicetur, atque manubrium vertat, utique attollet pondus 30000. librarum parisiensium.

F I N I S.

Tab. I




Tab. II.





Tab. III :



Tab. IV

Fig. 2.




Fig. 3.







Fig. 6.




Tab. V



Tab VI



Tab. VII



Tab:VIII




Fig 2




Fig 4




Fig. 6






Fig. 8






Tab: K



Tab. XI






Fig 3





Fig 4



Tab. XIII





Fig. 5



Fig. 3

Fig. 6





Fig. 7




Fig. 4

Fig. 2






Fig. 3



Tab: XV



7 6 220
(00) 461798



005642803

MC

